

LUK

Yesu Kilisi xolac wê Luk kivuu ge

Kiyang tyo kehe

¹⁻² Xe levac Tiopilas, ông xovô pyap bê ilage kiyang val le seac vac xe mahigun mi xomxo mangwe yê vô buc taxlee, om he nêl xolac wê he yê ge kitong vô xe. Nang dêc xomxo tibeac mangwe nêb he ob kituc kiyang ge vîhati mi kivuu vac kipihac, om he toto kivuu kiyang tiyi wê xomxo taxlee nêl di i val vô il ga hixôn.

³ Om a êno nêb a ob kivuu kiyang ge vac kipihac mi vông i loc vô ông, ên buc tibeac a kinêg mi xovô kiyang ge vîhati kehe. Om a kivuu vîhati bôbac yuu nivîha vac kipihac,

⁴ ên a nêb ông kitong mi xovô bê xolac wê xomxo nêl mi ông ngô ge, nôn vixôhilôg.

Angela nêl Jon kitong vô ma Sekalaia

⁵ Vô buc wê Helot tu king mi viac vigwe Judia ge, xomxo ti dô lê nêbê Sekalaia di vînê lê nêbê Ilisabet. Sekalaia ge xomxo wê mi si daa vô Anutu ge ti, vac kidu ti wê lê nêbê Abaisa ge, di vînê kehe vac Elon.

⁶ Mêd yuu ge, Anutu yê manôn nivîha lec yuu, nêb yuu xomxo nivîha lee, ên yuu timu vô Apumtau kiyang yuu xolac vîhati di o vông ti so lêm.

⁷ Lêc yuu nu ma, ên Ilisabet o kô nipwo ti lêm, di yuu liya vô kipwoc yuu vêxta.

⁸ Sekalaia he lie daa siên la vông yuac vac Anutu xumac ngibua, ên ge he nêb buc wê ob vông yuac lec ge, om Sekalaia la si daa vô Anutu.

⁹ Môm wê he mi vông ge, he mi tide ên nêb i nêl kitong vô he bê he tina ob la vac xumac ngibua nilô ên la si daa nivivea nivaha vô Apumtau. Om he tide, léc nêb Sekalaia, om Sekalaia la vac xumac ngibua nilô,

¹⁰ di xomxo tibeac kitaa vô Anutu mi dô vixun, di Sekalaia si daa nivivea nivaha vô Anutu.

¹¹ Mêd Apumtau angela ti val le vô alta wê si daa lec ge vô vigê hivôv,

¹² di Sekalaia yê mi yetac ên di xona ên.

¹³ Léc angela tige nêl vô i ên nêbê, “Sekalaia, xonaên i ma, ên Anutu ngô kitaaên wê ông kitaa ge pyap. Om vinêm Ilisabet obêc kô num vux ti di ông ob nêl lê nêbê Jon.

¹⁴ Mêd ông obêc pimil di ông nilôm obêc vô nivaha, di buc wê num tige obêc yubac ge od obêc vông xomxo tibeac xêyaa vô nivaha.

¹⁵ Ên num tyo, Anutu obêc yê nêb i tu xomxo levac, di i o léc num mia wain yuu mia xêkizêc lêm. Buc wê obêc gên dô vac ta xêyaa ge od Myakilôhông Ngibua obêc hivun i xôn pyap,

¹⁶ di timuên ge od obêc pilepac xomxo Islel tibeac nilô lax vô he Apumtau Anutu.

¹⁷ Xomxo tige ob kô xovôên yuu xêkizêc i tiyi xochê Ilaija kô ge di i mug Apumtau môm, om obêc pilepac mae nilô lax vô nue, di obêc pilepac he wê pwoo kiyang vac ge nilô di he i loc kô xovôên yuu piyôp nivaha wê xomxo vông vinên vông ge. Om môm ge wê ob viac xomxo nilô pyap, êdêc he i dô hivôn nilô nivaha di Apumtau i val.”

18 Angela nêl pyap, mêd Sekalaia kinêg vô i ên nêbê, “Kiyang wê ông nêl ge ob vô nôn lec bêna? Ên xii vô kipwoc yuu vêxta ga mê.”

19 Mêd angela nêl vô i ên nêbê, “A ga Gebliel wê a mi le vô Anutu manôn ge, lêc Anutu vông a lam ên nêb a lam nêl kiyang nivihha tiga vô ông.

20 Om kiyang wê a nêl ga obêc vô nôn lec vô buc wê Anutu nêl ge. Lêcom ông o vông i vin kiyang tyo lêm, om ông ngô lê. Ông obêc dô tiyi xochê yac ge di keacên ob ma, di i miloc vô buc wê kiyang obêc vô nôn lec ge lê.”

21 Xomxo wê kitucma mi dô vixun ge dô bin Sekalaia, di kinêg vôma ên nêbê, “Sekalaia la vô va, lêc la dô gwêba ta vac xumac nilô?”

22 He dô dêc Sekalaia lop mi lôm, lêc keacên ma vô he, ên mya viyin, om he xovô nêbê mêd yê vatya ti vac xumac ngibua nilô. Lêc Sekalaia hilung kiyang ya vigê vô he, ên mya viyin.

23 Mêd buc wê Sekalaia yuac daa siên ge tiyôô, om lax ben viyangtôv.

24 Mêd lax dô ben di vinê Ilisabet, nu tuc dô vac xêyaa di i mi dô vac xumac lôma tiyi dentuc vigê vilu, di nêl ên nêbê,

25 “Anutu xo vigwe pisiv ên a ên wê a mi le top di nipwo ma ge, om vông nivihha vô a mi vô a nig yocên vêl.”

Angela Gebliel nêl Yesu kitong vô Malia

26 Ilisabet nu dô vac xêyaa tiyi dentuc vigê vilu di sec ti, lêc Anutu vông angela Gebliel la vac vigwe Nasalet vac vigwe levac Galili,

27 di i la vô vêxwo ti lê Malia. Malia ge, tae mae nêl i lê lec Josep ên nêb yuu i iima, lêc yuu gên dô teva. Josep ge, kehe vac king Devit.

28 Mêd Gebliel la nêl vô Malia ên nêbê, “Ông wê Anutu yê ông nivaha ge, kiyang malehe i hivun ông xôn, ên Apumtau dô hixôn ông.”

29 Malia ngô kiyang tyo, lêc vông i nilô vô viyin levac, di i xo ên nêbê, “Kiyang malehe ga, kehe bêna?”

30 Mêd Gebliel nêl vô i ên nêbê, “Malia, xonaên i ma, ên Anutu yê ông nivaha.

31 Om ngô lê. Ông obêc vîvi num vux ti dêc obêc yubac ge, di ông nêl lê bê Yesu.

32 Num tyo ob tu xomxo levac di xomxo ob nêl i lê nêbê Anutu lag puunê nu, di Apumtau Anutu obêc vông i tu king mi viac xomxo tiyi xocbê bu Devit ilage,

33 om obêc tu xomxo Islel wê Jekop nue bue gee nên king mi viac he luta lêc luta, di i lê king obêc tîyô lêm.”

34 Mêlêc Malia kinêg vô angela tyo ên nêbê, “Kiyang ga obêc vô nôn lec bêna? Ên a gên o kô vux ti lêm.”

35 Mêd angela luu i vya ên nêbê, “Myakilôhô Ngibua obêc lam vô ông, di xêkizêc wê Anutu lag puunê vông ge obêc lam hivun ông xôn, om nipwo ti wê ông obêc kô ge, xomxo ob nêb i ngibua di i Anutu nu.

36 “Ngô lê. Gônâm Ilisabet wê vô vêxta di mi le top di nu ma ge, gwêbaga vîvi nu vux ti, lêc gên dô di dentuc vigê vilu di sec ti lam la vêl, om obêc kô nu tige.

³⁷ Ên kiyang yuu yuac ti o vô viyin vô Anutu lêm. Nge, Anutu tiyi wê ob vông susu vihati vô nôn lec ge.”

³⁸ Om Malia nêl vô angela ên nêbê, “Apumtau nu yuac a, om kiyang wê ông nêl vô a ge i vô nôn lec.” Pyap dèc angela sea i di lax.

Malia la yê Ilisabet

³⁹ Vac buc tige mahigun ti, Malia kidi di tup la vac vigwe kitôn ti wê yêp vac vigwe Judia ge,

⁴⁰ di la vac Ilisabet yuu Sekalaia ben xumac lôma di la pul Ilisabet vigê di nêl kiyang malehe vô i.

⁴¹ Mêd Ilisabet ngô Malia vya di nu wê dô vac i xêyaa ge yetac di ngigax i, mêd Myakilôhô Ngibua lam hivun Ilisabet xôn,

⁴² di i nêl vya levac vô Malia ên nêbê, “Anutu vông vizid nivîha vô ông luu vêx baba ge vêl. Di num wê ông ob kô ge, vizid nivîha wê Anutu vông ge obêc hivun i xôn.

⁴³ A ga bêna lê, lèc a Apumtau ta val vô a?

⁴⁴ Om ngô lê. A ninyag gên ngô ông vyam wê ông val nêl vô a ge, lèc a nug wê dô vac a xêgyaa ga yetac mi ngigax i di pimil.

⁴⁵ Ông vông i vin pyap om ông hi vixam i pec, ên kiyang wê Anutu nêl vô ông ge obêc vô nôn lec timuên.” Ilisabet nêl bêge.

Malia kiyang pimilên

⁴⁶ Malia nêl ên nêbê,

“A nilôg pimil Apumtau lê,

⁴⁷ di a kinug hi vixa ên Anutu wê ngidu a xôn ge.

⁴⁸ Ên a ga Anutu nu yuac pileva, léc Anutu xêyaa vin lec a, om gwêbaga di timuên ge, xomxo vihati obêc nêl a lêg la bê Anutu vông vizid nivihava vò a,

⁴⁹ ên Anutu xêkizêc kehe vông do levac tige vò a, di i lê ngibua.

⁵⁰ Anutu xêyaa vin lec xomxo wê la vac i kwa ngibi ge, om môp bêge wê ob yêp vò xomxo tibeac tibeac vihati di i loc vò myahipu.

⁵¹ Anutu vigê vông yuac xêkizêc, om tii xomxo wê nilô yong he ge moo sea mi la.

⁵² Di Anutu vò xêkizêc vêl ên xomxo levac wê kô lê king ge, di hòm xomxo pileva lê lec.

⁵³ Mêd xomxo susu maên wê vip den he ge, Anutu vông susu nivihava vò he, di xomxo wê susu tibeac ge Anutu vông he la nêl ya vigê pileva.

⁵⁴⁻⁵⁵ Anutu ngidu nue yuac Islele xôn, ên xovô kiyang wê nêl pyap vò buge ilage ên nêbê i xêyaa ob vin lec Eblaham he nue bue timuên di i loc tiji buc myahipu.” Malia nêl bêge.

⁵⁶ Malia dô hixôn Ilisabet tiji dentuc yon dêc lax mi la ben.

Ilisabet kô nu tuc Jon

⁵⁷ Buc wê Ilisabet nu ob yubac ge, om nu tyo yubac léc nu tuc.

⁵⁸ Mêd Ilisabet ngidêe lie hixôn xomxo vac ben vityangtôv ge ngô wê Apumtau vông nivihava vò i ge, om he la pimil Anutu hixôn Ilisabet.

⁵⁹ Buc vigê vilu di sec yon la vêl, léc he kituc la nêb ob gôl nu tyo ninivi di nêl i lê. Om he nêb he ob nêl lê lec ma Sekalaia vaci,

⁶⁰ léc ta nêl ên nêbê, “Maê! Il ob nêl i lê bê Jon.”

⁶¹ Lêc he nêl vô i ên nêbê, “Letya lê tige? Lime ngidême ti lê o bêge lêm.”

⁶² Om he vô hîlung hîlung ya vigê kinêgên vô ma Sekalaia ên nêb i nêl bê he ob nêl nu tyo lê bêna.

⁶³ Mêd Sekalaia vông he la kô taple nipwo ti di i kivuu lê lec ên nêbê “Jon”. Mêd he yê di yetac ên.

⁶⁴ Mêd lutibed Sekalaia kwa tyip di get vô xêlehe di i keac, mêgem pîmil Anutu.

⁶⁵ Om xomxo wê dô vac vigwe tige xona, di kiyang tige la vac vigwe kitôn Judia vîhati,

⁶⁶ om xomxo vîhati wê ngô kiyang tige xo kiyang tibeac vac nilô di nêl ên nêbê, “Nipwo tige obêc dô bêna timuênê?” He nêl bêge, ên he xovô ên nêb xêkizêc wê Anutu vông ge ngidu i xôn.

Sekalaia pîmil Anutu

⁶⁷ Myakilôhô Ngibua hivun Sekalaia xôn di i nêl kiyang tiyi xocbê plopete ti bêga ên nêbê,

⁶⁸ “Il ob pîmil Apumtau wê tu il Islele nêd Anutu ge, ên i ge wê lam ngidu il wê il tu i nue ge xôn di vô il vêl ên nipaên,

⁶⁹ om vông xomxo xêkizêc ti kidi vac kehe Devit wê i nu yuac ge, ên nêb i ngidu il xôn di vông il dô vac nivîha,

⁷⁰ i tiyi xocbê Anutu nêl vô i plopete ngibua ilage mî he nêl kitong ge.

⁷¹ Kiyang tige, Anutu nêl nêb ob vô il vêl ên tibii vevac wê ob hi il gee yuu tibii wê xêyaa vô myavinê vô il gee.

⁷² Om Anutu xo vigwe pisiv ên il buge mi ngidu he xôn, di xovô i kiyang wê zôô i tu ngibua ilage.

⁷³⁻⁷⁴ Kiyang tige wê Anutu hilu vô il bug Eblaham ilage, om ob vô nôn lec vô il bêga bê Anutu ob vô il vêl ên xomxo vevac wê nêb ob kitya il vêl ge, ên nêb il vông i yuac mi dô vac, di xonaên i ma,

⁷⁵ di il le ngibua yuu nivuha vô Anutu manôn di vông i yuac i tiyi buc vihati wê il dô kibun ga ge.

⁷⁶ Ông nipwo tige, timuên xomxo ob nêl bê ông plopet wê Anutu kisii ganê vông ge, ên ông ob mug Apumtau di titô i nên môm i vô bôbac,

⁷⁷ di ông ob nêl kitong vô xomxo wê tu Anutu nue ge ên he i xovô bê Anutu ob kitya he nên nipaên vêl di vông he i dô vac nivuha.

⁷⁸ Il Anutu ob vông bêge ên wê xêyaa vin lec il ge, om ob vông xomxo ti wê xêseac lag puunê ge i lam vô il,

⁷⁹ ên i lam linac lec xomxo wê dô vac mapitoc ta di he xona ên yibên ge. Om obêc didii il di il la timu vô kiyang malehe." Sekalaia nêl bêge.

⁸⁰ Om nipwo tige lig mi vô levac di i piyôp xovô kiyang nivuha, di i la dô vac vigwe mahigun pileva wê xomxo dô vacên ma ge di i mila vô buc wê lam hilung i vô xomxo Islel ge.

2

*Malia kô nu tuc Yesu
(Matyu 1:18-25)*

¹ Vô buc tige King Sisa Ogastas vông kiyang ti la vô xomxo vac vigwe vihati ên nêb he vihati i loc ên tibii i kivuu he lê.

² Buc tige, ge wê he kivuu xomxo vihati lê taxlee, di Sailinias tu gavman levac mi viac vigwe Silia vac buc tige mi dô.

³ Om xomxo toto lax ben ben ên nêb tibii i kivuu he lê.

⁴ Josep ge, kehe vac king Devit, mêd kidi vac Nasalet vac vigwe levac Galili mi la, di mila vac vigwe levac Judia di la bu Devit ben luta lê nêbê Betlehem.

⁵ Om Josep yuu xôn vinê Malia la Betlehem ên nêb gavman i kivuu yuu lê. Malia ge, nu dô vac i xêyaa,

⁶ mêd yuu gên dô Betlehem di buc vô kwabo lec wê Malia nu ob yubac ge.

⁷ Lêc xomxo pup lec xumac wê vitevac nêb ge vihati, om yuu la dô vac bulmakau ben, mêdec nu tyo yubac lêc nu tuc, mêd Malia viyum vac nivimihi di la lii i yêp vac bulmakau dipac wê mi ya vac ge.

Angela nêl Yesu kitong vô xomxo wê viac bwoc sipsip ge

⁸ Vac vigwe tige xomxo wê viac bwoc sipsip gee dô vô vigwe ninya di viac he bwoc sipsip vô bucên mi dô.

⁹ Mêd Apumtau angela ti val vô he, di xêseac wê

Apumtau vông ge lam linac lec he, om he yê di xona mabu.

¹⁰ Lêc angela tyo nêl vô he ên nêbê, “Xonaên i ma. Di xam ngô lê. A ob nêl kiyang nivaha ti

vô xam, di kiyang tyo wê ob vông xomxo vîhati xêyaa vô nivîha yang.

¹¹ Om a ob nêl vô xam bêga bê vô buc gwêbaga vac vîgwe wê king Devit mi dô vac ilage, nu ti yubac. Ge xam nêl xomxo wê ob vô xam vêl ên nîpân. Ge Apumtau Kilisi.

¹² Om do wê xam ob xovô i lec ge bêga bê xam obêc wê nipwo tyo wê ta vîyum vac nivîmihi di i diyêp vac bulmakau dipac wê mi ya vac ge.”

¹³ Angela nêl bêge vô he, di lutibed angela lag puunê tibeac hiwocên val le hixôn angela tyo di pimil Anutu ên nêbê,

¹⁴ “Anutu lê i vô levac gê lag puunê, di kiyang malehe i lam kibun ga vô xomxo wê Anutu yê nivîha ge.”

Xomxo bwoc viacên la yê Yesu

¹⁵ Angela tigea sea he di lax mi la lag puunê, mêd xomxo bwoc viacên tigea nêl vôma ên nêbê, “Xam kidi lec ên il ob la Betlehem ên la xê kiyang ti wê Apumtau vông vô angela mi he val nêl vô il ge nôl.”

¹⁶ Om he kidi lec di tup lutibed di mîla yê wê Josep yuu Malia xeedô di nu tuc diyêp vac bwoc dipac wê mi ya vac ge.

¹⁷ He yê pyap di nêl kiyang lec nipwo tyo tiyi wê angela nêl kitong vô he ge.

¹⁸ Mêd xomxo vîhati wê ngô kiyang wê xomxo bwoc viacên tigea nêl ge ngô di yetac ên di xo kiyang tibeac lec.

¹⁹ Mêlêc Malia ngô kiyang di viac i yêp vac nîlô di xovô i tiyi buc vîhati.

²⁰ Mêd xomxo bwoc viacên tige lax mi la, di lax pimil Anutu di hi vixa pec ên kiyang vihati wê he ngô di yê nôn tiyi kiyang wê angela nêl vô he ge.

He nêl Yesu lê

²¹ Buc vigê vilu di sec yon la vêl, om he gôl nipwo tige ninivi di nêl i lê ên nêb Yesu. Lê tige wê Yesu gên o lam la vac Malia nilô lêm di angela nêl tax vô Malia.

Simion yuu Ana yê Yesu vac Anutu xumac ngibua

²² Buc wê Malia yuu nu tuc ob la lipac ningeac vêl i tiyi kiyang wê yêp vac Moses xolac ge, om Josep yuu Malia kô Yesu mi la vac xumac ngibua Jelusalem, ên nêb ob vông i loc vô Apumtau,

²³ i tiyi Apumtau kiyang wê yêp vac kipihac xolac bêga ên nêbê vêx ti obêc kô nu tuc taxlee ge od he ob vông i loc tu Anutu xe ngibua.

²⁴ Di yuu nêb yuu ob vông daa hixôn i tiyi Apumtau kiyang wê nêl ên nêbê yuu i léc kô dea yuu me tuclu nu yuu mi loc si daa vô i ge.

²⁵ Xomxo ti dô Jelusalem lê nêbê Simion. Simion ge, xomxo vông vinên nôn wê mi kitaa vô Anutu di dô bin xomxo ti wê ob lam vô viyin vêl ên Islel ge, di Myakilôhô Ngibua hivun Simion xôn.

²⁶ Ilage Myakilôhô Ngibua nêl kitong vô i ên nêb i ob yib lutibed lêm. Nge, nêb ob dô mi yê Kîlisi wê Apumtau ob vông i lam ge lec manôn lê, léc yib timuên.

²⁷ Mêd Myakilôhô Ngibua kidu Simion nêb i loc vac Anutu xumac ngibua, om Simion la dô, dêc

Yesu ta yuu ma kô i mi la vac xumac ngibua ên nêb ob vông i tiyi môp wê Moses xolac nêl ge.

²⁸ Mêgem Simion yê di hôm Yesu mi kiva lec, di pimil Anutu ya vya tibêga ên nêbê,

²⁹ “O Apumtau, gwêbaga a nêb ông kô ông num yuac a mi loc vô ông hixôn nilôg nivîha, i tiyi kiyang wê ông nêl vô a ilage,

³⁰ ên gwêbaga a magnôn yê xomxo ti wê ông vông i lam ên ông nêb i vô xe vêl ên nipaên ge.

³¹ Ge ông viac pyap mi vông i lam le seac vô xomxo manôn ên ông nêb vîhati i yê,

³² ên i ge xêseac wê ob linac lec tibii madîluhu ên he i xovô ông, di i wê ob vông nume Islel lê i vô levac.”

³³ Yesu ta yuu ma yetac ên kiyang wê Simion nêl lec i ge,

³⁴ mêd Simion kitaa lec yon, di nêl vô ta Malia ên nêbê, “Ngô lê. Num tiga wê obêc vông xomxo Islel tibeac tô mi la, di obêc hôm xomxo tibeac lec mi he le nivîha. Num tyo tiyi do wê ob hîlung Anutu môp vô xomxo ge, lêc xomxo tibeac obêc so vya vô i,

³⁵ om xomxo nêl kiyang wê xo vac nilô ge obêc lam le seac. Di ôcông va nilôm, viyin obêc kitiv ông xochê yii kitiv ông di la vac ông nilôm ge.” Simion vya bêge.

³⁶ Plopete vêx ti dô lê nêbê Ana. Ana ge, ma Panyuel di kehe Asa. Lêc kô vux ti di yuu dô klismas vigê vîlu di sec yuu,

³⁷ lêc liya yib om tu vêxôv mi dô di vô vêxta di i klismas 84. Mêd Ana mi dô vac Anutu xumac ngibua di mi ngibua yaên di mi kitaa vô Anutu tiyi lec bucên yuu vidiiên vîhati.

38 Lêc buc tya ge Ana val yê Yesu yon ta yuu ma, om pimil Anutu di lax nêl Yesu kitong vô xomxo vihati wê dô bin buc wê Anutu ob vô Jelusalem vêl ên viyin ge.

Josep yuu Malia yon Yesu lax mi la Nasalet

39 Josep yuu Malia vông môt vihati tiyi xocbê Anutu xolac nêl ge. Pyap mêd yon nu tuc lax mi la ben Nasalet vac vigwe levac Galili.

40 Yon dô dêc nu tuc lig levac di vô xêkizêc lec hixôn piyôp levac, di Anutu vizid hivun i xôn.

Yesu dô vac xumac ngibua Jelusalem

41 Yesu ta yuu ma mi la Jelusalem tiyi klismas vihati, ên nêb ob la yê buc Pasova ên xovô buc wê he sea Isip ilage.

42 Mêd Yesu klismas vigê yuu di tô mi la yuu, om yon ta yuu ma la Jelusalem ên nêb ob la yê buc Pasova tyo nang.

43 Buc Pasova vihati pyap, di he nêb ob lax ben, lêc Yesu dô Jelusalem di ta yuu ma lungên i.

44 Yuu xo ên yuu nêb mêd Yesu la hixôn lie ya mi he la, om vidiiên tige yuu myag i di kinêg i vô lie hixôn nipipu wê he xôn la ge,

45 lêc yuu o yêvô lêm, om yuu lax mi la Jelusalem mi lax myag i.

46 Yuu myag i tiyi buc yon, lêc la yêvô i vac Anutu xumac ngibua nilô wê xeedô hixôn Yuda levac levac wê kitucma ge, di ngô he kiyang di le kinêg kiyang kehe vô he.

47 Mêd xomxo wê ngô Yesu kiyang ge yetac ên i kiyang yuu piyôp nivaha wê luu he vya ge.

⁴⁸ Mêd Yesu ta yuu ma val yê di yetac ên i, om ta nêl vô i ên nêbê, “Tuçe, ông vông bêna vô xii ga lê, lêc ông vông

xii mam myag ông yoo mi xulac hixôn nilôm viyin mabu?”

⁴⁹ Mêd Yesu nêl i lax vô yuu ên nêbê, “Muu myag a ên va? Muu o xovô bê a ob dô vac Mag xumac ga lêmê?”

⁵⁰ Lêc yuu o xovô Yesu kiyang ge kehe lêm.

⁵¹ Mêd Yesu kidi mi la hixôn yuu di yon lax mi la ben Nasalet. Yon mılax dô Nasalet ge od Yesu vô ninya lehe vô ta yuu ma kiyang tiyi buc vihati, mêgem ta Malia xovô kiyang tige vihati yêp vac nilô tiyi buc vihati.

⁵² Yesu lig hixôn piyôp nivîha, om Anutu hixôn xomxo vihati xêyaa vin lec i.

3

Jon Lipacên nêl xolac vô xomxo

(Matyu 3:1-12; Mak 1:2-8; Jon 1:19-28)

¹ Vô buc tige Taibilias Sisa tu king mi viac xomxo vac klismas vigê yuu di vixa vilu (15) mi dô, di xomxo ya tu gavman levac di viac vigwe ya ya, he lê bêga, Pontias Pailat viac vigwe levac Judia di Helot viac vigwe levac Galili di li Pilip viac vigwe yuu lê Itulia yuu Tlakonaitis, di Laisenias viac vigwe Abilini.

² Di Anas yuu Kaiapas tu xomxo wê mi si daa gee nên bazub mi dô. Vô buc tige Anutu kiyang la vô Jon wê Sekalaia nu ge vac vigwe mahigun pileva.

³ Om Jon kidi mi la mia Jodan di la vac vigwe viyang viyang di la nêl xolac vô xomxo ên nêbê he i pilepac he di lipac mia êdêc Anutu i kitya he nêl nipaên vêl.

⁴ Om kiyang wê plopete Aisaia kivuu ilage mi i yêp ge vô nôn lec bêga ên nêbê,

“Xomxo ti tyuc vya levac vac vigwe mahigun pileva ên nêbê, ‘Xam viac Apumtau môp wê obêc lam vac ge di vông i vô bôbac.

⁵ Om xam hivun vigwe madia xôn ên i vô bôbac, di den kitôn levac yuu nipwo vihati vêl mi vông i vô nivaha, di titô môp nigecên i vô bôbac lec, di hóm ngidax wê dô vac môp ge vêl ên môp i vô nivaha lec,

⁶ ên xomxo vihati i yê Anutu môp wê ob vô xomxo vêl ên nipaên ge.’ ”

⁷ Xomxo tibeac la vô Jon ên nêb i lipac he, léc Jon nêl vô he ên nêbê, “Myel nipaên nue xam. Letya nêl vô xam ên nêbê xam ob pec ên Anutu xêyaa myavinê wê ob tulec xam ge?

⁸ Xam pilepac xam di vông môp nivaha ên i nêl xam kitong bê xam pilepac xam pyap. Di le i léc yong xam di nêl bê xam bum Eblaham lêm. A ob nêl vô xam bê Anutu tiyi wê ob vông ngidax tigae i tu Eblaham nue bue ge.

⁹ Xam tiyi xocbê xax wê xomxo hóm kov ên nêb ob vuv vêl ge, ên kov vô manôn mi yêp vô xax kehe. Ên xax wê o vuac nôn nivaha lêm ge, xomxo ob vuv vêl di nêx i loc vac ngwax.”

¹⁰ Jon nêl bêge vô he, om he vihati kinêg vô i ên nêbê, “Om xe ob vông bêna?”

11 Om Jon nêl vô he ên nêbê, “Xomxo ti, siot yuu obêc dô ge, od i vông ngwe vô xomxo ngwe wê nêl siot ma ge. Di xam ti yaên obêc dô vô xam ge od ông vông bêge vô xomxo wê xen yaên ma ge êno mêge.”

12 Mêd xomxo wê mi kô takis gee, ya val vô Jon ên nêb i lipac he, om kinêg vô i ên nêbê, “Xolac kehe, xe ob vông bêna?”

13 Mêd Jon nêl vô he ên nêbê, “Mone takis wê xam mi kô ge, xam kô i tiyi wê gavman nêl ge, di le i lêc kô i nginoo loc lêm.”

14 Di tibii vevac ya kinêg vô Jon ên nêbê, “Di xe gae obêc vông bêna?” Lêc Jon nêl vô he ên nêbê, “Xam o lêc hi xomxo vax vax mi vun he mone lêm. Di le i lêc vông kot kityooên vô xomxo lec he mone lêm. Nge, xam kô mone lec yuac wê xam vông ge di i pyap.”

15 Xomxo tigeê dô bin Kîlisi wê ob val ge om he ngô Jon kiyang wê nêl ge di nîlô vô hinyoma hinyoma dêc he kinêg voma ên nêbê, “Mêd ga Kîlisi tyo mê, me?”

16 Lêc Jon nêl vô he ên nêbê, “A lipac xam ya mia pileva, di timuên xomxo ngwe obêc val, lêc i xêkizêc luu xêkizêc wê a vông ge vêl, di a o nigviha tiyi wê a ob piwelac yihi vêl ên su wê i vông ge lêm. Ên obêc val lipac xam ya Myakîlôhò Ngîbua yuu ngwax.

17 I vijê vînoo vô ngec nôn wê nêb ob tung vac xumac wê nôn nivîha ob dô vac ge, di ninivi pileva ge wê obêc nêx i la vac ngwax wê mi tum luta ge ên ngwax i ya vêl.”

18 Mêd Jon nêl kiyang tibeac hixôn ên nêb i

vông xovôên vô he, di nêl Anutu xolac vô he vihati.

Helot tung Jon vac xumac kalabuhu

¹⁹ Jon kunac gavman levac Helot wê viac vigwe Galili ge, ên Helot kô li tuc vinê Helodias di vông môp nipaên tibeac hixôn.

²⁰ Lêc Helot vông nipaên levac ti hixôn wê vông Jon vac kalabuhu.

Jon lipac Yesu

(Matyu 3:13-17; Mak 1:9-11)

²¹ Buc wê xomxo lipac mia ge od Yesu lipac mia hixôn. Lipac mia pyap di lôm kitaa, dêc vigwe kisii ganê tax,

²² di Myakilôhông Ngibua tu xocbê tucluu manôn di lam dô lec Yesu. Mêd vya ti lam gê lag puunê ên nêbê, “Ông a nug wê a xêgyaa vin lec ông di a xê ông nivihã ge.”

Yesu bue tivae lê

(Matyu 1:1-17)

²³ Yesu klismas 30, di i nêl xolac vô xomxo taxlee. Di xomxo mi nêl Yesu nêb i Josep nu. Di Josep mae bue tivae he lê bêgae:

Josep ma Hilai,

²⁴ di Hilai ma Matat, di Matat ma Livai, di Livai ma Melkai, di Melkai ma Janai, di Janai ma Josep,

²⁵ di Josep ma Matataias, di Matataias ma Emos, di Emos ma Neam, di Neam ma Eslai, di Eslai ma Nagai,

²⁶ di Nagai ma Meat, di Meat ma Matataias, di Matataias ma Semen, di Semen ma Josek, di Josek ma Joda,

- 27 di Joda ma Joanan, di Joanan ma Lesa, di Lesa ma Selababel, di Selababel ma Sialtiel, di Sialtiel ma Nelai,
- 28 di Nelai ma Melkai, di Melkai ma Edai, di Edai ma Kosam, di Kosam ma Elmadam, di Elmadam ma El,
- 29 di El ma Josua, di Josua ma Eliesa, di Eliesa ma Jolim, di Jolim ma Matat, di Matat ma Livai,
- 30 di Livai ma Simion, di Simion ma Yuda, di Yuda ma Josep, di Josep ma Jonam, di Jonam ma Elaiakim,
- 31 di Elaiakim ma Melia, di Melia ma Mena, di Mena ma Matata, di Matata ma Netan, di Netan ma Devit,
- 32 di Devit ma Jesi, di Jesi ma Obet, di Obet ma Boas, di Boas ma Salmon, di Salmon ma Nason,
- 33 di Nason ma Aminadap, di Aminadap ma Atmin, di Atmin ma Anai, di Anai ma Heslon, di Heslon ma Peles, di Peles ma Yuda,
- 34 di Yuda ma Jekop, di Jekop ma Aisak, di Aisak ma Eblaham, di Eblaham ma Tila, di Tila ma Neho,
- 35 di Neho ma Selak, di Selak ma Leu, di Leu ma Pelek, di Pelek ma Ebe, di Ebe ma Sela,
- 36 di Sela ma Kenan, di Kenan ma Apaksat, di Apaksat ma Siem, di Siem ma Nôa, di Nôa ma Lamek,
- 37 di Lamek ma Metusala, di Metusala ma Inok, di Inok ma Jalet, di Jalet ma Mahalalel, di Mahalalel ma Kenan,

38 di Kenan ma Inos, di Inos ma Set, di Set ma Adam, di Adam kehe Anutu.

4

Seten yaxên Yesu

(Matyu 4:1-11; Mak 1:12-13)

¹ Myakilôhô Ngibua hivun Yesu xôn mêd i sea mia Jodan di lax mi la. Lêc Myakilôhô Ngibua didii i mi la vac vigwe mahigun pileva wê xomxo dô vacên ma ge.

² Mêd Yesu la dô buc kehe yuu di Seten yaxên i.

Yesu yaên ti ma di buc tibeac tige la vêl om vip den i.

³ Mêgem Seten nêl vô Yesu ên nêbê, “Ông obêc Anutu nu nôn ge od ông nêl ên ngidax tiga i tu yaên ti ên ông wa.”

⁴ Lêc Yesu nêl vô i ên nêbê, “Xolac nêl bêga ên nêbê, ‘Susu yaên vaci o tiyi wê xomxo ob dô maviha ya ge lêm.’ ”

⁵ Mêd Seten didii Yesu mi yuu lec mi la lec kitôn kisii mêd Seten hilung vigwe wê yêp kibun ga ge vihati vô Yesu lutibed,

⁶ di nêl vô i ên nêbê, “A ob vông vigwe gee vihati hixôn xêkizêc yuu lê levac wê he vông ge vô ông. Ên susu vihati ge tu axe pyap, om a obêc nêb vông vô xomxo ti ge od a ob vông.

⁷ Mêgem ông obêc yev vixam kitu vô a di pimil a ge od vihati obêc tu ông xe.”

⁸ Lêc Yesu nêl vô i ên nêbê, “Xolac nêl bêga nêbê, ‘Ông yev vixam kitu vô ông Apumtau Anutu tibed, di vông yuac wê ici va vông ge.’ ”

⁹ Mêd Seten didii Yesu mi yuu la Jelusalem, di i mila lax Yesu la lec Anutu xumac ngibua myahipu kisii, di nêl vô i ên nêbê, “Ông obêc Anutu nu nôn ge od ông sox loc kibun.

¹⁰ Ên xolac nêl bêga ên nêbê,
 ‘Anutu obêc vông i angela lam viac ông,
¹¹ om he obêc hôm ông kisii ya vigê, êdêc ông o lêc vinux vixam lec ngidax lêm.’ ”

¹² Lêc Yesu nêl vô i ên nêbê, “Xolac nêl bêga ên nêbê, ‘Ông o lêc yaxên Apumtau ông Anutu lêm.’ ”

¹³ Seten yaxên Yesu ya môp vihati ge pyap, dêc sea i di la, ên nêb ob la dô di buc ngwe nang lê.

*Yesu vông yuac xolac taxlee gê Galili
 (Matyu 4:12-17; Mak 1:14-15)*

¹⁴ Xêkizêc wê Myakilôhô Ngibua vông ge hivun Yesu xôn di i lax mi la Galili, di xomxo nêl i kitong vac vigwe gee vihati mi i la tiyi vigwe myahipu.

¹⁵ Mêd Yesu la nêl Anutu xolac vac he xumac lilo vihati om xomxo pimil di vông i lê vô levac.

*Xomxo Nasalet vô nimi vô Yesu
 (Matyu 13:53-58; Mak 6:1-6)*

¹⁶ Yesu milax Nasalet vac ben wê i nipwo di i dô vac lêc lig mi vô levac vac ge. Yesu lax dô, di buc sabat ge od la vac xumac lilo tiyi môp wê mi vông ge, mêd kidi lec ên nêb ob kitong xolac vô he,

¹⁷ om he vông kipihac wê plopete Aisaia kiyang yêp vac ge vô i, mi i tidii lêc yêvô kiyang ti wê yêp bêga ên nêbê,

¹⁸ “Myakilôhô Ngibua wê Apumtau vông ge lam lec a, ên Anutu vinoa a ên nêb a nêl i xolac

kitong vô xomxo wê nêb susu maên gee. Om vông a lam ên nêb a vô viyin vêl ên xomxo wê dô vac kalabuhu ge, di vông xomxo wê manôn toc ge manôn i seac, di vông a lam ên nêb a vô viyin levac wê hivun xomxo xôn ge vêl.

19 Di nêb a nêl Apumtau buc wê ob vông vizid nivaha vô xomxo ge kitong.”

20 Yesu kitong pyap, mêd vilun kipihac xôn di vông i lax vô xomxo ti wê viac xumac lilo ge di tô mi dô ên nêb ob nêl kiyang vô he, om xomxo vihati wê dô vac xumac tige manôn la vô i tived.

21 Mêd Yesu nêl vô he ên nêbê, “Xolac ti wê a kitong mi xam ngô ga, vô nôn lec gwêbaga.”

22 Mêd he pimil Yesu di yetac ên kiyang nivaha wê Yesu nêl ge di nêl voma ên nêbê, “Ga bêna? Xomxo tiga Josep nu mê?”

23 Mêd Yesu nêl vô he ên nêbê, “Vixôhilôg, xam obêc nêl kiyang pilepacên bêga vô a bê, ‘Docta, ông vông ôcông va nimnivi i vô nivaha lec lê. Ên yuac yuu do wê ông la vông vac vigwe Kapaneam mi xe ngô ge, xe nêb ông vông vac il bed ga êno bêge lê.’ Xam obêc nêl bêge vô a lê,

24 léc a ob nêl hixôn nôn vô xam bê plopete ti obêc nêl kiyang vac ici va ben ge, od lie ob vông i vin i kiyang lêm.

25 I tiyi xocbê môt wê bume tivame vông vô plopet Ilaija ilage. Vô buc tige lun valên ma tiyi klismas yon di dentuc vigê vilu di sec ti, om vip mabu yêp vac vigwe Islel vihati. Di vêxôv tibeac dô Islel wê he xen yaên ma ge,

26 léc Anutu o vông Ilaija la vô vêxôv ti vac ici ben Islel ên nêb i loc ngidu i xôn lêm. Nge, vông i la vigwe Salepat vac tibii Saidon ben ên nêb i loc vô vêxôv Saidontige ên i ngidu i xôn.

27 Nang dêc buc wê plopete Ilaisa dô ge, od xomxo wê kityax mahizihizi ge tibeac dô vac vigwe Islel, léc Ilaisa o vông he ti vô nivîha lec lêm. Nge, la vac tibii Silia ben di la vông Neman tibed vô nivîha lec.”

28 Yesu nêl bêge, mêd he wê dô vac xumac lilo mi ngô i kiyang ge, he xêyaa vô myavinê mabu vô i,

29 om he kidi lec di kô i mi la ninyawehe. Vigwe tige yêp lec kitôn ti om he kô Yesu mi la vigwe ninya wê madia ge, ên nêb ob tiyot i loc vac madia.

30 Léc Yesu la vac he mahigun di loc mi la.

*Yesu tii vimwo nipaên vêl ên xomxo ti
(Mak 1:21-28)*

31 Yesu loc mi la Kapaneam vac vigwe levac Galili, di buc sabat ge od nêl xolac vô he vac he xumac lilo.

32 Mêgem he yetac ên kiyang wê Yesu nêl ge, ên Yesu nêl kiyang hixôn xêkizêc.

33 Vac xumac lilo tige xomxo wê vimwo nipaên dô vac nilô ge ti dô hixôn, om keac vya levac ên nêbê,

34 “Yesu Nasalet, ông lam ên ông nêb ông ob vông bêna vô xe? Ông nêb ông ob kitya xe vêlê? Ên a xovô ông ên a nêbê ông ge xomxo ngibua wê Anutu vông ông lam ge.”

³⁵ Lêc Yesu keac xêkizêc ên nêbê, “Ông keacên i ma, di lop mi loc vêl ên xomxo tige.” Mêgem vimwo nipaên tige vô makikun vac xomxo tige mêd hivip i di vixog i la vac xomxo tibeac mahigun, dêc sea i di la vêl, lêc o vông xomxo tyo ninivi vô nipaên lêm.

³⁶ Mêd xomxo tibeac tige yê di yetac mabu di nêl voma ên nêbê, “Xomxo tige va nêl kiyang bêna, lêc nêl kiyang hixôn xêkizêc vô vimwo nipaên tiyi xocbê i xomxo levac ge om vimwo nipaên ngô di pec mi la vêl.”

³⁷ Mêgem xomxo vông Yesu lê vô levac vac vigwe buhu toto ge di i la tiyi myahipu.

Yesu vông Saimon Pita yen vêxta vô nivîha lec (Matyu 8:14-15; Mak 1:29-31)

³⁸ Yesu kidi vac xumac lilo di la vac Saimon Pita ben. Lêc Saimon yen vêxta vông yidac levac ngwax tum, om he nêb Yesu i loc vông i vô nivîha lec.

³⁹ Om Yesu la le kwabo vô i di piping i yidac ên nêbê, “Loc vêl.” Om yidac tip la lutibed di vêx tyo vô nivîha lec mi kidi lec, di vông yebac vô he xen yaên hixôn.

Yesu vông xomxo yidac tibeac vô nivîha lec (Matyu 8:16-17; Mak 1:32-34)

⁴⁰ Hiyôv hoo la, dêc xomxo tibeac kô lie wê yidac kehe toto ge mi la vô Yesu, om Yesu vyax vigê lec he toto di vông he vô nivîha lec.

⁴¹ Di xomxo tibeac wê vimwo nipaên dô vac he ge, vimwo nipaên tige lop mi la vêl ên he di tyuc vya levac ên nêbê, “Ông ge Anutu nu.” Lêc Yesu keac levac lec he nêbê, “Xam keacên i ma,” ên

he xovô pyap ên nêbê Yesu ge Kilisi ti wê Anutu vông i lam ge.

*Yesu la nêl xolac vac vigwe ya
(Mak 1:35-39)*

⁴² Vigwe vidiiên pitoc yang tya ge, Yesu kidi mi sea vigwe tige di la vac vigwe mahigun pileva wê xomxo maên ge. Lêc xomxo myag i, lêc mîla vô i om nêl i xôn nêb i dô hixôn he di seaên he i ma.

⁴³ Lêc Yesu nêl vô he ên nêbê, “Mêlêc a ob la nêl Anutu ben kehe kitong vô xomxo vac vigwe baba hixôn. Ên yuac ga wê Anutu vông a lam ên nêb a vông ge.”

⁴⁴ Om Yesu la nêl xolac vac Yuda xumac lilo viyang ge vihati.

5

*Yesu nêl dêc Saimon Pita hi pis tibeac
(Matyu 4:18-22; Mak 1:16-20)*

¹ Buc ti Yesu mîla le vô mia luaên Genesalet ninya, di xomxo tibeac la dô di hivun i xôn, ên nêb ob ngô Anutu xolac wê Yesu ob nêl ge.

² Mêlêc Yesu yê dipac yuu wê yêp vô mia ninya ge, lêc xomxo wê mi kô dipac ge dô lecên ma, ên he la dilipac he leac wê mi hi pis vac ge.

³ Mêd Yesu lec la lec dipac ngwe wê Saimon vông ge di nêl vô Saimon ên nêbê, “Vông dipac i du mi loc mahigun tya.” Om he vông i du mi la mahigun di Yesu dô lec dipac di nêl xolac vô xomxo wê dô kehe ge.

⁴ Yesu nêl xolac pyap, dêc nêl vô Saimon ên nêbê, “Vông dipac i loc vac gwec madia di tung leac i loc vac mia ên hi lili.”

⁵ Lêc Saimon luu i vya ên nêbê, “Xolac kehe, vihevage buc xuhu dia tiga xe vông yuac levac lec lili myagên, vivuatitôv di vigwe vidii lec, lêc xe o hi ti lêm. Lêc ga mô ông nêl om a ob lax tung leac i loc vac mia.”

⁶ Om he tung leac la, lêc lili tibeac vac leac mi i pup lec xocbê ob tax i tip ge,

⁷ om he tyuc lie dipac ngwe ên nêb he i lam kô lili hixôn he. Om he lam di he tung lili vac dipac yuu xôn mi i pup lec tiyi xocbê ob vông dipac tô mi la vac mia nilô ge.

⁸ Mêd Saimon Pita yê di la yev vixa kitu vô Yesu di nêl ên nêbê, “Apumtau, loc vêl ên a, ên a ga tibii nigpaên.”

⁹ Saimon nêl bêge, ên i hixôn lie wê dô hixôn i ge yetac mabu ên wê Yesu nêl di he hi lili tibeac ge.

¹⁰ Di Sebedi nu Jems yuu Jon wê yuu mi vông yuac lili hixôn Saimon ge, yuu yê di yetac ên êno. Mêd Yesu nêl vô Saimon ên nêbê, “Xonaên i ma. Ên timuên ge od ông obêc vông yuac bêga bê ông obêc kituc xomxo i lam vô a.”

¹¹ Mêd he soo mia mi la le kehe, pyap dêc susu vihati ge dô di he la timu vô Yesu.

Yesu vông xomxo wê kityax mahizihizi ge ti vô nivaha lec

(Matyu 8:1-4; Mak 1:40-45)

¹² Yesu la dô vac vigwe ti, lêc xomxo wê kityax mahizihizi dô lec i nivivi ma vêl ge ti yê Yesu om lam yev vixa kitu vô i di kitaa i ên nêbê, “Xomxo levac, ông obêc nêb vông a nignivi i vô nivaha

lec ge od ông tiyi wê ông ob vông i vô nôn lec ge.”

¹³ Mêgem Yesu titô vigê la vyax lec i di nêl ên nêbê, “A nêb ông vô nimviha lec.” Yesu nêl di kityax mahizihizi tige wax la vêl di i ninivi vô nivaha lec lutibed.

¹⁴ Mêgem Yesu nêl kiyang xêkizêc vô i ên nêbê, “Ông o lêc nêl kitong vô xomxo ti lêm. Di loc hîlung nimnivi mô vô xomxo wê mi si daa vô Anutu ge di vông daa i tiyi Moses xolac wê nêl ge, ên xomxo vîhati i yê di xovô bê ông nimnivi vô nivaha lec.”

¹⁵ Yesu nêl bêge lê, lêc xomxo nêl i lê vô levac la vac vigwe viyang viyang ge, om xomxo tibeac mi kituc la vô i, ên nêb ob ngô kiyang wê i nêl ge, di he nêb i vông he ninivi yidac i vô nivaha lec.

¹⁶ Lêc buc ya Yesu le sea he di la vac vigwe mahigun pileva di la kitaa.

*Yesu vông xomxo ti wê vixa len vô xêlehe ge vô nivaha lec
(Matyu 9:1-8; Mak 2:1-12)*

¹⁷ Buc ti Yesu nêl xolac vô xomxo tibeac, lêc Palisi yuu xomxo wê xovô Moses xolac gee lam vac vigwe Jêlusalem di Galili yuu Judia vîhati mi lam dô hixôn. Di xêkizêc wê Apumtau Anutu vông ge lam hivun Yesu xôn ên nêb i vông yidac i vô nivaha lec ya.

¹⁸ Mêd xomxo ya ken xomxo ti wê len vô xêlehe ge lec pêt di mîla, ên nêb ob vông i loc vô Yesu manôn ên i vông i vô nivaha lec. Lêc Yesu dô vac xumac nilô,

19 di xomxo tibeac pup lec, om môp ti o yêp wê he ob kô i mi la vô Yesu ge lêm. Om he lec xumac mi la kisii mi la dii xumac mya ti di vông xomxo tyo tô mi la hixôn pêt vac tibii tibeac mahigun di la yêp vô Yesu manôn.

20 Mêd Yesu yê wê he vông i vin ge om nêl vô xomxo tyo ên nêbê, “Lig, a kitya ông nêm nipaên vêl pyap.”

21 Mêlêc xomxo wê xovô Moses xolac gee yuu Palisi gee ngô di nêl vông ên nêbê, “Xomxo tige letya lêc so vya vô Anutu? Ên xomxo ti o tiyi wê ob kitya xomxo nêl nipaên vêl ge lêm. Nge, Anutu vaci tibeac ge wê ob kitya vêl ge.”

22 Mêd Yesu xovô kiyang wê he nêl vac nilô ge om nêl vô he ên nêbê, “Bêna lêc xam xo kiyang bêge vac nilômê?”

23 Xam xovô lê. Kiyang ngwe na wê obêc vô viyin maên ge? Kiyang wê nêbê, ‘A kitya ông nêm nipaên vêl’ ge, me kiyang wê nêbê, ‘Ông kidi lec mi loc’ ge?’

24 Mêlêc a nêb a ob vông xovôên vô xam bê a, Xomxo Nu, a xêkizêc tiyi wê a ob kitya xomxo nêl nipaên vêl gê kibun ga, om xam lêc wê.” Mêdêc Yesu nêl vô xomxo tyo wê len vô xêlehe ge ên nêbê, “A nêl vô ông bê ông kidi lec mi hôm ông guhu lec di lôc bom.”

25 Mêdec lutibeac xomxo tyo kidi lec vac he mahigun di hôm

i guhu lec di la ben hixôn nilô pimilên.

26 Mêgem xomxo gee vihati yê di yetac mabu, di he pimil Anutu hixôn nilô yetacên di nêl vông

ên nêbê, “Gwêbaga il xê mad lec do nivîha vîyonên ti.”

*Yesu keac Livai la hixôn i
(Matyu 9:9-13; Mak 2:13-17)*

²⁷ Yesu la, lêc mîla yê xomxo ti lê nêbê Livai wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Kidi mi lam hixôn a.”

²⁸ Mêgem Livai kidi lec di sea i yuac yuu susu vîhati dô xel di la timu vô Yesu vîxa mi he la.

²⁹ Mêd Livai myêl vizid levac vô Yesu vac ben, di xomxo wê mi kô takis gee hixôn xomxo yaya la dô hixôn yuu mi he ya.

³⁰ Lêc he Palisi hixôn he lie wê xovô Moses xolac gee yê tiyiên ma, om nêl vô Yesu nue ngîvîhi ên nêbê, “Bêna lêc xam la wa di num hixôn tibii wê mi kô mone takis gee yuu tibii nîpaênê?”

³¹ Mêd Yesu ngô wê he nêl bêge, om nêl vô he ên nêbê, “Xomxo nivîha obêc la vô docta lêm. Nge, tibii yîdac ge wê obêc la vô docta.

³² Om a ob nêl vô xam bê a o lam ên a nêb a ob tyuc xomxo nivîha lêm. Nge, a lam ên tibii nîpaên, ên a nêb he i pilepac he.”

*Kîyang lec môp tikwê yuu paha
(Matyu 9:14-17; Mak 2:18-22)*

³³ Mêd he nêl vô Yesu ên nêbê, “Jon nue ngîvîhi mi ngîbua yaên di mi kîtaa tiyi buc vîhati, di Palisi nue ngîvîhi mi vông bêge êno. Mêd ông va ge, nume ngîvîhi mi ya di mi num di o ngîbua lêm.”

³⁴ Mêlêc Yesu nêl vô he ên nêbê, “Buc ti wê tibii viyang ti lie ti obêc ii vêx ti lêc gên dô hixôn he ge, od he obêc ngibua yaên, me? Maê.

³⁵ Lêc obêc buc timuên wê tibii ob kô li tige vêl ên he ge, od ge wê he obêc dô hixôn viyin di ngibua yaên.”

³⁶ Mêd Yesu nêl kiyang pilepacên ti vô he bêga ên nêbê, “Xomxo ti nên ngakwi obêc tip ge, od obêc kiping ngakwi paha myahipu ti vêl mi la duu lec tikwê lêm. Ên obêc vông bêge ge od obêc vông ngakwi paha vô nipaên, di myahipu paha tige obêc la tiyi ngakwi tikwê lêm.

³⁷ Di kiyang ngwe, xomxo ti obêc too mia wain paha vac bwoc ninivi tikwê lêm. Ên obêc too vac ge od wain obêc vuac di tax ninivi tikwê tip di wain too la.

³⁸ Om wain paha ge, xomxo i too vac bwoc ninivi paha.

³⁹ Di xomxo wê num wain tikwê ge obêc nêb num wain paha nang lêm, ên he nêl ên he nêbê wain tikwê nyen nivaha luu vêl.”

6

Yesu nêl kiyang lec môp sabat (Matyu 12:1-8; Mak 2:23-28)

¹ Vô buc sabat ti, Yesu he nue ngivihî la vô môp wê la vac yuac yaên ge ti. Mêd he mila lê, lêc nue ngivihî le yul wit nôn wê tiyi xochê pidi nôn ge di hîlii ninivi la vêl di ya nôn.

² Lêc Palisi ya yê di nêl vô he ên nêbê, “Gwêbaga buc sabat wê Moses xolac ngibua nêb

il ob vông yuac ti lec lêm ge, lêc bêna lêc xam vông yuac lecê?”

³ Lêc Yesu luu he vya bêga ên nêbê, “Môp wê bug Devit vông ilage, xam kitong, me xam lungên? Ên Devit he lie dô lê, lêc vip den he,

⁴ om Devit la vac Anutu xumac ngibua di la hôm blet ti wê he tung vô Anutu manôn ge. Blet tige, xomxo pileva o tîyi wê ob ya ge lêm. Nge, xomxo wê mi si daa vô Anutu ge, heche va ob ya. Lêc Devit kô mi lax ya dêc vông mi lie ya hixôn. Lêc Devit o vông i so lêm, ên xomxo wê mi si daa ge vaci vông mi i ya.”

⁵ Di Yesu nêl hixôn vô he ên nêbê, “Om xam xovô bê a, Xomxo Nu, a tu buc sabat kehe hixôn.”

*Yesu vông xomxo wê vigê nipaên ge ti vô nivîha lec vô buc sabat
(Matyu 12:9-14; Mak 3:1-6)*

⁶ Mêd sabat timuên ngwe Yesu la vac Yuda xumac lilo mi la nêl xolac vô he. Lêc yê xomxo wê vigê hiyôv len yuu kilôhô xêlehe ge ti dô hixôn he.

⁷ Lêc Yuda wê xovô Moses xolac gee hixôn he Palisi dô di yê Yesu xôn ên nêb ob yê bêc obêc vông xomxo tige vô nivîha lec vô sabat ge od he ob vông kiyang vô i.

⁸ Lêc Yesu xovô he nilô ge om nêl vô xomxo vigê nipaên tige ên nêbê, “Kidi mi lam le mahîgun tinê.” Mêgem xomxo tyo kidi lec mi la le vac he mahîgun.

⁹ Om Yesu nêl vô he vîhati ên nêbê, “A ob kinêg vô xam bê xolac wê il Yuda vông ge, nêb il vông bêna lec sabatê? Nêb il vông nivîha me nêb il

vông nipaên? Om il ob vông xomxo i vô nivihã, me il ob vông he i vô nipaên xel lec sabat?”

¹⁰ Mêd Yesu vô yê yê he vihati di nêl vô xomxo vigê nipaên tige ên nêbê, “Titô vigêm.” Mêd xomxo tyo titô vigê, lêc vigê vô nivihã lec.

¹¹ Om xomxo wê xovô Moses xolac gee yuu Palisi, he xêyaa vô myavinê mabu di he nêl voma ên nêbê, “Om il ob vông bêna vô Yesu?”

*Yesu vînoo aposolo vigê yuu di tô mi la yuu
(Matyu 10:1-4; Mak 3:13-19)*

¹² Vô buc tige Yesu la lec kitôn ti ên nêb ob la kitaa vô Anutu, om bucên tige yadiluhu Yesu kitaa vivuatitôv mi dô di vigwe vidii lec.

¹³ Vigwe vidii mêd Yesu tyuc nue ngivihã vihati lam vô i mêd vînoo he vigê yuu di tô mi la yuu wê ob kô lê aposolo ge.

¹⁴ Om he lê bêga, Saimon, wê Yesu nêl lê ngwe nêbê Pita, di Pita li Andlu, di Jems yuu Jon, di Pilip yuu Batolomyu,

¹⁵ di Matyu yuu Tomas, di Jems ngwe wê ma Alpias ge, di Saimon Selot,

¹⁶ di Judas wê ma Jems ge di Judas Iskaliot wê obêc hîlung Yesu vô tibii vevac timuên ge.

*Yesu vông xomxo tibeac vô nivihã lec
(Matyu 4:23-25)*

¹⁷ Pyap dêc Yesu he nue ngivihã sea kitôn tyo di lop mi lôm tô lec vigwe hibuhu ngwe. Di xomxo wê mi timu vô Yesu gee hixôn xomxo Judia vigwe nipwopwo hixôn vigwe levac Jelusalem, di Taia yuu Saidon wê yêp kwabo vô gwec ninya ge, he tibeac val kitucma mi dô,

18 ên he nêb he ob ngô Yesu kiyang, di he wê yidac ge nêb Yesu i vông he ninivi i vô nivîha lec. Di xomxo wê vimwo nîpân vông he vô nîpân ge, Yesu tii vimwo vêl ên he di vông he vô nivîha lec.

19 Mêgem xomxo gee vîhati nêb obêc hôm lec Yesu ninivi, ên he yê wê xêkizêc wê Yesu vông ge la vông xomxo tîbeac vô nivîha lec ge.

*Kiyang xêyaa nivîha yuu kiyang viyin
(Matyu 5:1-12)*

20 Mêd Yesu yê ma la nue ngivîhi di nêl vô he ên nêbê,

“Xam wê xam xo ên xam nêbê xam o nivîha lêm ge, xam xêmyaa i nivîha, ên xam tu Anutu nue pyap.

21 “Xam wê vip den xam ge, xam xêmyaa i nivîha, ên timuên ge od xam obêc wa i den xam.

“Di xam wê xam nîlôm viyin di xam byag gwêbaga ge, xam nîlôm i vô nivîha, ên xam obêc nap hixôn xêmyaa nivîha timuên.

22 Buc wê xomxo obêc yê xam nîpân ên wê xam vông i vin Xomxo Nu ge di obêc tii xam di nêl kiyang nîpân lec xam di so vya vô xam ên nêb xam tibii nîpân ge od xam nîlôm i nivîha.

23 Om buc wê he obêc vông bêge vô xam ge od xam pimil di xêmyaa i vô nivîha lee, ên nôn nivîha wê xam obêc kô ge yêp vac Anutu ben lag puunê. Mốp bêge wê he bue vông vô plopete ilage êno.

24 “Dom xam wê mone levac yuu susu tîbeac ge, xam xona nêb, ên xam kô susu nivîha mi dô hixôn xêmyaa nivîha pyap, om xam obêc kô nivîha ti timuên nang lêm.

25 “Đi xam wê xam wa i den ge, xam xona nê, ên vip obêc den xam timuên.

“Đi xam wê xam nap mi dô gwêbaga, xam xona nê, ên xam obêc byag di dô hixôn nilôm viyin timuên.

26 “Om xomxo viyang viyang obêc pimil xam ge, od xam xona nê, ên he bue vông bêge vô plopete kityoên ilage êno mêgê.”

Il xêdyaa i vin lec xomxo wê vông vevac vô il ge

(Matyu 5:38-48)

27 Yesu nêl vô he ên nêbê, “A ob nêl vô xam wê xam ngô a kiyang ga bêga bê xam xêmyaa i vin lec xomxo wê vông vevac vô xam ge, di xam vông nivîha vô xomxo wê he xêyaa vô nîpaên vô xam ge.

28 Di xam kitaa lec xomxo wê nêl vya vô xam ge, di xam kitaa vô Anutu bê i vông nivîha vô xomxo wê so vya vô xam ge.

29 Xomxo ti obêc pitap ông lia vilu ge od ông vông viluo hixôn vô i, di xomxo ti obêc kô ông saket ge od ông o léc kol siot lêm. Nge, ông vông vô i hixôn.

30 Di xomxo ti obêc kitaa susu ti vô ông ge od ông vông vô i, di xomxo ti obêc kô ông nêl susu ti mi la ge od le i léc kidu bê i vông i lôm vô ông lêm.

31 Môt nivîha wê xam nêb xomxo i vông vô xam ge, od xam vông nivîha vô he êno bêge.

32 “Ên xam xêmyaa obêc vin lec xomxo wê xêyaa vin lec xam ge vaci di xêmyaa o vin lec xomxo baba hixôn lêm ge od xam ob kô pimilên

niviha lec môp tibêge tibêna? Ên tibii nipaên xêyaa vin lec xomxo wê xêyaa vin lec he ge êno.

³³ Dî xam obêc vông niviha vô xomxo wê vông niviha vô xam ge vaci ge od xam ob kô pimilên niviha lec môp tibêge tibêna? Ên tibii nipaên êno mi vông môp tibêge.

³⁴ Dî xam obêc vông susu pileva vô xomxo lêc xam nêb he i vông myaviwen vac ge od xam ob kô pimilên niviha lec môp tibêge tibêna? Ên tibii nipaên mi vông susu pileva vô xomxo nêb he i vông myaviwen vac êno mêgê.

³⁵ Om a ob nêl vô xam bê xam xêmyaa i vin lec xomxo wê vông vevac vô xam ge dî vông niviha vô he, dî xam vông susu vô xomxo dî le i lêc xo bê he i vông myaviwen vac vô xam lêm. Xam obêc vông bêge ge od xam ob kô nôn niviha luu vêl timuên dî xam ob tu Anutu lag puunê nue. Ên Anutu ge wê vông niviha vô tibii nipaên wê o mi pimil i lêm ge.

³⁶ Mêgem xam êno xo vigwe pisiv ên xomxo dî vông niviha vô he i tîyi xochê Mag Anutu xo vigwe pisiv ên il ge.”

*Kiyang wê ob yaxên xomxo ge
(Matyu 7:1-5)*

³⁷ Yesu nêl vô he ên nêbê, “Xam o lêc yaxên xomxo nên kiyang lêm, êdêc Anutu i yaxên xam nêm kiyang êno lêm. Dî xam o lêc nêl vyam nipaên lec xomxo bê he i kô myaviwen nipaên lêm, êdêc Anutu i nêl vya nipaên lec xam lêm. Dî xam piwelac kiyang nipaên wê xomxo vông ge vêl êdêc Anutu i piwelac vêl ên xam êno.

38 Om xam vông susu vô xomxo lê, êdêc Anutu i vông vô xam êno. Ên Anutu obêc vông tibeac vô xam tiyi xocbê ob vông vac xam sepac mi i pup lec dêc kitiv i tô mi la, dêc kipyax ya lec hixôn mi i pup lec di kipyax sea ge. Ên môp wê xam vông vô xomxo ge od Anutu obêc vông i tiyi wê xam vông vô he ge vô xam.”

39 Mêgem Yesu nêl kiyang pilepacên ti vô he bêga ên nêbê, “Xomxo manôn tocên ngwe o tiyi wê ob didii xomxo ma tocên ngwe ge lêm. Ên ge od yuu xôn ob la tô madia.

40 Di nipwo xumac xulacên ti ob luu ma wê tixuu he ge vêl lêm. Lêc he obêc kô xovôên nivîha vac xumac kîpîhac mi la tiyôo lec myahîpu ge od he obêc tiyi xocbê ma wê tixuu he ge.

41 “Om ông ge, bêna lêc ông wê xax mavigen wê le vac lim manôn ge di lungên levac mabu ngwe wê le vac ôcông va mamnôn ge?

42 Bêna lêc ông ob nêl vô lim bê, ‘Lige, a ob vông xax mavigen wê le vac ông mamnôn ge vêl,’ dom dilungên levac ngwe wê le vac ôcông va mamnôn ge? Ông xomxo kityooên, ông pul xax levac wê le vac ôcông va mamnôn ge vêl tax di mamnôn i seac nivîha lê, êdêc pul nipwo tya wê le vac lim manôn ge vêl.”

Kiyang pilepacên lec xax nôn nivîha yuu ni-paên

(Matyu 7:16-20; Matyu 12:33-35)

⁴³ Yesu nêl nang ên nêbê, “Xax nivihâ ti obêc vuac nôn nipaên lêm, di xax nipaên obêc vuac nôn nivihâ lêm.

⁴⁴ Xax vihati ge il ob xovô lec nôn toto. Ên xomxo ob yul hîguc nôn lec hîzap yatôv lêm, di xomxo ob yul vîyodac nôn lec kîpomac yatôv lêm.

⁴⁵ Di il xomxo tiyi lec bêge. Ên xomxo wê piyôp nivihâ yêp vac he nîlô ge od ob vông môm nivihâ, di xomxo wê nipaên yêp vac he nîlô ge od mi vông môm nipaên. Ên kiyang yuu xovôên wê pup vac xomxo nîlô ge, xomxo mya nêl i lam seac.

*Kiyang pilepacên lec xumac yuu
(Matyu 7:24-27)*

⁴⁶ “Bêna lêc xam nêl a ên xam nêbê, ‘Apumtau, apumtau,’ lêc xam o vông a vyag wê a nêl vô xam ge vô nôn lec lêmê?

⁴⁷ Xomxo wê lam vô a mi lam ngô a kiyang di vông a vyag vô nôn lec ge, a ob nêl he kîtong vô xam.

⁴⁸ He tiyi xocbê xomxo ti nêb ob lox xumac om yev lôva madia ta dêc hoo teac vac dêc tung ngidax la nêb ngidax i hôm teac xôn, dêc lox xumac lec, lêc lun val om mia butac mabu, lêc xumac tige o kîpê lêm, ên xomxo tige lox i xumac xêkizêc ta.

⁴⁹ Lêc xomxo wê ngô a kiyang lê, lêc o vông i vô nôn lec lêm ge, ge tiyi xocbê xomxo ti lox xumac lec kibun pileva di o yev hîpu la vac kibun lêm, om mia butac mi val mabu ge od dii i nên xumac sea.”

7

Yesu vông Lom tibii vevac ti nu yuac ti vô nivihha lec
(Matyu 8:5-13)

¹ Yesu nêl kiyang vîhati mi xomxo ngô, pyap di i loc mi la vigwe Kapaneam.

² Mêd Lom tibii vevac levac ti dô vac vigwe tige, lêc i nu yuac ti vông yidac levac tiyi wê ob yib ge. Tibii vevac tyo xêyaa vin lec nu yuac tige,

³ lêc ngô wê Yesu val vigwe tige, om vông Yuda levac ya la vô Yesu ên nêb he i loc nêl vô Yesu ên i lam vông nu yuac tyo i vô nivihha lec.

⁴ Om he mîla vô Yesu dêc mîla kitaa i xêkizêc ên nêbê, “Vô ninyam lehe vô tibii vevac tiganê vya, ên i ge xomxo nivihha,

⁵ wê xêyaa vin lec il Yuda di i lox il xumac lîlo ge.”

⁶ Mêd Yesu ngô he vya di la hixôn he mi he la, mêd he mîla kwabo vô tibii vevac tyo ben, lêc tibii tyo vông lie ya lam nêl i vya vô Yesu bêga ên nêbê, “Xomxo levac, a xomxo nigpaên, om ông o tiyi wê ông ob vac lam vac a bog xumac lôma ge lêm,

⁷ om a xovô ên a nêb a ob loc le vô ông mamnôn lêm. Lêc a nêb ông le teva di vyam pileva i nêl, ên a nug i vô nivihha lec.

⁸ A xovô bêge, ên a ga êno wê a la vac xomxo levac vilu kwa ngibi, di a nuge vevac ge wê la vac a kwa ngibi. Om a obêc nêl vô he ti bê i loc ge od ob la, di a obêc nêl vô ti bê i lam ge od ob lam, di a obêc nêl vô a nug yuac ti bê i vông yuac tige ge od ob vông. Om a xovô ên a nêbê ông ge

xomxo xêkizêc om ông obêc le teva di nêl ge od a nug ge ob vô nivaha lec.”

⁹ Yesu ngô kiyang wê xomxo tige nêl hixôn vông vinên ge om yetac ên di pop manôn lax vô xomxo tibeac wê ditimu vô i vixa ge di nêl vô he ên nêbê, “Xame, a ob nêl vô xam bê a o xê Islel ti vông i vin xêkizêc tiyi xochê tibii tiga vông ge lêm.”

¹⁰ Om xomxo wê tibii levac tige vông he la ge lax mi la tibii levac tyo ben, lêc milax yê wê nu yuac tyo vô nivaha lec ge.

Yesu tîpi vô vêxôv ti nu kidi lec maviha

¹¹ Nang dêc buc ti lêc Yesu la vigwe Nen, di nue ngîvihi hixôn xomxo tibeac hiwocên la hixôn.

¹² Mêd Yesu mila kwabo vô vuayen wê ob la vac viyangtôv ge, lêc xomxo ken xomxo yibên ti mi val ên nêb ob kô mi la yev. Vêx vêxôv ti nu tived tige, om xomxo viyang tige tibeac lam hixôn i.

¹³ Mêd Apumtau Yesu yê vêx tige di xo vigwe pisiv ên i om nêl vô i ên nêbê, “Byagên i ma.”

¹⁴ Mêd la vyax vigê lec pêt wê yibên yêp lec ge di xomxo wê ken ge le, dêc Yesu nêl vô yibên tyo ên nêbê, “Nug, a nêl vô ông bê ông kidi lec.”

¹⁵ Om yibên tyo kidi lec mi dô di keac vô he, dêc Yesu vông i lax vô ta.

¹⁶ Mêgem xomxo tige yê di xona mabu, di pimil Anutu ên nêbê, “Il nêd plopete levac ti kidi vac il mahigun ga mê.” Di he ya nêbê, “Gwêbaga Anutu val le seac vô il madnôn ên nêb ob hôm il wê il tu ixê ge lec.”

17 Mêd xomxo nêl Yesu lê kitong mi i vô levac mi la vac vigwe Judia vihati di la vac vigwe ninya ninya hixôn.

*Jon Lipacên vông nue ngivihî la kinêg Yesu kehe
(Matyu 11:2-19)*

18 Mêd Jon Lipacên nue ngivihî lax mi la nêl Yesu do levac wê vông ge kitong vô Jon,

19 om Jon keac nue ngivihî yuu lam vô i di nêl vô yuu nêbê yuu i loc vô Apumtau Yesu ên loc kinêg vô i bê, “Xomxo ti wê plopete ilage nêl ên nêb obêc val ge, ông xomxo tyo tiga mê, me xe ob dô bin xomxo ngwe?”

20 Mêgem yuu mîla vô Yesu di la nêl vô i ên nêbê, “Jon Lipacên vông xii lam ên nêb xii lam kinêg ông bê xomxo ti wê plopete ilage nêl ên nêb obêc val ge, ông xomxo tyo tiga mê, me xe ob dô bin xomxo ngwe lê?”

21 Vô buc tya ge Yesu dô di vông xomxo yidac kehe toto tibeac vô nivîha lec di tii vimwo nîpân vêl ên xomxo tibeac, di vông xomxo wê manôn tocên ge, manôn seac.

22 Mêgem Yesu nêl vô yuu ên nêbê, “Muu lôc mi loc di nêl môp wê muu ngô yuu wê ge kitong vô Jon bê xomxo manôn tocên, manôn seac, di xomxo vîxa nîpân, vîxa vô nivîha lec mi he la nivîha, di xomxo wê kityax mahîzîhîzi ge, kityax yôv di he vô nivîha lec, di xomxo wê nînya vô kitu ge, ngô kiyang, di xomxo yîbên kîdi lec mavîha tîi vac nang, di xomxo wê nêl susu maên gee ngô xolac nivîha.

23 Xomxo wê nilô o vông yuu lec a lêm ge wê obêc dô hixôn xêyaa nivîha.”

24 Jon nue ngivîhi yuu ge lax mi la vêl, dêc Yesu nêl Jon kehe kitong vô xomxo tigeê ên nêbê, “Ilage wê xam la vô Jon vac vigwe mahigun pileva ge, xam nêb xam ob la wê va? Xam nêb xam ob la ên la wê duvac wê lea kilê i la di i hivip lec nang ge, me?

25 Xam la ên xam nêb xam ob la wê vatya? Xam nêb xam ob la wê xomxo wê vinyum ngakwi nivîhaviha ge ti, me? Lêc xomxo wê vinyum ngakwi paha wê nivîha ge wê mi dô vac king ben.

26 Xam la ên xam nêb xam ob la wê plopete ti? Vixôhilôg, a nêl vô xam bê i plopete ti, lêc luu plopete vîhati vêl.

27 Ên Anutu nêl Jon kitong mi i yêp vac kipihac xolac bêga ên nêbê, ‘Ngô lê, a ob vông xomxo ti i kê a kiyang mi loc mug ông nêb môp, ên i viac môp wê ông obêc mîla vac ge.’

28 Anutu kiyang bêge, di a ob nêl vô xam bê Jon ge xomxo levac luu xomxo kibun ga vîhati vêl. Vixôhilôg, lêcom xomxo vîhati wê vô nipwo lec vac Anutu ben ge obêc luu Jon vêl.”

29 Mêd xomxo wê mi kê takis gee hixôn xomxo vîhati, he ngô Yesu kiyang tige di vô nînya lehe vô ên nêbê Anutu môp ge nivîha, ên ilage he pilepac he di Jon lipac he.

30 Lêc Palisi yuu xomxo wê xovô Moses xolac gee, he vô nîmi vô Anutu môp nivîha wê hilung vô he ge, om he nêb Jon i o lêc lipac he lêm.

³¹ Mêd Yesu nêl nang ên nêbê, “Xomxo buc gwêbaga, he va bêna? A ob tixuu he môp lec kiyang ti.

³² He tiyi xocbê nue nipwo wê dô lec wetôv di tyucma ên nêbê, ‘Xame, xe hi vyang léc xam o yoo lêm, nang di xe vông tilôt lê, léc xam o byag lêm.’ He môp tiyi xocbê môp wê xam nêl vô xii Jon ge,

³³ ên Jon Lipacên val, léc mi ngibua yaên di numên wain ma, lêcom xam nêl ên xam nêbê vimwo nipaên dô vac i nilô.

³⁴ Nang dêc a, Xomxo Nu, a val léc a mi xa di num vô, di a o ngibua ti lêm, léc xam nêl ên xam nêbê, ‘Wê lê. Xomxo tige va mi ya levac di mi num wain levac mi vô mavmay, di mi dô hixôn xomxo wê mi kê takis léc mi vun mangwe ge yuu tibii nipaên.’

³⁵ Xam mi nêl bêge, lêcom a ob nêl vô xam bê xomxo wê timu vô piyôp nivihã di kê xovôên vô Anutu ge, he nêl ên nêbê xovôên wê Anutu vông ge nôn vixôhilôg.”

Vêx nipaên ti lipac wel nivivea lec Yesu vixa

³⁶ Palisi ti lê nêbê Saimon nêl vô Yesu ên nêb i loc vac i ben ên yuu ob ya. Om Yesu la vac i ben di yuu dô di ya.

³⁷ Mêd vêx nipaên ti wê mi dô vac vigwe tige ngô wê Yesu la dô vac Palisi tyo ben di la ya hixôn i ge, om kê butol nivihã ti wê wel nivivea le vac di la vac Palisi tyo ben,

³⁸ di la le kwabo vô Yesu vixa di byag mi dô, di maluc yuc lec Yesu vixa pitehe. Om vêx tyo kitya

maluc ya bazub lihi, di hiwaa Yesu vixa pitehe di lipac wel nivivea tyo lec Yesu vixa.

³⁹ Mêd Palisi ti wê nêl Yesu lam vac i ben tige yê môm wê vêx tyo vông ge, om xo bêga ên nêbê, “Xomxo tige obêc plopete ti vixôhîlôg ge od obêc xovô vêx tige wê lam hôm vigê lec i ge di obêc xovô i môm wê mi vông ge bê i vêx nipaên ti.”

⁴⁰ Mêd Yesu nêl vô Palisi tyo ên nêbê, “Saimon, a ob nêl kiyang ti vô ông.” Mêd Saimon nêl lax vô ên nêbê, “Om ông nêl kiyang ti wê ông ob nêl ge.”

⁴¹ Om Yesu nêl ên nêbê, “Xomxo yuu la kô mone vô xomxo ti, ngwe kô mone yul ti (K100) di ngwe kô mone kipihac ti (K10). Om yuu xôn myaviwen yêp vô xomxo tige.

⁴² Lêcom yuu xôn o tiyi wê yuu ob lax hi myaviwen vêl ge lêm, om xomxo tyo vaci hi yuu myaviwen vêl. Om a ob kinêg vô ông bê xomxo yuu ge, ngwe na xêyaa ob vin lec xomxo tyo luu vêlê?”

⁴³ Mêd Saimon nêl ên nêbê, “Mêd obêc ngwe wê i myaviwen levac ge.” Mêd Yesu nêl vô i ên nêbê, “Ông nêl lec bôbac.”

⁴⁴ Mêd Yesu pilepac i vô vêx tige di nêl vô Saimon ên nêbê, “Om wê vêx tiga. A lam dô vac ông bom ga lê, lêc ông o timu vô môm wê il Yuda mi vông ge lêm di vông mia ên a lipac vixag vac lêm. Dom vêx tiga lipac a vixag ya maluc di kitya vêl ya bazub lihi.

⁴⁵ Di buc wê a lam vac ông bom ga ge, od ông o pul a vigêg di hôm a lec nivîha lêm. Dom vêx tige val lê, lêc hôm a lec nivîha di le hiwaa a vixag.

46 Di ông o lipac wel lec a bagzub lêm. Dom vêx tiga val lipac wel nivivea lec a vixag.

47 Om a ob nêl vô ông bê vêx tiga xêyaa vin lec a luu vêl om nêl i kitong ên nêbê i nêl nipaên tibeac lê, lêc Anutu kitya vihati vêl om i xêyaa vin lec a luu vêl. Lêc xomxo ngwe wê Anutu kitya i nêl nipaên yuutyabed vêl ge od xêyaa obêc vin lec Anutu nipwo tya.”

48 Mêd Yesu nêl vô vêx tyo ên nêbê, “A nêl vô ông bê a kitya ông nêl nipaên vêl pyap.”

49 Mêd xomxo wê dô mi ya hixôn Yesu gee xo bêga ên nêbê, “Xomxo tige letya lêc kitya xomxo nêl nipaên vêlê?”

50 Mêd Yesu nêl vô vêx tyo ên nêbê, “Vông vinên wê ông vông ge, ge wê kitya ông nêl nipaên vêl di vông ông vô nimviha lec. Om ông lôc hixôn xêmyaa nivîha.”

8

Vêx wê mi la hixôn Yesu gee

1 Nang dêc Yesu he nue ngivîhi vigê yuu di tô mi la yuu tup vac vigwe levac yuu nipwo toto, di Yesu nêl Anutu ben kehe kitong vô xomxo.

2 Mêd vêx ya mi la hixôn Yesu he nue ngivîhi ên nêb ob viac he. Vêx tige wê ilage Yesu tii vimwo nipaên vêl ên mangwe di vông he mangwe yidac kehe toto ge vô nivîha lec. Om he lê bêga, Malia Makdala ti wê Yesu tii vimwo nipaên vigê vilu di sec yuu la vêl ên i ge,

3 di Joana wê liya Susa mi viac King Helot xumac ge, di ti lê Susana, di vêx tibeac yaya hixôn. Om vêx tige wê viac Yesu he nue ngivîhi

ya he mone di ngidu he xôn ên yuac wê he vông ge.

Kiyang pilepacên lec xomxo ti wê liloo vê vac yuac ge

(Matyu 13:1-9; Mak 4:1-9)

⁴ Om buc ti léc xomxo tibeac vac vîgwe toto toto ge kituc la vô Yesu, mêgem Yesu nêl kiyang pilepacên ti vô he bêga ên nêbê,

⁵ “Xomxo ti kidi mi la ên nêb ob la liloo ngec vê vac yuac. Om liloo i la lê, léc vê mangwe tô vac môp om xomxo kê di menac lam ya.

⁶ Di ya tô lec ngidax wê kibun nipwo tya dô lec ge, om tyip lutibed léc kibun niluc ma om hiyôv ya i vilôvac di i yib.

⁷ Di mangwe tô mi la dô vac hîvu kehe om hîvu tyip hixôn di hi i yib.

⁸ Di mangwe tô mi la dô vac kibun nivîha om tyip nivîha di vuac nôn nivîha 100 100 tiyi kehe toto ge.” Yesu nêl bêge vô he dêc nêl ên nêbê, “Xomxo ti nînya obêc yêp ge od i ngô di xovô.”

Yesu nêl kiyang pilepacên kehe kitong

(Matyu 13:10-23; Mak 4:10-20)

⁹ Mêd Yesu nue ngivîhi kinêg kiyang pilepacên tige kehe vô Yesu.

¹⁰ Om Yesu nêl vô he ên nêbê, “Kiyang lec Anutu môp yuu ben ge yêp xôpacên lê, léc Anutu nêb ob hîlung kehe vô xam ên xam xovô. Di xomxo baba ge ngô kiyang tiyi xochê kiyang pilepacên pileva, om he yê lê, léc yêvôên nôn ti ma, di he ngô kiyang lê, léc xovôên kehe ma.

¹¹ “Kiyang pilepacên tyo kehe bêga nêbê vê ge Anutu kiyang.

12 Di vê wê tô vac môp ge, ge tiyi xocbê xomxo ngô Anutu kiyang lê, lêc lutibed Seten lam vô vêl ên he nilô, ên nêb he i o lêc vông i vin Anutu di i vô he vêl ên nipaên lêm.

13 Di vê wê tô mi la dô lec ngidax wê kibun nipwo tya dô lec ge, ge tiyi xocbê xomxo ngô xolac di vông i vin lutibed hixôn xêyaa nivihax tya, lêc he tiyi xocbê ngec wê ngilôhông maên ge, ên he vông i vin nipwo tya lêc Seten yaxên he ge od he sea vông vinên lutibed.

14 Di vê wê tô mi la dô vac hivu kehe ge, ge tiyi xocbê xomxo ngô xolac mi dô lê, lêc he nilô xovô susu nivihaviha kibun ga yuu mone hixôn viyin ya wê ob tulec he ge om hivun xolac xôn di nôn ma.

15 Di vê wê tô mi la dô vac kibun nivihax ge, ge tiyi xocbê xomxo wê ngô xolac mi xovô di hông pilihi hixôn nilô yuu xovôên nivihax, om he le xêkizêc ta di vô nôn tibeac.

*Kiyang pilepacên lec lam
(Mak 4:21-25)*

16 “Xomxo ti obêc byêx ngwax vac lam ge od ob lax dêg lec me vun vac pêt ngibi lêm. Nge, ob yu i yux seac ên xomxo wê ob lam vac xumac nilô ge, he i lam yê xêseac.

17 Ên kiyang vihati wê yêp xôpacên ge obêc lam le seac, di kiyang vihati wê yêp vac nilô ge obêc hivelac lec mi nôn lam le seac.

18 “Mêgem kiyang wê xam ngô ge, xam vyac xovô nivihax lê. Ên xomxo wê xovô kiyang mi hông pilihi ge od Anutu obêc kipyax tibeac lec hixôn vô i. Lêc xomxo wê o xovô kiyang mi hông

pilihi lêm ge od nipwo tya wê dô vô i ge, Anutu obêc vô vêl.”

Yesu tae lie

(Matyu 12:46-50; Mak 3:31-35)

¹⁹ Yesu tae lie val ên nêb ob la vô Yesu, lêc tiyiên ma ên tibii tibeac kitucma om kisuu Yesu lec.

²⁰ Om xomxo ya nêl vô Yesu ên nêbê, “Tame lime val le vixun ên nêb ob yê ông.”

²¹ Lêc Yesu nêl vô he ên nêbê, “Xomxo wê ngô Anutu xolac di vông i vô nôn lec ge, ge wê tu a tage lige ge.”

Yesu nêl om lea viyiiên tip la

(Matyu 8:23-27; Mak 4:35-41)

²² Buc ti lê lêc Yesu he nue ngivihî lec dipac ti di Yesu nêl vô he ên nêbê, “Il ob la mia luaên vilu ganê.”

²³ Om he la lê, lêc Yesu yêp mêd lea viyiiên mabu ti val om vông mia vuac mabu tiyi wê ob pup lec dipac di kipyax he la vac mia ge.

²⁴ Om nue ngivihî la tîpi vô Yesu di nêl ên nêbê, “Xomxo levac, il ob la xib ga.” Om Yesu

kidi lec di piping lea yuu mia vuacên di i tip la di mia vô malêhe lec.

²⁵ Mêgem Yesu nêl vô nue ngivihî ên nêbê, “Xam vông vinên tyo nôn tina?” Mêgem he xona di yetac mabu di nêl vôma ên nêbê, “Xomxo tiga letya lêc nêl vya lec lea yuu mia di i vô nînya lehe vô i di tip la lutibedê?”

Yesu tîi vimwo nîpaên vêl ên xomxo ti

(Matyu 8:28-34; Mak 5:1-20)

²⁶ Yesu he nue ngivihi loc mi la tibii Gegesa ben wê yêp mia luaên vilu ganê ge di Galili ge yêp mia vilu.

²⁷ He mila lop vêl ên dipac di xomxo ti vac vigwe tige val vô Yesu. Vux tige vimwo nipaên dô vac i nilô mi vông i piyôp vô yacyac om buc mahigun dia tige o mi vinyum vinyumên ti lêm, di sea ben viyangtôv yuu xumac wê ob yêp vac ge di la mi yêp vac vigwe wê xomxo yev yibên vac ge.

²⁸⁻²⁹ Om xomxo mi ku i vigê yuu vixa xôn ya sen di yê i xôn mi dô lê, léc buc tibeac vimwo nipaên ngigax i xêkizêc di tax sen tip sea di kô i mi la vac vigwe myadongên. Mêd xomxo tyo yê Yesu di la yev vixa vô i, di Yesu piping vimwo nipaên nêb i loc vêl ên xomxo tyo. Om xomxo tyo iac mabu di nêl ên nêbê, “Yesu, ông ge Anutu lag puunê nu ông, lêcom ông ob vô va vô a? A kitaa ông bê ông o léc vông a vô nipaên lêm.”

³⁰ Mêd Yesu kinêg vô i ên nêbê, “Ông lêm le?” Léc tyo nêl ên nêbê, “A lêg kehe nêbê kidu levac.” Nêl lê bêge, ên vimwo nipaên tibeac dô vac i nilô.

³¹ Mêd vimwo nipaên tigeê kitaa Yesu ên nêbê, “Ông o léc tii xe la vac Seten ben nipaên lêm.”

³² Bwoc kidu levac diya mi le lec kitôn tige, om vimwo nipaên tigeê kitaa Yesu ên nêb i vông he la dô vac. Om Yesu tyuc lec,

³³ di vimwo nipaên tigeê lam la vêl ên xomxo tyo di la dô vac bwoc tyoe nilô, mêd bwoc tyoe tup mi la di la vac vigwe madia di la tô vac mia luaên di num mia mi yib mîma vêl.

34 Mêd xomxo wê mi viac bwoc tyoe ge yê wê bwoc la yib mîma vêl ge, om pec mi la, di mîla nêl kitong vô tibii vac vigwe levac hixôn vigwe nipwo viyang viyang ge.

35 Om tibii wê ngô kiyang ge la ên nêb ob la yê han, mêgem he mîla vô Yesu lêc yê wê xomxo ti wê vimwo nipaên dô vac i ge, vimwo nipaên lop mi la vêl di i dô hixôn piyôp nivîha di vinyum ngakwi lec di xeedô kwabo vô Yesu di ngô Yesu kiyang. Om he yê tige di xona mabu.

36 Mêgem xomxo wê dô mi yê wê Yesu tii vimwo nipaên vêl ên xomxo tige mi vông i vô nivîha lec ge, nêl i tiyi wê he yê ge kitong vô tibii wê val gee hixôn.

37 Om tibii Gegesa vihati kitaa Yesu ên nêb i loc vêl ên he ben. He nêl bêge ên he xona mabu, mêgem Yesu lec dipac ên nêb ob lax mi la.

38 Lêc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn, lêc Yesu vông i lax mi la ben di nêl vô i ên nêbê,

39 “Ông lôc mi loc bom di loc nêl do levac wê Anutu vông vô ông ge kitong vô xomxo vihati.” Mêgem xomxo tyo lax mi la ben di la nêl kiyang wê Yesu vông i vô nivîha lec ge kitong vô xomxo vihati.

*Jailas nu vêx, di vêx yidac ngwe, yuu kiyang
(Matyu 9:18-26; Mak 5:21-43)*

40 Yesu lax mi la mia luaên vilu Galili ge nang, lêc xomxo tibeac dibin i mi xeedô, om he xêyaa vô nivîha ên wê Yesu vena ge.

41 Mêd xomxo levac ti lê nêbê Jailas val vô Yesu. Jailas ge wê tu levac di mi viac lie Yuda hixôn

xumac lilo ge, léc lam yev vixa kitu vô Yesu di kitaa i ên nêbê i loc vac i ben,

⁴² ên nu byac vông yidac levac ti mi vô kwabo lec wê ob yib ge. Nu byac tige tived di i klismas 12.

Om Yesu la hixôn Jailas mi yuu la, léc xomxo tibeac lam vuac lec Yesu.

⁴³ Mêd vêx ti dô vac he mahigun, léc vêx tige, yidac kwatuacên vông i tiyi klismas 12, léc o ma lêm, di vêx tyo vông i mone la mima vô docta lê, léc ti o tiyi wê ob vông i vô nivuha lec ge lêm.

⁴⁴ Mêgem vêx tyo val le vô Yesu nimi di vyax vigê lec Yesu ngakwi myahipu mêgem lutibed hi tyo kwep lec.

⁴⁵ Mêd Yesu nêl ên nêbê, “Letya vyax vigê lec a?” Léc xomxo vihati nêl lax ên nêbê, “Maê, xe ga maê.” Mêgem Pita nêl ên nêbê, “Xolac kehe, xomxo tibeac le i ngivina ông di vigwe tocên ma, om letya yêvô ti wê vyax vigê lec ông ge?”

⁴⁶ Léc Yesu nêl lax ên nêbê, “Ti vyax vigê lec a, om a yaxên léc xêkizêc la vêl ên a.”

⁴⁷ Mêgem vêx tige xovô nêbê o tiyi wê ob yax i vun ge lêm, om la hixôn ni yetacên mi la yev vixa vô Yesu di nêl i kehe wê vyax vigê lec Yesu ge kitong di nêl lec wê i yidac ma lutibed ge kitong hixôn, di xomxo tige vihati yê hixôn.

⁴⁸ Mêgem Yesu nêl vô i ên nêbê, “Nuge, vông vinên wê ông vông ge, ge wê vông ông vô nimvuha lec. Om ông lôc hixôn nilôm nivuha.”

⁴⁹ Yesu gên dinêl kiyang mi dô, di xomxo ti vac Jailas ben val nêl vô Jailas ên nêbê, “Num byac yib gwêba, mêgem le i léc vông yuac levac vô xolac kehe mi i lam lêm.”

⁵⁰ Mêd Yesu ngô kiyang tige di nêl vô Jailas ên nêbê, “Le nilô i vô viyin lêm. Nge, ông vông i vin mô, ên num ge ob vô nivîha lec.”

⁵¹ Mêgem Yesu mîla Jailas ben lêc nêl vô xomxo vîhati ên nêb he i dô vîxun, dêc kô Pita yuu Jon di Jems di nu tige ta yuu ma hixôn di he la vac xumac lôma.

⁵² Mêd xomxo vîhati byag mî vông tilôt ên vêx tyo mî dô, lêc Yesu nêl vô he ên nêbê, “Byagên i ma, ên vêx ge o yib lêm. Nge, ici va yêp.”

⁵³ Lêc xomxo tige nap lec Yesu kiyang ên he xovô ên he nêbê vêx ge yib vêl.

⁵⁴ Mêlêc Yesu la hôm lec vêx tyo vigê di nêl vya levac ên nêbê,
“Byac, kidi lec.”

⁵⁵ Mêgem vêx tyo myakilôhô lax mî la vac ninivi di i kidi lec lutibed mî dô, di Yesu nêl ên nêbê, “Xam vông yaên ti mî i ya.”

⁵⁶ Mêd vêx tyo ta yuu ma yetac mabu ên wê nu kidi lec ge, lêc Yesu nêl vô yuu ên nêbê, “Muu o lêc nêl ga kitong vô xomxo ti lêm.”

9

Yesu vông yuac vô nue ngîvîhi (Matyu 10:5-15; Mak 6:7-13)

¹ Yesu tyuc nue ngîvîhi vigê yuu di tô mî la yuu la vô i di vông xêkizêc wê i vông ge vô he ên nêb he i loc tii vîmwo nîpâên vêl ên xomxo di vông xomxo yidac i vô nivîha lec.

² Mêd Yesu vông he la ên nêb he i loc nêl Anutu ben yuu môp kitong vô xomxo i tiyi vigwe vîhati di vông he wê yidac gee i vô nivîha lec.

³ Mêd nêl vô he ên nêbê, “Xam o lêc kô susu ya hixôn lêc loc vô môp lêm, xocbê pitoa yuu vixec di yaên yuu mone di vinyumên yuu lêm. Nge, xam loc ya vigêm pileva di vinyumên tived.

⁴ Di xam obêc mîla vac vigwe ti mi la dô vac xumac ti ge od xam dô vac xumac tige tived i tiyi buc wê xam ob dô ge. Pyap dêc xam sea vigwe tige di loc bangwe.

⁵ Lêc xam obêc mîla vac vigwe ti lêc xomxo viyang tige o hôm xam lec nivîha lêm ge od xam liloo vîjuva vêl ên vixam ên i nêl he nêl nipaên kitong vô he di loc.”

⁶ Om Yesu nue ngivîhi la vac vigwe viyang viyang ge di la nêl xolac vac vigwe toto ge di vông xomxo yidac vô nivîha lec.

*Helot ngô kiyang lec Yesu
(Matyu 14:1-2; Mak 6:14-16)*

⁷ Hizap levac Helot ngô kiyang wê xomxo mi nêl lec Yesu ge lêc vông i nilô vô juda juda, ên xomxo ya nêl ên nêbê Yesu ge Jon Lipacên wê yib ge lêc kidi lec nang,

⁸ di xomxo ya nêl ên nêbê ge plopete Ilaija wê dô ilage om vena nang, di he ya nêl ên nêbê ge plopete ilage ti kidi lec vac yibên.

⁹ Mêd Helot nêl ên nêbê, “Jon Lipacên ge wê a kitov i kwa ilage, lêcom xomxo letya tiganê lêc tibii dinêl kiyang tibêge lec i?” Om Helot myag ên nêb ob yê Yesu.

*Yesu vet xomxo 5,000
(Matyu 14:13-21; Mak 6:30-44; Jon 6:1-13)*

¹⁰ Mêd nue ngivîhi wê Yesu vông he la yuac ge vena nêl he yuac kitong vô Yesu. Om Yesu

kô heche va dêc sea xomxo baba dô di he la vac vigwe ti lê nêbê Betsaida.

¹¹ Lêc xomxo ngô wê he la ge om timu vô Yesu he nue ngivihî vîxa dêc mîla vô he, mêd Yesu xêyaa vô nivîha ên wê he mîla ge, om nêl Anutu ben yuu môp kitong vô he di vông he wê yidac ge vô nivîha lec.

¹² He dô di vigwe huc om nue ngivihî vigê yuu di tô mî la yuu la nêl vô Yesu ên nêbê, “Vông xomxo tigae i loc, ên he i loc vac vigwe vîyang vîyang ge ên loc kisuu yaên di loc yêp, ên vigwe ga, vigwe myadongên.”

¹³ Lêc Yesu nêl vô he ên nêbê, “Xacxam va ob vông yaên vô he mî he i ya.” Lêc he nêl lax vô Yesu ên nêbê, “Xe xom yaên ga o tibeac lêm, blet vigê vilu di beac yuutyabed. Lêcom ông nêb xe la kisuu yaên vô xomxo tibeac tigae, me?”

¹⁴ He nêl bêge ên xomxo tigeê tibeac hîwocên mêgem vux vaci, he 5,000.

Mêgem Yesu nêl vô nue ngivihî ên nêbê, “Xam vông he i loc dô kidu kidu i tiyi xomxo kehe yuu di vigê yuu (50).”

¹⁵ Om he vông tibii la dô i tiyi wê Yesu nêl ge.

¹⁶ Mêgem Yesu hôm blet vigê vilu ge hixôn beac yuu ge di lax ma la lag kisiinê dêc kitaa lec blet yuu beac di hîbu mî vông vô nue ngivihî ên nêb he i kô mî loc titang vô xomxo tyoe.

¹⁷ Mêd xomxo vîhati ya i den he dêc nue ngivihî la kituc myapîpu wê gên dô ge mî su vac sepac vigê yuu di tô mî la yuu mî i pup lec.

*Pita nêl Yesu kitong nêb i Kîlisi
(Matyu 16:13-28; Mak 8:27-9:1)*

18 Buc ti Yesu he nue ngivihi la dô vac vigwe ti, mêd Yesu vaci kitaa vô ma Anutu mi dô. Pyap dâc kinêg vô nue ngivihi ên nêbê, “Xomxo mi nêb a letya?”

19 Mêd he nêl lax vô i ên nêbê, “Ya nêbê ông ge Jon Lipacên, di ya nêbê ông Ilaija, di ya nêb ông plopete ilage ti léc ông kidi lec vac yibên mi dô gwêbaga.”

20 Mêd Yesu nêl vô he ên nêbê, “Di xacxam va nêb a letya?” Mêlêc Pita nêl ên nêbê, “Ông ge Kîlisi wê Anutu vông ông lam ge.”

21 Mêd Yesu nêl kiyang xêkizêc vô he nêbê he i o léc nêl i kitong vô xomxo ti lêm,

22 di nêl vô he ên nêbê, “A, Xomxo Nu, a obêc kô myavinê levac mabu, di he Yuda levac levac hixôn xomxo levac wê mi si daa vô Anutu gee hixôn he wê xovô Moses xolac gee, he obêc vô nimi vô a di hi a xib, di buc yon obêc la vêl léc a obêc kidi lec magviha i tii vac nang.”

23 Mêd Yesu nêl vô he vihati ên nêbê, “Xomxo ti obêc nêb timu vô a kiyang ge od i vông i vô nipwo lec i tiyi buc vihati di kilê viyin i tiyi xocbê kilê xax pola ge mi timu vô a vixag.

24 Ên xomxo ti obêc viac ici va ninivi nivihâ ên nêb ob dô mavihâ ge od kinu hixôn ninivi obêc yib. Léc xomxo ti obêc sea ninivi lec a lêg ge od obêc dô mavihâ luta.

25 Ên xomxo ti obêc kituc susu kibun ga vihati tu ixê, léc ici va obêc yib mi la vac nipaên ge od obêc vô nivihâ vô i tibêna?

26 Ên xomxo ti obêc vô nimi vô a hixôn a xolac ge od a, Xomxo Nu, a êno obêc vô nimig vô i lec buc wê a obêc lop mi lôm hixôn xêseac wê Mag

Anutu yuu angela ngibua vông ge.

²⁷ Lêc a ob nêl hixôn nôn vô xam bê xam wê xam le ga, xam ya ob dô mi wê wê Anutu nu ob lam tu king ge lê dêc wib timuên.”

*Yesu ninivi pilepac
(Matyu 17:1-13; Mak 9:2-13)*

²⁸ Yesu nêl kiyang tige pyap dêc da ti la vêl mêd kô Pita yuu Jon yon Jems mi he la lec kitôn ti ên Yesu nêb ob la kitaa.

²⁹ Om Yesu kitaa mi dô, lêc ninivi pilepac mi vô bangwe di i ngakwi vô makwem ta di tee lec vigwe.

³⁰⁻³¹ Mêd lutibed xomxo yuu lam hixôn xêseac mi lam le hixôn Yesu di yon keac. Ge Moses yuu Ilaija, om yuu nêl lec môp wê Yesu ob la vông gê Jêlusalem di nêl lec wê ob sea kibun ga ge.

³² Pita yon li yuu manôn vô yêp yêp lê, lêc yon manôn seac di yon yê xêseac wê Yesu vông ge di yê xomxo yuu wê le hixôn i ge.

³³ Pyap mêd xomxo yuu ge nêl vô Yesu ên nêb yuu ob la, lêc Pita nêl vô Yesu ên nêbê, “Xolac kehe, ga nivîha wê il dô ga, om xen ob lox xumac yon, ông nêm ti, di Moses nên ti di Ilaija nên ti.” Pita lungên kiyang wê ob nêl ge om nêl kiyang bêge pileva.

³⁴ Pita gên nêl kiyang tige dêc viyobtoc ti lam hivun he xôn om yon xona.

³⁵ Mêd vya ti lam vac viyobtoc di nêl ên nêbê, “Ge a nug wê a vînoo i ge om xam ngô i vya.”

³⁶ Vya nêl pyap mêd yon yê wê Yesu tîbed xeele ge. Mêd vô buc tîgee yon o nêl kiyang wê yon yê ge kîtong vô xomxo ti lêm.

*Yesu tii vimwo nipaên vêl ên xomxo ti
(Matyu 17:14-21; Mak 9:14-29)*

³⁷ Vigwe vidiiên titige he sea kitôn di lax mi la, lêc mila vô xomxo tibeac wê dival vô môm ge,

³⁸ mêd xomxo ti vac he mahigun tyuc vya levac ên nêbê, “Xolac kehe, a kitaa ông bê ông wê a nug vux tiga lê, ên a nug nô n tibeac ga mê.

³⁹ Lêc buc tibeac vimwo nipaên ti hôm i xôn di vông i iac mabu di vô pwoo pwoo i mi hi i lec kibun di mya ngimong lam, om vông i vô nipaên di o sea i lutibeac lê.

⁴⁰ Om a kitaa nume ngivihî ên a nêb he i tii vimwo nipaên tiga i loc vêl lêc he tiiyên ma.”

⁴¹ Mêgem Yesu nêl vô he ên nêbê, “Xam gwêbaga, xam nêm vông vinên ma. Xam nêlôm gên nipaên. Om a ob dô hixôn xam di i miloc na lê lêc xam vông i vinê? Di a ob kilê viyin wê xam vông ge di i miloc na lê? Om kô num tyo mi lamê.”

⁴² Mêd nu tige gên kidi mi lam lêc vimwo nipaên tige hôm i di nêx i la hi i sea lec kibun. Mêgem Yesu lec ni vô vimwo nipaên tige mi tii i la vêl di vông nipwo tyo vô nivîha lec di vông i lax vô ma.

⁴³ Om xomxo tige vihati yê di yetac mabu ên xêkizêc levac wê Anutu vông ge.

*Yesu nêl kiyang vông lu yuu lec wê obêc yib ge
(Matyu 17:22-23; Mak 9:30-32)*

Xomxo yetac mabu ên môm wê Yesu vông ge, dêc Yesu nêl vô nue ngivihî ên nêbê,

⁴⁴ “Xam vyac vô ninyam vô kiyang wê a ob nêl ga bê xomxo obêc vông Xomxo Nu la vac tibii vigê.”

⁴⁵ Lêc nue ngivihî lungên kiyang tyo kehe, ên kehe yêp xôpacên om he vyac xovôên ma. Lêc he xona ên nêb ob kinêg kiyang tyo kehe vô Yesu lêm.

Letya ob tu levac?

(Matyu 18:1-5; Mak 9:33-40)

⁴⁶ Yesu nue ngivihî ngaênma ên nêb letya ob tu he nêb levac?

⁴⁷ Lêc Yesu xovô he nilô wê he nêl ge om la kô nipwo ti mi lam lax i le pikeb i,

⁴⁸ di nêl vô he ên nêbê, “Xomxo ti obêc hôm nipwo bêga lec ên wê vông i vin a lêg ge od ge tiyi xocbê hôm a lec ge. Di xomxo ti obêc hôm a lec ge od ge tiyi xocbê hôm xomxo ti wê vông a lam ge lec hixôn. Ên xomxo wê dô nipwo vac xam mahigun ge, ge wê ob tu xam nêb levac.”

⁴⁹ Mêd Jon nêl vô Yesu ên nêbê, “Xolac kehe, xe xê xomxo ti tii vimwo nipaên vêl ên xomxo lec ông lêm, om xe vîbu i nêb i vôngên tibêge i ma, ên o mi dô hixôn xe mi timu vô ông lêm.”

⁵⁰ Lêc Yesu nêl vô i ên nêbê, “Xam o lêc vîbu i lêm. Ên xomxo wê o vông vevac vô xam lêm ge, ge xam nêb wê ob ngîdu xam xôn ge.”

Tîbii Samelia o hôm Yesu lec lêm

⁵¹ Buc vô kwabo lec wê Yesu ob lax mi la lag puunê ge, mêd Yesu nêb ob la Jerusalem,

⁵² om vông xomxo ya le mug la. Mêd he mîla vac tîbii Samelia ben, ên he nêb he ob la yê vigwe ti wê Yesu ob la dô vac ge,

⁵³ lêc tîbii vîyang tige xovô nêbê Yesu ge xomxo Yuda ti wê nêb ob la Jerusalem ge, om he vîbu nêbê Yesu loc vacên he ben i ma.

54 Mêd nue ngivihî Jems yuu Jon yê môp wê he vông ge om nêl vô Yesu ên nêbê, “Apumtau, ông nêb xii nêl di ngwax i lam gê kisii ganê ên ya tibii tigae i ma vêl, me?”

55 Mêlêc Yesu pilepac i di kunac yuu ên kiyang wê yuu nêl ge.

56 Pyap dêc he la vigwe bangwe.

*Xomxo wê nêb ob timu vô Yesu ge
(Matyu 8:19-22)*

57 He mîla vô môp lê, lêc xomxo ti val nêl vô Yesu ên nêbê, “Vigwe wê ông ob la vac ge, a ob loc hixôn ông.”

58 Lêc Yesu nêl vô i ên nêbê, “Le i lêc nêl decdec bê ông ob lam hixôn a lêm. Ên lilii mi yêp vac yen, di menac vông liwihî lec xax mi yêp lec, lêc a, Xomxo Nu, a bog wê a ob xêp vac ge ti yêpên ma.”

59 Yesu nêl vô xomxo ngwe ên nêbê, “Lam hixôn a.” Lêc xomxo tige nêl ên nêbê, “Xomxo levac, a ob loc hixôn ông lê, lêc ông vông a lax dô di yev mag vêl lê.”

60 Lêc Yesu luu i vya di nêl ên nêbê, “Xomxo yibên i yev yibên, di ông loc nêl Anutu ben yuu môp kitong vô xomxo.”

61 Xomxo ngwe nêl vô Yesu ên nêbê, “Xomxo levac, a ob loc hixôn ông lê, lêc ông vông a lax bog mi lax nêl kitong vô lige lê.”

62 Lêc Yesu nêl vô i ên nêbê, “Xomxo ti obêc nêb i obêc vông Anutu yuac ge od i o lêc yê manôn i loc nînya nînya lêm, ên ge od o tiyi wê ob tu Anutu nu mi vông i yuac ge lêm.”

10

Yesu vông xomxo kehe yon di vigê yuu (70) la vac yuac

¹ Nang dêc Yesu vînoo xomxo kehe yon di vigê yuu (70) hixôn mi vông he yuu yuu la vac vigwe titi, ên nêb he i mug mi loc vac vigwe vîhati wê Yesu obêc mila vac ge.

² Mêd nêl vô he ên nêbê, “Yaên wê dô vac yuac ge vô nôn tibeac pyap lê, lêc xomxo ti wê ob kô nôn tyo gee yuutyabed, om xam kitaa vô yuac tyo kehe bê i vông xomxo i loc vông yuac ên kituc ixê nôn.

³ “Om xam locê. Lêc xam xovô bê a ob vông xam loc xocbê bwoc sipsip nue wê la vac noo vîmen mahigun ge.

⁴ Om xam o lêc kô mone yuu vîxec di su hixôn lêm, di xam o lêc keac tôv vô xomxo ti vac môp lêm.

⁵ Xam obêc la vac xumac ti ge od xam nêl kiyang tax bêga bê, ‘Kiyang malehe i lam lec xomxo wê dô vac xumac tiga.’

⁶ Mêd xomxo kiyang malehe obêc dô vac xumac tige ge od kiyang malehe wê xam kitaa lec he ge ob yêp lec he. Lêc obêc ma ge od kiyang malehe obêc lôm vô xacxam va tii vac nang.

⁷ Mêd xumac wê xam obêc dô vac ge, xam dô vac xumac tige tîbed, di le i lêc dô tul tul vac xumac tibeac lêm. Nge, xam dô tige mi wa di num wê xomxo ob vông vô xam ge, ên xomxo wê ob vông yuac ge obêc kô nôn lec yuac wê he vông ge.

⁸ “Om xam obêc la vac vîgwe ti lêc xomxo hôm xam lec ge od xam wa yaên wê he vông vô xam ge,

⁹ di xam vông he vîyang tige wê yidac vông ge i vô nivîha lec, di xam nêl vô he bêga bê, ‘Anutu nu kisiinê val pyap vô xam.’

¹⁰ “Lêc xam obêc mîla vac vîgwe ti lêc xomxo o hôm xam lec lêm ge od xam lôc mî loc le vac môm, di nêl vô he bêga bê,

¹¹ ‘Xam bom vîjuva wê pîtii lec xe vîxam ge, xe ob lîloo i lôc mî loc yêp vô xam. Mêlêc xam xovô bêga bê Anutu nu kisiinê val kwabo pyap.’ Xam nêl bêge vô he.

¹² Om a ob nêl vô xam bê obêc buc timuên wê Anutu ob yaxên xomxo ge, od xomxo vîyang tige obêc kô vîyin levac luu vîyin wê tibii Sodom ob kô ge vêl.”

*Vîyin lec xomxo wê o vông i vin lêm ge
(Matyu 11:20-24)*

¹³ Yesu nêl ên nêbê, “Xam tibii Kolasin, xam xona nêm ên vîyin wê xam obêc kô ge. Di xam tibii Betsaida, xam êno xona nêm. Ên do levac wê a vông vac xam bom ge, xomxo ti obêc vông bêge vac tibii Taia yuu Saidon ben ilage ge od tibii Taia yuu Saidon obêc pilepac he di lipac vîwev lec he di dô hixôn nilô vîyin ên wê he xovô nên nîpaên ge.

¹⁴ Lêc xam o pilepac xam lêm, om buc timuên wê Anutu obêc yaxên xomxo ge, od xam obêc kô myavîwen nîpaên i luu wê tibii Taia yuu Saidon ob kô ge vêl.

15 Di xam tibii Kapaneam, xam xo ên xam nêb xam ob kô lêm levac mi la dô vac Anutu ben lag puunê? Ma vêl, xam ob la vac vigwe nipaên.”

16 Mêgem Yesu nêl vô nue ngivihi ên nêbê, “Xomxo ti obêc ngô xam vyam ge od tiyi xocbê ngô a vyag. Lêc xomxo obêc vô ninya kitu vô xam vyam ge od tiyi xocbê he vô ninya kitu vô a vyag, di xomxo wê vô ninya kitu vô a vyag ge tiyi xocbê he vô ninya kitu vô xomxo ti wê vông a lam ge vya hixôn.”

Xomxo kehe yon di vigê yuu (70) vena vô Yesu

17 Xomxo kehe yon di vigê yuu wê Yesu vông he la yuac gee vena hixôn xêyaa nivihia di nêl vô Yesu ên nêbê, “Apumtau, xe nêl ông lêm ge od vimwo nipaên vô ninya lehe vô mi la vac xe vyam kwa ngibi.”

18 Lêc Yesu nêl vô he ên nêbê, “A xê Seten tô gê kisiî ganê mi lam xocbê deac hixelac ge.

19 Om xam ngô lê. A vông xêkizêc vô xam pyap, om xam tiyi wê xam obêc kê myel yuu kipyêc, di xam obêc pwoo xêkizêc wê Seten vông ge i pec, di susu ti o tiyi wê ob vông xam vô nipaên ge lêm.

20 Vixôhilôg, lêc xam o lêc pimil xam bê vimwo nipaên la vac xam kwa ngibi lêm. Nge, xam pimil Anutu ên wê kivuu xam lêm yêp lag puunê ge.”

*Yesu pimil ma Anutu hixôn xêyaa nivihia
(Matyu 11:25-27; Matyu 13:16-17)*

21 Vô buc tige Myakilôhô Ngibua vông Yesu xêyaa vô nivihia di i kitaa vô ma Anutu bêga ên nêbê, “Mag Apumtau, ông lag yuu kibun kehe

ông, om a hi vixag pec ên ông, ên ông o vông kiyang tige vô xomxo wê piyôp levac yuu xovôên nivaha ge lêm. Nge, ông hîlung vô xomxo wê lê nipwo ge. Mag, ông vông ya xovôên wê ôcông va vông ge.”

²² Pyap dêc Yesu nêl ên nêbê, “Mag vông susu ge vîhati vô a. Mêlêc xomxo ti o xovô nu a lêm. Nge, Mag vaci xovô. Di xomxo ti o xovô Mag lêm. Nge, nu aca va wê a xovô, di xomxo wê a nêb a ob hîlung Mag vô he ge, he ob xovô Mag.”

²³ Mêd Yesu pilepac i vô nue ngivîhi di nêl vô heche va ên nêbê, “Xam xêmyaa i vô nivaha ên wê xam wê môp wê a vông ge.

²⁴ Ên a ob nêl vô xam bê plopete yuu king wê dô ilage, he tibeac nêb ob yê i tiyi xocbê xam wê ge lê, lêc he yêên ma. Di he tibeac nêb ob ngô kiyang xocbê wê xam ngô ge lê, lêc he ngôên ma.”

Kiyang pilepacên lec tibii Samelia ti

²⁵ Buc ti lêc xomxo wê xovô Moses xolac ge ti kidi lec di nêl kiyang vô Yesu ên nêb ob yaxên i, om nêl bêga ên nêbê, “Xolac kehe, a obêc vông bêna êdêc dô magvîha luta lêc luta?”

²⁶ Lêc Yesu nêl lax vô i ên nêbê, “Kiyang wê yêp vac Moses xolac ge, ông kitong lêc nêbê va?”

²⁷ Mêgem xomxo tyo nêl ên nêbê, “Xolac nêl bêga ên nêbê, ‘Ông xêmyaa i vin lec ông Apumtau Anutu di ông vông nîlôm yuu kinum di xêkizêc yuu piyôp i loc diluhu vô Anutu, di ông xêmyaa i vin lec xomxo baba i tiyi xocbê ông xêmyaa vin lec ôcông va ge.’ ”

28 Mêgem Yesu nêl ên nêbê, “Ông nêl ge nivîha pyap, om ông obêc vông bêge ge od ông obêc dô mamvîha luta lêc luta.”

29 Lêc xomxo tige nêb ob viac i nivîha om kinêg vô Yesu ên nêbê, “Kiyang wê nêl ên nêbê il xêdyaa i vin lec xomxo baba ge, ge nêl lec xomxo nae?”

30 Om Yesu nêl kiyang pilepacên ti vô i bêga ên nêbê, “Xomxo ti kidi gê Jerusalem ên nêb ob la Jeliko, om la vô môp mi la, lêc tibii yôdac wê mi vun xomxo susu ge hi i vô nipaên di lêx i nên ngakwi sea di kô i susu vîhati mi la, dêc xomxo tyo la yêp vac môp di vô kwabo lec wê ob yib ge.

31 Lêc vô buc tige xomxo wê mi si daa vô Anutu ge ti mîla vô môp tige mi la yê lê, lêc sea i yêp di luu vêl mi la.

32 Nang dêc xomxo Livai wê mi vông yuac vac Anutu xumac ngîbua ge ti mîla vô môp tige mi la yê lê, lêc sea i yêp di luu vêl mi la.

33 “Mêd tibii Samelia ti mîla vô môp tige om val yê xomxo tyo wê yêp ge, lêc xo vîgwe pisiv ên i,

34 om la kwabo vô dêc vông malasin wel yuu wain vac xomxo tyo kityax wê tibii vevac hi ge, mî vîyum xôn, dêc tung i la lec i bwoc donki mêd kô mî

la vac xumac wê xomxo kisuu di yêp vac ge ti di viac i.

35 Vîgwe vîdiiên mêd tibii Samelia tige vông mone kehe ti vô xomxo ti wê viac xumac tige di nêl vô i ên nêbê, ‘Ông viac xomxo tiga nivîha ya mone wê a vông ga, dêc ông obêc vông luu vêl

ge od a obêc vena vông vac ông xe wê ông viac xomxo tiga ya ge.' "

³⁶ Yesu nêl bêge dêc kinêg vô xomxo xolac kehe tige ên nêbê, "Om ông xo ên ông nêb xomxo yon ge, tina xêyaa vin lec xomxo ti wê tibii yôdac hỉ ge?"

³⁷ Lêc xomxo tyo nêl lax ên nêbê, "Xomxo ti wê xo vigwe pisiv ên i ge." Om Yesu nêl vô i ên nêbê, "Om ông lôc, dĩ loc vông mốp i tiyi bêge."

Mata yuu li Malia

³⁸ Mêd Yesu he nue ngivihhi la lêc mĩla vac vigwe ti wê vêx ti dô vac lê nêbê Mata. Om Mata kô Yesu mĩ la vac i ben.

³⁹ Lêc Mata li vêx ngwe dô lê nêbê Malia, om Malia la dô hixôn Apumtau Yesu mĩ ngô i kiyang.

⁴⁰ Lêc Mata vông yuac levaclec yebac mĩ vô vilee vilee mĩ vông nilô vô vinyin om la nêl vô Yesu ên nêbê, "Apumtau, nii Malia sea a mĩ vông aca tibed vông yuac lec yaên ga. Lêcom mêd ông wê ge nivihha? Ông nêl ên i lam vông yuac hixôn a."

⁴¹ Lêc Apumtau nêl vô i ên nêbê, "Mata, Mata, ông vông nilôm la vô susu viyang viyang ge om vông ông nilôm vô vinyin lec.

⁴² Mêlêc mốp tibed wê ông sea ge. Ge mốp nivihha wê Malia vông ge, om il obêc vô vêl ên i nang lêm."

11

*Yesu nêl mốp kitaaên kitong vô nue ngivihhi
(Matyu 6:9-15; Matyu 7:7-11)*

¹ Buc ti Yesu la kitaa vac vigwe ti, pyap dêc nue ngivihî ti nêl vô i ên nêbê, “Apumtau, xe nêb ông nêl môt kitaaên kitong vô xe i tiyi xochê Jon Lipacên nêl vô nue ge.”

² Mêgem Yesu nêl vô he ên nêbê, “Xam obêc kitaa ge od xam kitaa bêga bê,

‘Mag, ông lêm i lam tu ngibua. Ông lam tu Apumtau i tiyi vigwe vîhati.

³ Ông vông yaên vô xe i tiyi buc vîhati.

⁴ Xe nêb myaviwen wê yêp vô xe ge ông kitya vêl, xochê xe kitya nêb nipaên vêl vôma ge. Ông o lêc didii xe mi loc vac kiyang wê ob yaxên xe ge lêm.’ ”

⁵ Mêd Yesu nêl vô he ên nêbê, “Xam ti obêc la vô ngidêm ti vô vivuaên mahigun di nêl vô i ên nêbê, ‘Ngidêg, a val ga vô ông ên a nêbê ông vông blet yon vô a,

⁶ ên a ngidêg ngwe val vô vigwe bucên tya ga vô a, lêcom yaên wê a ob vông vô i ge ma.’

⁷ Lêc ngidêm dô vac xumac nilô di nêl bêga vô ông ên nêbê, ‘Ga vivuaên mahigun di a tung xumac lec pyap di xe nuge xêp ga mê, om o tiyi wê a ob kidî lec mi vông yaên ti vô ông ge lêm. Mêgem ông lôcê.’

⁸ Om a ob nêl vô xam bê ngidêm obêc kidî lec mi lam vông yaên vô ông ge od ob vông vô ông ên wê i ngidê ông ge lêm. Nge, obêc vông vô ông ên wê ông kitaa i nginong ge.

⁹ Om a ob nêl vô xam bê xam kitaa susu ya vô Anutu ên Anutu i vông vô xam, di xam myag susu êdêc wêvô, di xam kituu vuayen ên Anutu i tax vuayen ên xam.

10 Ên xomxo vihati wê kitaa vô Anutu ge obêc kô nôñ tiyi wê he kitaa ge, di xomxo vihati wê myag susu ge obêc yêvô, di xomxo vihati wê kituu vuayen ge od Anutu obêc tax vuayen ên he.

11 “Xame, xam nume ti obêc kitaa xam nêb ob ya pis ge od xam obêc vông myel vô, me?”

12 Me nume ti obêc kitaa xam ên nêb xam vông kokilêx nulen vô i ge od xam obêc vông kipyêc vô, me? Maê.

13 Xam ga xomxo kibun nipaên, lêc xam mi vông susu nivihaviha vô nume, om xam xovô bêga bê il Mag Anutu lag puunê nêb ob vông susu nivihaviha luu vêl vô il om ob vông Myakilôhông Ngibua vô xomxo wê kitaa i ge.”

Xomxo nêl ên nêbê Yesu vông yuac ya xêkizêc wê Seten vông ge

(Matyu 12:22-30; Mak 3:20-27)

14 Yesu tii vimwo nipaên ti vêl ên xomxo ti. Vimwo tyo vông xomxo tige dô yac di keacên ma, om buc wê Yesu tii vimwo tyo la vêl ge od xomxo tyo keac, di xomxo wê yê gee yetac mabu.

15 Lêc xomxo ya nêl ên nêbê, “Bielsebul wê tu vimwo nipaên nêñ levac ge vông xêkizêc vô Yesu, om Yesu tii vimwo nipaên vêl ya xêkizêc wê Bielsebul vông ge.”

16 Di xomxo ya nêb ob yaxên Yesu, om nêl vô i ên nêbê, “Xe nêb ông vông do levac ti mi xe xê ên i nêl kitong bê ông kô xêkizêc vô Anutu lag puunê.”

17 Lêc Yesu xovô kiyang wê yêp vac he nilô ge om nêl vô he ên nêbê, “Xomxo viyang ti obêc

hibuma sea mi hima ge od ob dô nivîha nang lêm. Me xomxo xumac ti obêc hibuma sea mi hima ge od obêc vông he vô nipaên.

¹⁸ Bêge mêgem Seten he lie obêc hibuma sea mi hima ge od xêkizêc wê he vông ge ob yêp nivîha tibêna? Ge he ob dô nipaên. A nêl bêge ên wê xam nêl ên xam nêbê a tii vimwo nipaên la vêl ên xomxo ya xêkizêc wê Bielsebul vông ge.

¹⁹ Lêc a ob kinêg vô xam bê a obêc tii vimwo nipaên vêl ya xêkizêc wê Bielsebul vông ge od letya wê vông xêkizêc vô lime lêc he tii vimwo nipaên vêl ya ge? Ge lime vaci ob yaxên kiyang wê xam nêl ge lê.

²⁰ Lêc Anutu vaci obêc vông xêkizêc vô a di a tii vimwo nipaên la vêl ge od xam xovô bêga bê Anutu lam tu levac vac xam mahigun pyap.

²¹ “Xomxo xêkizêc ti obêc hêm susu vevac vac vîgê di dô bin i xumac ge od susu wê i vông ge ob dô nivîha.

²² Lêc xomxo ngwe wê xêkizêc luu vêl ge obêc val vông vevac vô i di ngînoo vêl ge od ob vô susu vevac wê xomxo tige xo nêb ob ngidu i xôn ge vêl, dêc kô susu wê xomxo tige vông ge vîhati mi la titang vaxvax vô lie ya.

²³ “Om a ob nêl bêga bê xomxo ti obêc dô hixôn a mi ngidu a xôn lêm ge od ge tiyi xocbê vông vevac vô a. Di xomxo wê o vilu vô xomxo hixôn a lêm ge od ge tiyi xocbê tii he moo sea ge.

*Vimwo nipaên vena i tii vac nang
(Matyu 12:43-45)*

²⁴ “Vimwo nipaên ti obêc lam la vêl ên xomxo ti ge od ob la vîlee vac vîgwe myadongên mi la myag vîgwe ti wê ob la dô seac vêl vac ge. Lêc

yêvôên vigwe ti obêc ma ge od ob nêl bêga bê,
'A ob lax mi la dô vac bog wê a sea di lam ge i tii
vac nang.'

²⁵ Om vimwo tige obêc lax mi la vô xomxo ti
wê i dô vac ilage mi lax yê wê pityep mi viac
niviha ge,

²⁶ od obêc la kô vimwo nipaên wê nên nipaên
luu i vêl ge vigê vilu di sec yuu, lêc he xôn lax
dô vac xomxo tige, di vông i vô nipaên levac luu
vîwen tax ge vêl."

Môp wê xomxo ob dô hixôn xêyaa nivîha ge

²⁷ Yesu nêl kiyang tige vô xomxo tibeac, lêc vêx
ti tyuc vya levac vac he mahigun ên nêbê, "Ông
tam ti wê kô ông mi vông lul vô ông ge, i dô
hixôn xêyaa nivîha."

²⁸ Lêc Yesu nêl ên nêbê, "Bêge mêlêc a nêl bê
xomxo wê ngô Anutu kiyang mi viac ge wê ob dô
hixôn xêyaa nivîha."

Xomxo nêb he ob yê do levac

(Matyu 12:38-42; Mak 8:12)

²⁹ Xomxo tibeac lam kitucma mi dô, mêgem
Yesu nêl vô he ên nêbê, "Xomxo gwêbaga,
xomxo nipaên nô. He nêb he ob yê do levac
lê, lêc a ob nêl bê he ob yê do tibeac lêm. Nge,
do tived wê he ob yê ge, tîyi xochê wê Jona vông
ilage.

³⁰ Ên môp wê Jona la dô vac lili gwec nilô tîyi
buc yon ge, ge Anutu hîlung vô tîbii Niniva tîyi
xochê do levac ge. Bêge mêgem a, Xomxo Nu, a
obêc tu do levac bêge vô xomxo gwêbaga êno.

31 “Om obêc buc timuên wê Anutu obêc titô xomxo ge, od vêx levac wê tu tibii Siba nêk kwîn vac buc ilage ge obêc kidi lec hixôn xam wê xam dô gwêbaga di nêl xam nêk nipaên kitong. Ên vêx tige kidi vac kibun myahipu di lam ên nêb ob lam ngô kiyang wê King Solomon nêl hixôn piyôp nivîha ge. Di gwêbaga a wê a luu Solomon vêl ge a lam dô hixôn xam lê, lêc xam o ngô a vyag lêm.

32 Om obêc buc timuên wê Anutu obêc titô xomxo ge, od tibii Niniva êno obêc kidi lec hixôn xam wê xam dô gwêbaga di nêl xam nêk nipaên, ên ilage tibii Niniva ngô kiyang wê Jona nêl vô he ge di pilepac he, di gwêbaga a wê a luu Jona vêl ge a lam dô hixôn xam, lêc xam o pilepac xam lêm.

*Kiyang pilepacên lec lam
(Matyu 5:15; Matyu 6:22-23)*

33 “Xomxo ti obêc byêx ngwax vac lam ge od ob vun vac pêt ngibi me lax dêg lec xôn lêm. Nge, ob lax i le lec tevol kisii ên xomxo wê ob lam vac xumac nilô ge i lam yê xêseac.

34 Xam mamnôn tiyi xochê lam wê linac lec nimnivi ge, om mamnôn obêc dô nivîha ge od obêc vông nimnivi vihati dô vac xêseac, lêc xam obêc vông mamnôn vô nipaên ge od nimnivi vihati obêc mapitoc.

35 Om xam viac xam êdêc xêseac wê dô vac xam ge i o lêc vô mapitoc lêm.

36 Ên nimnivi vihati obêc dô vac xêseac di mapitoc ma ge od nimnivi obêc xêseac nivîha xochê lam xêseac linac lec ông ge.”

*Môp nipaên wê he Palisi hixôn xomxo wê xovô
Moses xolac gee vông ge*

(Matyu 23:1-36; Mak 12:38-40; Luk 20:45-47)

³⁷ Yesu nêl kiyang tige pyap dêc Palisi ti val nêl vô Yesu nêb i loc ya hixôn i, om Yesu la vac Palisi tyo ben mi la dô hixôn i mi ya.

³⁸ Lêc Palisi tyo yê wê Yesu diya ge lê, lêc o lipac vigê tax tîyi xocbê môp wê he Palisi mi vông ge lêm, om yetac mabu.

³⁹ Lêc Yesu nêl vô i ên nêbê, “Xam Palisi ge, xam mi lipac nimnivi pileva tîyi xocbê xam lipac kap yuu pile nîmi ge, dom xam nîlôm ge, môp yôdac yuu nipaên pup lec.

⁴⁰ Xam tîbii piyôp maên. Anutu ti wê tung il nidnivi ge o tung il nîlôd hixôn lêmê?

⁴¹ Om a ob nêl vô xam bê xam vông susu wê dô vac pile yuu kap nîlô ge vô xomxo wê nêl susu maên ge ên i loc ngidu he xôn. Xam obêc vông bêge ge od xam nêl môp vihati obêc vô paha lec.

⁴² “Om xam Palisi ge, xam xona nêl ên viyin wê ob val vô xam ge. Ên xam nêb xam ob timu vô Moses xolac vihati, om xam obêc tulec susu xocbê lehac yuu nêc nipwopwo ge od xam mi tung kidu vigê yuu lêc mi vông kidu ti la tu daa vô Anutu. Xam mi vông bêge lê, lêc xam sea môp bôbac yuu môp xêyaa vin lecên Anutu. Om a ob nêl bê xam o lêc vông môp ngwe vô nivîha di sea ngwe lêm. Nge, xam vông yuu xôn i vô nivîha.

⁴³ “Xam Palisi, xam xona nêl ên viyin wê obêc tulec xam ge. Ên buc wê xam la vac xumac lilo ge, od xam yong xam ên xam nêb xam ob dô

lec sia nivihã vò xomxo manôn, ði buc wê xam la vilee lec wetôv ge od xam nêb xomxo vîhati i pîmil xam ya vya nivihã.

44 “Mêgem xam xona nêb ên vîyin wê obêc tulec xam ge. Ên xam nîlôm tîyi xocbê lôva wê le vac kibun nîlô mî xomxo len yêp vac ge, mêlêc xomxo tîbeac lungên ði xoc vô kisii mî la om vông he vô nîpaên.”

45 Mêgem xomxo wê xovô Moses xolac ge ti nêl vô Yesu ên nêbê, “Xolac kehe, kiyang wê ông nêl ge, ge ông nêl nîpaên lec xe hixôn.”

46 Lêcom Yesu nêl vô he ên nêbê, “Xam wê xam xovô Moses xolac ge, xam xona nêb ên vîyin wê obêc tulec xam ge. Ên xam nêl kiyang tîbeac vô xomxo ên xam nêb he i tîmu vô, om xam lii vîyin levac lec he, lêc xam vîgêm o kilê vîyin tige hixôn he lu ya lêm.

47 “Om xam xona nêb ên vîyin wê obêc tulec xam ge. Ên mame bume tivame, he hi plopete yib, lêc gwêbaga xam ðivunac vô lôva wê plopete yêp vac ge.

48 Om môp tîbêge nêl xam kitong ên nêbê xam xêmyaa vô nivihã ên môp wê bume vông ilage, ên bume hi plopete yib, lêc gwêbaga xam vunac vô lôva wê plopete yêp vac ge.

49 “Mêgem Anutu wê xovôên kehe ge nêl bêga ên nêbê, ‘A ob vông plopete yuu sinale i loc vô he lê, lêc he obêc vông vîyin vô he ðêc hi he ya yib.’

50 Om xomxo wê dô gwêbaga, he ob kô myavîwen nîpaên lec wê he hi plopete yib ge. Ge nêl lec plopete vîhati yang, he wê dô vô buc

taxlee ilage wê Anutu tung lag yuu kibun ge di i val tyip lec buc gwêbaga hixôn.

⁵¹ Kiyang tige lec Ebel wê taxlee ge di i val tyip lec plopete Sekalaia ti wê bume hi i yib vac xumac ngibua yuu alta mahigun ge. Vixôhilôg, a ob nêl hixôn nôn vô xam bê xomxo gwêbaga ob kô myaviwen nipaên lec môp gee vihati.

⁵² “Om xam wê xam xovô Moses xolac ge, xam xona nêl ên viyin wê xam ob kô ge. Ên môp wê xomxo ob ngô xolac kehe ge, xam le vac xôn, ên xacxam va lungên xolac kehe om xam le vac môp xôn ên xomxo wê nêb ob ngô mi xovô ge.”

⁵³ Yesu nêl pyap dêc sea Palisi tyo ben di loc mi la, dêc he wê xovô Moses xolac gee hixôn he Palisi yê Yesu nipaên om he le kinêg kiyang viyang viyang vô i

⁵⁴ ên nêb ob yaxên bêc obêc nêl kiyang ti so ge od ob vông i loc vac kot.

12

Xona nêl ên kiyang kityooên (Matyu 10:26-27)

¹ Vô buc tige xomxo tibeac hiwocên la kitucma vô Yesu, om he la pup lec vigwe xochê ob dô lecma vixa hixôn, dêc Yesu nêl vô nue ngivihi tax ên nêbê, “Xam viac xam ên môp nipaên wê Palisi mi vông ge, ên he mi viyum kiyang nipaên vac kiyang nivaha, om môp tige tïyi xochê yis wê ob vông blet vuac mi vô levac ge.

² Ên kiyang vihati wê yêp xôpacên ge obêc lam le seac, di kiyang vihati wê yêp vac xomxo nilô ge obêc hivelac lec di xomxo vihati xovô.

³ Om kiyang vihati wê xam nêl vô bucên ge od xomxo obêc ngô vô vidiiên, di kiyang vihati wê xam kimuna voma vac xumac lôma ge od obêc nêl i vô levac lec wetôv.

*Xomxo i xona ên Anutu tived
(Matyu 10:28-31)*

⁴ “Xam lige, a ob nêl vô xam bê xam o léc xona ên xomxo wê ob hi xam nimnivi yib ge lêm, ên he o tiyi wê obêc vông viyin yaya vô xam hixôn timuên ge lêm.

⁵ Léc a ob nêl xomxo ti wê xam ob xona ên ge kitong vô xam bê Anutu tived wê obêc hi xomxo yib, dèc obêc timuên ge xêkizêc wê i vông ob nêx xomxo la vac vigwe nipaên. Om a nêl vô xam bê xam xona ên i tived.

⁶ “Xam xovô ên xam nêbê xomxo ti obêc kisuu menac nipwo vigê vilu ge od obêc kisuu ya mone nipwo tiyi xochê mone hi yuubed ge. Bêge mêlêc Anutu o lungên menac nipwopwo gee lêm. Nge, xovô gee vihati.

⁷ Di Anutu o lungên xam êno lêm. Nge, kitong xam bamzub lihi vihati pyap. Om xam xonaên i ma, ên Anutu xêyaa vin lec xam nginoo menac vihati vêl.

*Il ob nêl Yesu kitong vô xomxo
(Matyu 10:19-20,32-33; Matyu 12:32)*

⁸ “A ob nêl vô xam bê xomxo ti obêc nêl a kitong vô xomxo ge od a, Xomxo Nu, a ob nêl i kitong vô Anutu nue angela.

⁹ Léc xomxo ti obêc yax a vun vô xomxo manôn ge od a obêc yax i vun vô Anutu nue angela manôn êno bêge.

10 “Xomxo ti obêc so vya vô a, Xomxo Nu ge od tiyi wê Anutu obêc kitya nipaên tige vêl ge. Lêc xomxo ti obêc so vya vô Myakilôhô Ngibua ge od o tiyi wê Anutu ob kitya i nêl nipaên tige vêl ge lêm.

11 “Mêd buc wê xomxo obêc kô xam mi la vô xomxo levac vac xumac lilo me gavman ti me xomxo levac ti ge od xam o lêc xona di xo bêga bê ‘Xe ob luu he vya ya kiyang tina, di xe ob nêl kiyang bêna vô he?’ Le i lêc xo kiyang tibêge lêm.

12 Ên obêc hiyôv manôn myabo tya ge od Myakilôhô Ngibua ob hilung kiyang wê xam ob nêl ge vô xam.”

Kiyang pilepacên lec xomxo wê mone tibeac ge ti

13 Xomxo ti vac xomxo tibeac mahigun nêl vô Yesu ên nêbê, “Xolac kehe, ông nêl vô a lig ngwe ge bê i vông susu wê mag vigê ge viwen vô a.”

14 Lêc Yesu nêl vô i ên nêbê, “Letya vinoo a nêb a titô xam nêl kiyang mi vông byed vô xam susu? Ge yêp vô xacxam va.”

15 Mêgem Yesu nêl vô he vihati ên nêbê, “Xam xona nêl ên mamdoên vô susu viyang viyang ge, ên susu tibeac wê xomxo vông ge o tiyi wê ob vông he dô maviha ge lêm.”

16 Mêgem Yesu nêl kiyang pilepacên ti vô he bêga ên nêbê, “Xomxo wê susu levac ge ti dô, lêc yuac wê i vông ge vô nôn tibeac,

17 om xo bêga ên nêbê, ‘A ob vông bêna? Ên xumac wê a ob kituc susu vihati nôn vac ge tiyiên ma.’

18 Om nêl bêga ên nêbê, 'A ob vông môm bêga bê a ob dii xumac wê a kituc susu nôn vac ge mi lox xumac levac levac pileva ên kituc yaên nôn yuu susu vihati wê a vông ge i loc dô vac.

19 Pyap dêc a ob xo bêga bê a kituc susu tibeac di obêc dô tiyi klismas tibeac om a ob dô seac vêl mi xa di num hixôn xêgyaa nivîha.'

20 Mêlêc Anutu nêl vô i ên nêbê, 'Ông xomxo piyôp maên. Bucên hig ge ông obêc wib, om susu tibeac wê ông kituc ge obêc tu letya xe?' "

21 Mêgem Yesu nêl ên nêbê, "Kiyang tige tiyi xochê xomxo ti kituc susu tibeac tu ici va xe lêc o xovô Anutu lêm om Anutu yê i tiyi xochê xomxo pileva ti."

*Il ob vông il nilôd i vô viyin lêm
(Matyu 6:25-34)*

22 Yesu nêl vô nue ngivîhi ên nêbê, "Bêge mêgem a ob nêl vô xam bê xam o lêc vông nilôm i vô viyin lec yaên wê xam ob wa ge yuu ngakwi wê xam ob vinyum ge lêm,

23 ên môm wê il ob dô madviha ya ge luu susu yaên vêl, di il nidnivi luu ngakwi vêl.

24 "Om xam xovô menac lê. Ên menac o xin vê vac yuac lêm, di he o kô yaên nôn vac yuac lêm, di he nêl xumac wê ob kituc yaên vac ge ti o le lêm. Mêlêc Anutu vet he tiyi buc vihati. Di Anutu xêyaa vin lec xomxo ngînoo menac gee vêl om ob viac xam nivîha.

25 Xame, xam ti obêc xo kiyang tibeac nêb xam ob dô mamviha ge od tiyi wê xam ob tul lec buc wê ob dô mavîha ge i loc dia, me?

26 Ma vêl, xam o tiyi wê xam ob vông bêge ge lêm. Om bêna léc xam xo kiyang tibeac lec susu ninivi xen?

27 “Di xam xovô nita wê vuac maviya ge. Maviya o duu nivimihi lêm, di he o vông yuac ti lec ngakwi lêm, léc a ob nêl vô xam bê vunac vunac wê he vông ge luu vunac vunac nivihha wê King Solomon vông ge vêl.

28 Nita wê vuac maviya mi le vac yuac gwêba di obêc titige pisaên vêl ge od ob nêx i la vac ngwax, léc Anutu vunac vô he nivihha. Mêgem xam xovô bêga bê Anutu ob viac xam nivihha luu nita maviya vêl. Léc vông vinên wê xam vông ge o xêkizêc lêm.

29 Om xam o léc vông nilôm i loc vô susu yaên yuu numên lêm, me xam o léc vông nilôm i vô viyin lec lêm.

30 Ên tibii madiluhu ge wê vông nilô la vô susu ninivi xen ge, dom Mag Anutu xovô susu wê ma vô xam ge.

31 Mêgem xam vông nilôm i loc vô Anutu xolac yuu ben tived lê, ge od Anutu obêc vông susu bêge vô xam hixôn.

*Kiyang lec susu nivihha lag puunê
(Matyu 6:19-21)*

32 “Xam kidu nipwo tya ga, xam xona ên i ma. Ên Mag Anutu xovô pyap nêb xam ob tu xomxo levac hixôn i vac i ben lag puunê.

33 Om xam vông susu wê xam vông ge mi tibii i kisuu, dêc xam vông mone vô tibii wê nêb susu maên ge ên i vô nivihha vô he. Dêc xam kituc susu nivihavihha i loc yêp lag puunê i tiyi xocbê

mone yêp vac kilong nivihha ge. Ên susu wê yêp lag puunê ge, tibii yôdac ti obêc vun lêm, di gwaakivac yuu susu nipipaa ti obêc vông i vô nipaên lêm.

³⁴ Ên vigwe wê susu nivihaviha wê xam vông ge la dô vac ge, xam ob vông nilôm la vô vigwe tige.

Nue yuac i le maviha

³⁵ “Xam viac xam dêc xam vêx let lec di byêx ngwax vac lam,

³⁶ di xam dô i tiyi xochê tibii yuac wê dô bin xomxo levac wê ob vena vac vizid ge, ên xomxo tyo obêc vena hi vigê lec vuayen ge od he i tax xumac lutibed.

³⁷ Om xomxo levac tyo obêc vena yê wê nue yuac dô maviha di yêpên ma ge od ob hi vixa pec ên he. A ob nêl hixôn nôn vô xam bê xomxo levac tyo obêc vêx nivimihi tiyi wê nue yuac mi vinyum ge di vông he dô kidu ti dêc ici va obêc titang yaên vô he.

³⁸ Di xomxo levac tyo obêc vena vô vîvuaên mahigun me obêc vô kwabo lec wê kokilêx ob vô vya ge, lêc nue yuac obêc dô di yêpên ma ge od ob hi vixa ên he.

³⁹ “Xam xovô lê. Xomxo ti wê i xumac ge obêc xovô buc wê tibii yôdac ob val lec ge od ob dô maviha mi bin i xumac êdêc tibii i o lêc loc vac i ben nilô mi vun i susu lêm.

⁴⁰ Om xam êno viac xam mi dô bin buc wê a Xomxo Nu obêc vena lec ge, ên buc wê xam obêc xovô lêm ge wê a obêc vena lec ge.”

Kiyang pilepacên lec nue yuac nivîha yuu nipaên

(Matyu 24:45-51)

⁴¹ Pita kinêg vô Yesu ên nêbê, “Apumtau, ông nêl kiyang pilepacên ga vô xecxe va, me ông nêl vô xomxo vîhati?”

⁴² Lêc Yesu nêl ên nêbê, “Xomxo yuac letya wê viac yuac hixôn piyôp nivîha ge? Xomxo levac obêc vînoo i ên nêb i viac lie yuac vîhati di vông yaên vô he i tiyi buc vîhati.

⁴³ Om xomxo levac tyo obêc vena yê wê nu yuac tige viac yuac wê i vông ge nivîha ge od ob hi vîxa ên i.

⁴⁴ A ob nêl hixôn nô n vô xam bê xomxo levac tige obêc vông nu yuac tyo tu levac mî viac susu wê i vông ge vîhati.

⁴⁵ Lêc nu yuac tige obêc xo bêga vac nîlô bê, ‘Tîbii levac la dô ilatikwê di o vena lutibed lêm’, om loc hi lie yuac vêx yuu vux, di ya di num levac di mav ge

⁴⁶ od xomxo levac obêc vena lec buc wê nu yuac tige lungên di o dô bin i lec ge lêm, om xomxo levac obêc vông myaviwen vô i di vông i la dô hixôn tîbii wê o vông i vin lêm ge.

⁴⁷ “Tîbii yuac ti obêc xovô môp wê i tîbii levac vông vô i ge lêc o viac mî vông i vô nô n lec lêm ge od levac tyo obêc pîsa i vô nipaên.

⁴⁸ Lêc tîbii yuac ti obêc lungên môp wê i tîbii levac nêb i vông ge, dêc vông ti so tiyi wê ob kô myaviwen nipaên lec ge od tîbii tyo obêc vông myaviwen nîpwo tya vô di hiên i luu vêlên ob ma. Ên xomxo wê kô susu tibeac vô Anutu ge, ge wê Anutu nêb i vông myaviwen tibeac vac.

Di xomxo obêc vông susu tibeac vô xomxo ti ên nêb i vông yuac ya ge od he obêc nêl nêbê, ‘Ông vông susu vô xe i luu vêl vac.’ ”

*Yesu yuac obêc hibû xomxo la yuu
(Matyu 10:34-36)*

⁴⁹ Yesu nêl bêga ên nêbê, “A lam ên a nêb a ob lii ngwax i yêp kibun ga, om a nilôg xo ên a nêbê i tum lutibed.

⁵⁰ Mêlêc viyin ti vô kwabo lec wê a ob kilê ge, lêc gên o val lêm, om a ob dô hixôn nilôg viyin levac di i miloc vô buc wê viyin tyo obêc lam la vêl ge lê.

⁵¹ Xam xo ên xam nêb a lam ên a nêb a ob vông kiyang malehe i yêp gê kibun ga, me? Ma vêl, a lam ên a nêb xomxo i hibû he sea lec a.

⁵² Om gwêbaga di obêc buc timuên hixôn ge od obêc môp bêga bê xomxo vigê vilu vac xumac ti obêc hibuma sea lec a lêg, lêc yuu dô kidu ngwe di yon dô kidu ngwe.

⁵³ Om he obêc hibuma, di ma yuu nu vux ob yêma nipaên, di ta yuu nu vêx ob yêma nipaên, di vêxta yuu yen vêx ob yêma nipaên.”

*Môp wê il ob xovô susu wê ob val timuên ge
(Matyu 16:2-3)*

⁵⁴ Pyap dêc Yesu nêl vô xomxo gee vihati ên nêbê, “Xam obêc wê mapitoc ti le vac viyobtoc ge od xam mi nêl ên xam nêbê lun ob val, dêc vixôhilôg, lun val tiyi xocbê xam nêl ge.

⁵⁵ Di buc wê lea ob val ge od xam nêl ên xam nêbê hiyôv ob linac nivîha, dêc vixôhilôg, hiyôv linac i tiyi wê xam nêl ge.

⁵⁶ Lêcom xam tibii kityooên, ên xam wê susu wê dô vac lag ge lê, léc xovô nivîha, di bêna léc xam dilungên môp wê Anutu vông gwêbaga vô xam mamnôn ge?”

*Il ob titô nêd kiyang
(Matyu 5:25-26)*

⁵⁷ Yesu nêl ên nêbê, “Bêna léc xam o vyac xovô môp nivîha mô lê?

⁵⁸ Xomxo ti obêc kô ông mi muu la kiyang ge od muu hi kiyang i yib lutibed vac môp wê muu gên loc ge, êdêc i o léc vông ông loc le vô hizap manôn dèc hizap i vông ông loc vô xêhîpu mi xêhîpu i vông ông loc kalabuhu lêm.

⁵⁹ A ob nêl vô ông bê ông ob la dô vac kalabuhu di hi myaviwen vihati i ma vêl lê.”

13

Xomxo wê o pilepac he lêm ge obêc yib

¹ Vô buc tige xomxo ya val vô Yesu mi val nêl xomxo Galili kitong vô i. Ge nêl lec he Galili ti wê he dihi bwoc sipsip ên he nêb ob si i tu daa vô Anutu lê, léc gavman levac Pailat vông nue lam hi he di kipyax he hi sea hixôn bwoc hi.

² Mêgem Yesu nêl vô he ên nêbê, “Xam xo ên xam nêbê Galili tige, he vông nipaên luu lie Galili vêl om he yib lec he nêl nipaên.

³ Lêcom a ob nêl vô xam bê he o yib lec ngwe bêge lêm. Lêcom xam xovô bê xam obêc pilepac xam lêm ge od xam obêc wib bêge êno.

⁴ Di xomxo Jerusalem vigê yuu di vixa vilu di sec yon (18) wê xumac vixa dia kipê mi hi he yib gê Siloam ge, xam xo ên xam nêbê he vông

nipaên luu lie Jelusalem baba vêl om he yib lec he nêl nipaên.

⁵ Lêcom a ob nêl vô xam bê he o yib lec kehe bêge lêm. Lêcom xam xovô bê xam obêc pilepac xam lêm ge od xam obêc wib bêge êno mê.”

Kiyang pilepacên lec xax ti wê nôl ma ge

⁶ Yesu nêl kiyang pilepacên ti vô he ên nêbê, “Xax kwacsung ti le vac xomxo ti yuac om xomxo tyo la yê ên nêb ob la yul nôl, lêc nôl ma,

⁷ om nêl vô xomxo ti wê mi viac i yuac ge ên nêbê, ‘Ngô lê. A lam ga tiyi klismas yon ên a nêb a ob yul kwacsung tiga nôl lê, lêc nôl ti o yux lec lêm. Om ông vuv vêl ên i o vô kibun hizi vêl vaxvax lêm.’

⁸ Lêc xomxo viacên tige nêl vô i ên nêbê, ‘Vông i le klismas ngwe ga hixôn di a den kibun yuu kô bwoc yaa mi tung vac kehe mi xê lê.

⁹ Di klismas ngwe timuên u ob xê lê, lêc vuac ge od i le, lêc vuacên ma ge od ông nêl di a vuv vêl.’ ”

Yesu vông vêx ti vô nivihâ lec vô buc sabat

¹⁰ Vô buc sabat ti Yesu nêl xolac vô xomxo vac xumac lilo ti.

¹¹ Lêc vêx ti dô hixôn he, di vimwo nipaên dô vac i nilô di vông yidac vô i tiyi klismas vigê yuu di vixa vilu di sec yon (18). Om vêx tyo nimi kizêc len gec om o tiyi wê ob le bôbac ge lêm.

¹² Lêc Yesu yê vêx tyo om keac i lam di nêl vô i ên nêbê, “Vêx, a vông ông yidac la vêl.”

¹³ Mêgem vyax vigê lec i di lutibed vêx tyo le bôbac di pimil Anutu.

14 Lêc xomxo levac ti wê viac xumac lilo ge ni nyag vô Yesu ên wê vông vêx tige vô nivîha lec vô buc sabat ge, om nêl vô xomxo tibeac gee ên nêbê, “Buc vigê vilu di sec ti yêp wê il ob vông yuac lec ge om xam ti obêc vông yidac ge od xam lam lec buc yuac ên xomxo i vông xam vô nimvîha lec, di xam o lêc lam lec buc sabat lêm.”

15 Lêc Apumtau Yesu luu i vya ên nêbê, “Xam tibii kityooên, ên xam mi la vac bwoc ben di la piwelac xam kau yuu donki lec buc sabat di didii he mi la vô mia ên xam nêb he i num.

16 Lêc vêx tiga Eblaham bue ti, lêc Seten ku i xôn tiyi klismas vigê yuu di vixa vilu di sec yon (18), om a piwelac viyin tige vêl ên i lec buc sabat. Lêc mêd xam wê ên xam nêb môp tibêge o nivîha lêm?”

17 Yesu nêl bêge om xomxo wê yê i nipaên ge ni yoc ên he, di xomxo vihati gee he xêyaa vô nivîha ên do levac vihati wê Yesu vông ge.

*Kiyang pilepacên lec vixôo yuu yis
(Matyu 13:31-33; Mak 4:30-32)*

18 Yesu nêl ên nêbê, “Anutu ben kehe ge tiyi vatya? A ob tixuu lec kiyang ti.

19 Ge tiyi xochê vixôo nôn nulen wê nipwo lee tya, lêc xomxo ti kô mi la nêx vac yuac mêd nôn tyo tyip mi vô levac di menac viyang viyang lam vông liwihi lec ngen mi dô lec.”

20 Nang dêc Yesu nêl ên nêbê, “Anutu ben kehe ge, a ob tixuu lec va?

21 Ge tiyi xochê yis nipwo tya wê vêx ti pilepac hixôn plaua levac om vông plaua vuac mi vô levac ge.”

Kiyang lec môp wê xomxo ob la vac Anutu ben ge

(Matyu 7:13-14,21-23)

²² Yesu la ên nêb ob la Jêusalem, lêc la vac vigwe levac yuu nipwo toto mi la nêl xolac vô xomxo.

²³ Lêc xomxo ti kinêg i ên nêbê, “Apumtau, xomxo wê Anutu obêc kô he mi he la dô maviha ge, obêc yuu tya, me?” Om Yesu nêl vô he ên nêbê,

²⁴ “Xam vông yuac xêkizêc êdêc vac loc vac vuayen nipwo. Ên xomxo tibeac obêc xo ên nêb he ob la vac vuayen nipwo tige lê, lêc tîyiên ma wê he ob la vac ge.

²⁵ Ên xomxo wê i xumac ge obêc kidi mi lam tung xumac lec, om xam ob le vixun di kituu vuayen di nêl bêga bê, ‘Apumtau, tax vuayen ên xe.’ Lêc obêc nêl vô xam bêga bê, ‘Xam lam gê na? Xam ge a lungên xam.’

²⁶ Lêc xam obêc luu i vya bêga bê, ‘Xe ga wê il mi xa mi mi dô, di ông mi nêl xolac vô xe vac xe bom ge.’

²⁷ Lêc obêc nêl vô xam bêga bê, ‘Xam ge a lungên xam. Xam ge tibii nipaên, om xam loc vêl ên a magnôn.’

²⁸ Om xam obêc wê bume Eblaham yuu Aisak di Jekop hixôn plopete vihati wê he la dô vac Anutu ben, dom xam ge wê Anutu obêc tii xam la dô vixun, di xam obêc byag di kic nivum lecma.

²⁹ Di tibii obêc kidi vac vigwe ninya vilu vilu di viwen wê hiyôv tyip lam ge di viwen wê hiyôv hoo la ge, mi la ya di dô vac Anutu ben.

³⁰ Om xam wê lê. Tibii wê xam nêb he timuên

ge ya ob lam la mugên, di xomxo wê mugên ge ya obêc lôm la timuên.”

*Yesu xo vigwe pisiv ên xomxo Jerusalem
(Matyu 23:37-39)*

³¹ Vô buc mahigun tige Palisi ya val nêl vô Yesu ên nêbê, “Ông sea vigwe ga di lam loc bangwe, ên Helot nêb ob hi ông wib.”

³² Lêc Yesu nêl vô he ên nêbê, “Xam loc nêl vô tibii kityooên tige bêga bê gwêbaga di titige wê a obêc tii vimwo nipaên vêl ên xomxo di vông xomxo yidac i vô nivîha lec, di duuma ge wê a obêc tiyôô yuac.

³³ Lêc gwêbaga di titige di duuma ge wê a ob la, ên plopete wê xomxo hi he yib ge, he o yib vac vigwe ya lêm. Nge, he yib vac vigwe Jerusalem tibed.

³⁴ “Di xam Jerusalem, xam ge wê xam hi plopete yib, di xomxo wê Anutu vông i loc vô xam ge, od xam nêx he ya ngidax. Buc tibeac ge a vông ên a nêb a ob kituc xam lôm vô a tiyi xocbê kokilêx wê mi kituc nue lax vac vinihi ngibi ge, lêc xam nêb a vôngên i ma.

³⁵ Om xam ngô lê. Anutu obêc sea xam bom i dô xel. Di a ob nêl vô xam bê xam ob wê a i tii vac nang lêm, di i mîloc vô buc wê xam obêc nêl bêga bê ‘Il ob pimil xomxo ti wê tu Apumtau manôn mi val ge.’”

14

Yesu vông xomxo yidac ti vô nivîha lec

¹ Buc sabat ti Yesu la vac Palisi levac ti xumac mi la ya hixôn i, lêc xomxo wê dô gee diyê i xôn.

² He dô lê, léc xomxo wê ninivi vô vuac vuac ge ti val vô Yesu,

³ om Yesu kinêg he wê xovô Moses xolac gee yuu he Palisi wê dô gee ên nêbê, “Tiyi wê il ob vông xomxo wê yidac ge i vô nivîha lec vô sabat, me?”

⁴ Lêc he o luu kiyang ti lax vô i lêm, om Yesu la hòm xomxo yidac tyo di vông i vô nivîha lec di vông i loc mî la.

⁵ Mêgem Yesu nêl vô xomxo gee ên nêbê, “Xam nume ti me bwoc ti obêc tô lôva madia lec buc sabat ge od tiiên ma wê xam ob pul i lôm lutibed lec sabat ge, me?”

⁶ Lêc he o luu kiyang ti lax vô Yesu lêm.

Xomxo i o léc yong he bê he xomxo levac lêm

⁷ Yesu yê xomxo wê lam ya vac Palisi tyo ben ge, léc yê wê he ya yong he nêb he ob dô lec sia nivîha wê xomxo levac mî dô lec gee, om Yesu nêl kiyang pilepacên ti vô he ên nêbê,

⁸ “Xomxo ti obêc nêl ông la vac vizid ti ge od ông o léc yong ông mî loc dô lec sia nivîha wê xomxo levac ob dô lec ge lêm. Ên xomxo levac ngwe obêc val ge

⁹ od xomxo ti wê myêl vizid tige obêc nêl vô ông bê, ‘Kidi lec mî loc dô ganê di vông sia vô xomxo levac tige mî i dô lec,’ di ông nim obêc yoc ên wê ông la dô timuên.

¹⁰ “Om xomxo ti obêc nêl ông la vac vizid ti ge od ông loc dô timuên ti lê, léc xomxo ti wê myêl vizid tige obêc nêl vô ông ên nêbê, ‘Ngîdêg, lam dô lec sia nivîha ga’ od ông obêc tu xomxo levac ti vô xomxo gee manôn.

11 Ên xomxo ti obêc yong i nêb i xomxo levac ge od Anutu obêc yê i xocbê xomxo pileva, lêc xomxo ti obêc vông i vô nipwo ge od Anutu obêc pimil i dĩ vông i lê vô levac.”

12 Pyap dêc Yesu nêl vô Palisi ti wê myêl vizid tige ên nêbê, “Ông obêc myêl vizid ge od ông o lêc nêl tame mame lime ngidême, me xomxo wê susu tibeac ge i lam lêm, ên he ge wê he obêc myêl vizid nang mi vông myaviwen vac vô ông.

13 Nge, ông obêc myêl vizid ge od ông tyuc xomxo wê nêl susu maên hixôn he wê o xêkizêc lêm dĩ he wê vixa nipaên hixôn he wê ma tocên gee i lam.

14 Xomxo tige o tiyi wê ob vông myaviwen vac vô ông ge lêm, lêc Anutu ob vông myaviwen nivîha vô ông vô buc timuên wê xomxo nivîha ob kidi lec vac yibên ge om ông ob dô hixôn xêmyaa nivîha.”

*Kiyang pilepacên lec vizid
(Matyu 22:1-10)*

15 He gên ya mi dô vac Palisi tyo ben, lêc xomxo ti vac he mahigun ngô kiyang wê Yesu nêl lec vizid ge om nêl vô Yesu ên nêbê, “Xomxo wê ob la ya mi dô vac Anutu ben lag puunê ge obêc dô hixôn xêyaa nivîha.”

16 Lêc Yesu nêl kiyang pilepacên vô i bêga ên nêbê, “Xomxo ti nêb ob myêl vizid levac ti om vông kiyang la vô xomxo tibeac ên nêb he i lam ya.

17 Om buc wê ob ya yaên ge od vông nu yuac ti la nêl vô xomxo wê ob lam vac vizid ge ên nêbê, ‘Yaên noc pyap, om xam lam ên lam wa.’

18 “Lêc he toto nêl lax vô i ên nêbê he laên ob ma. Om ti nêl vô i ên nêbê, ‘A kisuu kibun ti, om a ob la xê, om ông lôc nêl vô tibi levac bê o tiyi wê a ob loc ge lêm.’

19 Di ti nêl vô i ên nêbê, ‘A kisuu bwoc kau vigê yuu om a ob la tixuu mi xê bêc obêc vông yuac niviha, om ông lôc nêl vô xomxo levac bê o tiyi wê a ob loc ge lêm.’

20 Di ti nêl ên nêbê, ‘A kô vêx paha ti om a locên ob ma.’

21 “Mêgem nu yuac tyo lax mi la nêl kitong vô i xomxo levac, mêd xomxo levac tyo ngô di xêyaa vô myavinê di i nêl vô nu yuac tyo ên nêbê, ‘Ông loc tup vô môm levac yuu nipwo vihati vac vigwe levac ga di tyuc xomxo wê nêl susu maên hixôn he wê o xêkizêc lêm ge di he wê vixa nipaên hixôn he wê manôn tocên gee vihati i lam.’

22 Om nu tyo la vông i tiyi dêc lôm nêl vô i ên nêbê, ‘A vông i tiyi wê ông nêl ge lê, lêc vigwe gên o pup lec lêm.’

23 “Mêgem xomxo levac tyo nêl vô i ên nêbê, ‘Om ông loc vô môm nipwopwo wê la vac yuac ge vihati di loc kidu xomxo vihati ên he i lam pup lec a xumac.

24 Lêc a nêl vô ông bê xomxo wê a tyuc he taxlee lêc he o lam lêm ge, ti ob ya vizid wê a vông ge hixôn lêm.’ ”

Kiyang lec xomxo wê nêb ob timu vô Yesu ge (Matyu 10:37-38)

25 Xomxo tibeac hiwocên timu vô Yesu vixa mi he la, lêc Yesu pop i di nêl vô he ên nêbê,

26 “Xomxo ti obêc nêb timu vô a xolac, lêc vông nilô lax vô tae mae lie di vinêe nue di ici va, di

o vông nilô la diluhu vô a lêm ge od o tiyi wê ob tu a nug ge lêm.

²⁷ Di xomxo wê o kilê viyin lec tiyi xocbê kilê xax pola ge mi timu vô a lêm ge, ge o tiyi wê ob tu a nug ge lêm.

²⁸ “Om xam ngô lê. Xam ti obêc xo ên xam nêb xam ob lox xumac vixa dia ti ge od i dô mi xovô bê mone dô i tiyi wê ob lox xumac tige ya di i pyap ge, me?”

²⁹ Obêc xovô bêge tax lêm ge od obêc yev teac vac pyap, lêc o tiyi wê ob lox xumac tige pyap ge lêm, di xomxo vihati ob yê di so vya vô ông

³⁰ di nêl bêga nêbê, ‘Xomxo tige nêb ob lox xumac lê, lêc o lox i pyap lêm.’

³¹ “Di kiyang ngwe, king ti wê nue vevac 10,000 ge nêb ob la vông vevac vô king ngwe wê nue vevac 20,000 ge od i dô mi xovô bêga bê xêkizêc wê nue vông ge tiyi wê obêc nginoo king ngwe wê nue 20,000 ge vêl ge, me he tiyiên ma.

³² Lêc obêc xovô bê tiyiên ma ge od king ngwe ge i gên dô teva di i vông xomxo mangwe i loc ên he i viac kiyang bê vevac obêc ma.

³³ “Kiyang bêge, mêgem xam xovô bê xam ti obêc vô nimim vô susu wê i vông ge vihati lêm ge od o tiyi wê ob tu a nug ge lêm.

*Kiyang pilepacên lec sol
(Matyu 5:13; Mak 9:50)*

³⁴ “Sol ge nivîha, lêc obêc vô nyen maên ge od il obêc vông bêna vô ên i vô nyen i tii vac nangê?”

³⁵ Ên sol wê nyen maên ge o nivîha tiyi wê il ob vông yuac ya ge lêm, om il ob nêx i la xel. Xam ninyam obêc yêp ge od xam ngô di xovô.”

15

Kiyang pilepacên lec bwoc sipsip ti (Matyu 18:12-14)

¹ Tîbii nipaên wê mi kô takis gee hixôn tîbii nipaên yaya, he tibeac la vô Yesu ên nêb ob ngô i vya.

² Lêc he Palisi yuu xomxo wê xovô Moses xolac gee yê di vô mya nipaên vô di nêl ên nêbê, "Xomxo tya ganê kô tîbii nipaên lec di ya mi dô hixôn he."

³ Mêgem Yesu nêl kiyang pilepacên ti vô he ên nêbê,

⁴ "Xam ti obêc viac bwoc sipsip 100 lêc ti xôa obêc ma ge od obêc sea sipsip 99 gee i le di lax myag ti wê xôa ma ge.

⁵ Di obêc yêvô ge od obêc kilê lec kidiac di lax mi la ben hixôn xêyaa nivîha,

⁶ di lax nêl lie hixôn nipîpu ya lam di nêl vô he ên nêbê, 'Xam lam ên il xôn ob dô hixôn xêdyaa nivîha di pîmil a bwoc, ên a bwoc ga xôa ma lê, lêc a la xêvô mi kô mi vena nang.'

⁷ Kiyang bêge mêgem a ob nêl vô xam bê xomxo wê vông nipaên ge ti obêc pilepac i ge od he wê dô kisii ganê obêc hi vîxa ên i, nginoo xomxo 99 wê he nêb he vô nivîha lec pyap om he ob pilepac he lêm ge."

Kiyang pilepacên lec mone wê xôa ma ge

⁸ Yesu nêl ên nêbê, "Vêx ti mone vigê yuu, lêc ti xôa ma om byêx ngwax vac lam di pîtyep xumac nilô di myag.

⁹ Myag lêc yêvô om nêl lie hixôn nipîpu ya lam di nêl vô he ên nêbê, 'Xam xêmyaa i vô nivîha

hixôn a, ên a mone xôa ma, lêc a xêvô i tii vac nang.’

¹⁰ Kiyang bêge om a ob nêl vô xam bê xomxo wê vông nipaên ge ti obêc pilepac i ge od Anutu nue angela obêc hi vixa ên i tiiy xocbê vêx tige hi vixa ên mone wê yêvô ge.”

Kiyang pilepacên lec nu ngivihi ti wê sea ma di la ge

¹¹ Yesu nêl vô he ên nêbê, “Xomxo ti do, di i nu tuc yuu nu môn.

¹² Lêc nu môn nêl vô ma ên nêbê, ‘Mag, kibun yuu mone wê ông nêl a lêg lec ge, a ob kô vihati.’ Om ma vông byed vô susu vô yuu, om nu tuc kô viwen di nu môn kô viwen.

¹³ He o dô buc xuhu dia lêm. Nge, dô nipwo tya, lêc nu môn viduba i susu hixôn mone wê ma vông vô i ge vihati di loc mi la vigwe teva ti, di la nêx mone la sea lec môp nipaên.

¹⁴ I nên mone ma vêl, di vip mabu yêp vac vigwe tige di susu ma ên i.

¹⁵ Om la vông yuac vô tibii viyang tige ti, lêc tibii tyo vông i la bwoc ben ên nêb i loc viac i bwoc.

¹⁶ Mêlêc vip den i mabu om xo ên nêb ob ya xax nôn wê bwoc mi ya ge ên i den i, lêc xomxo ti o vông yaên ti vô i mi i ya lêm.

¹⁷ “Mêd i piyôp vô nivaha di i xovô nang, om xo ên nêbê, ‘Nue yuac wê mag vông ge, yaên tibeac dô vô he, dom a va ga, vip obêc den a xib mê.

¹⁸ Mêgem a ob kidi mi lax mi la vô mag, mi lax nêl vô bê, “Mag, a vông i so vô Anutu di vông i so vô ông hixôn,

19 ði a o nigviha tiyi wê ông ob nêl bê ông num a ge lêm. Om ông vông a tu ông num yuac ti.” ’

20 “Nêl kiyang bêge pyap, mêd kidi mi la ên nêb ob lax mi la vô ma, lêc gên mîla teva ði ma yê ma la wê nu môn val ge, om xo vigwe pisiv ên ði tup mi la ði mîla kiva xôn.

21 Mêd nu môn nêl vô ma ên nêbê, ‘Mag, a vông i so vô Anutu ði vông i so vô ông hixôn, om a o nigviha tiyi wê ông ob nêl bê ông num a ge lêm.’

22 Ma ngô lê, lêc nêl vô nue yuac ên nêbê, ‘Xam loc kô ngakwi dia nivîha ti mî lam vinyum lec môn. ði xam kô ling ti mî lam su lec i vigê ði kô su mî lam su lec i vîxa xôn.

23 ði loc kô bwoc kau nu wê gên ligên nivîha ge ti mî lam hi, ên il ob xa hixôn xêdyaa nivîha,

24 ên a nug tiga xocbê la yib ila lê, lêc gwêbaga dô mavîha, ði xôa ma ila lê, lêc gwêbaga il xêvô i nang.’ Om he myêl vizid mî ya ði dô hixôn xêyaa nivîha.

25 “ði nu tuc la dô vac yuac ði val vô kwabo vô xumac lêc val ngô wê he yoo ge,

26 om keac nu yuac ti lam ði kinêg vô i ên nêbê, ‘Xam vô va?’

27 Lêc nu yuac tige nêl ên nêbê, ‘Lim môn val gwêba, om mam hi bwoc kau nu wê gên ligên nivîha ge ti mî myêl vô lim môn ên wê la dô lê, lêc vena nivîha vô i ge.’

28 Li tuc ngô lêc xêyaa vô myavinê om nêb ob la vô ma yuu li môn vac xumac lôma lêm. Om ma lop mî lam vîxun ði lam viac kiyang vô nu tuc.

²⁹ Lêc nu tuc nêl lax vô ma ên nêbê, 'A ga wê a vông yuac levac vô ông tiyi klismas tibeac di a o pwooc ông vyam ti vac lêm, lêc ông o nêl a lêg lec bwoc vimek nu ti ên xe lige myêl mi xa di dô hixôn xêmyaa nivîha lêm.

³⁰ Di num môn ge wê kô ông mone mi la vông i la lec vêx yôdac lê, lêc gwêbaga vena om ông hi bwoc levac wê lig nivîha ge ti vô i.'

³¹ "Mêd ma nêl vô nu tuc ên nêbê, 'Tuc, u mi dô ga luta, om susu wê a vông ge vîhati tu ông xe.'

³² Di gwêbaga il vîhati ob dô hixôn xêdyaa nivîha ên wê lim môn vena ge, ên xôa ma ila om il xê xochê la yib ge, lêc la dô mavîha om vena gwêbaga di il xê i manôn nang.' "

16

Kiyang pilepacên lec tibii yuac nipaên ti

¹ Nang dêc Yesu nêl vô nue ngivîhi ên nêbê, "Xomxo susu tibeac ti dô, di nu yuac ti viac i susu, lêc xomxo ya la nêl kitong vô xomxo levac tyo ên nêbê, 'Num ti wê bin ông yuac ge mi vông ông susu yuu mone la vax vax.'

² Om xomxo levac tige keac nu yuac tyo lam di kinêg vô i ên nêbê, 'Ông vông bêna lêc a ngô xochê kiyang yêp vô ôngê? Ông loc kivuu a susu wê ông viac ge vîhati lec kipihac ti dêc vông i lam ên a xê, ên ông ob viac a yuac i tii vac lêm.'

³ "Om nu yuac tyo xo bêga ên nêbê, 'Om a ob vông bêna? Ên xomxo levac obêc tii a vêl ên i yuac gwêbaga, lêc xêkizêc wê a vông ge tiiên

ma wê a ob kiden kibun ge, di a nig yoc ên wê a ob kitaa susu vaxvax vô xomxo ya ge.

⁴ Lêcom ga a xovô môm wê a ob vông ge ti, êdêc buc wê xomxo levac obêc tii a vêl ên i yuac ge od xomxo ya i kô a mi loc vac ben di viac a.'

⁵ Om môm wê xovô ge bêga ên nêbê keac tibii wê i xomxo levac myaviwen yêp vô ge he toto lam, dêc kinêg ti wê val taxlee ge ên nêbê, 'Ông kô susu vaba vô xomxo levac lêc myaviwen gên yêpê?'

⁶ Om xomxo tyo nêl vô i ên nêbê, 'Ge a kô wel vac dlam 100.' Om nu yuac tyo nêl vô i ên nêbê, 'Hôm kipihac wê ông myaviwen yêp lec ge di kivuu ông myaviwen i tô mi loc xochê dlam wel 50.'

⁷ Nang dêc xomxo ngwe val om nu yuac tyo kinêg i ên nêbê, 'Ông myaviwen vaba yêpê?' Lêc xomxo tyo nêl ên nêbê, 'Pidi yul 100.' Om nu yuac tyo nêl vô i ên nêbê, 'Hôm kipihac ga di kivuu ông myaviwen bê pidi yul 80.'

⁸ "Om xomxo levac tyo yê môm nipaên wê nu yuac tige vông ge, lêc pimil nu yuac tige ên wê vông môm hixôn piyôp nivaha ge. Ên xomxo wê vông nilô la vô susu kibun ga ge, he kô piyôp levac lec môm yuu yuac kibun ga luu xomxo wê dô vac xêseac ge vêl.

⁹ "Om a ob nêl vô xam bê xam ngidu xomxo xôn ya mone yuu susu kibun ga ên he xêyaa i vô nivaha vô xam, di buc timuên wê xam vigêm obêc sea mone ge od Anutu i kô xam mi xam loc dô vac i ben luta lêc luta.

¹⁰ "Xomxo ti obêc viac yuac nipwopwo wê

xomxo nêb i vông ge nivîha ge od obêc viac yuac levac nivîha êno bêge, lêc xomxo ti obêc viac yuac nipwopwo nivîha lêm ge od obêc viac yuac levac êno nivîha lêm.

¹¹ Mone yuu susu kibun ga, ge susu pileva, lêc xam obêc viac nivîha lêm ge od letya obêc vông vizid wê nôn nivîha ge ti vac xam vigêmê?

¹² Di xam obêc viac xomxo ngwe susu nivîha lêm ge od letya ob vông susu vô xam ên nêb i tu xam nêbê?

¹³ “Xomxo ti o tiyi wê ob vông yuac vô xomxo levac yuu ge lêm, ên xêyaa obêc vin lec ngwe di ob yê ngwe nipaên, me obêc vông nilô la vô ngwe di vô nîmî vô ngwe. Om o tiyi wê xam ob vông nilôm i loc vô Anutu yuu xôn mone ge lêm.”

Yesu kiyang lec môp yaya

¹⁴ Palisi ngô kiyang wê Yesu nêl ge lêc vô mya nipîpaa vô, ên he xêyaa vin lec mone luu vêl.

¹⁵ Om Yesu nêl vô he ên nêbê, “Xam ge wê xam yong xam ên xam nêbê xomxo i yê xam nêbê xam nivîha, lêc Anutu xovô xam nilôm nêb nipaên, ên môp wê xomxo yê nêb nivîha ge, ge wê Anutu yê ên nêb juda juda nipaên.

¹⁶ “Moses xolac hixôn plopete kiyang yêp di i val tyip vô buc wê Jon lipac xomxo ge, di vô buc wê Jon vông ge di i val gwêbaga, a nêl xolac paha wê Anutu ben ge vô xomxo, mêgem xomxo tîbeac nilô kidu he nêb he ob tu Anutu nue mî la dô vac i ben.

¹⁷ Lag yuu kibun obêc la xôa ma, lêc Moses xolac bo ti obêc la xôa ma hixôn lêm.

18 “Xomxo ti obêc sea vinê di la kô vêx bangwe ge od ge vông yôdac vêx yuu vux, di xomxo ti obêc kô vêx ti wê liya sea i di la ge od ge vông môp yôdac vêx yuu vux.”

Xomxo wê susu tibeac ge ti yuu Lasalas

19 Nang dêc Yesu nêl ên nêbê, “Xomxo susu tibeac ti dô dêc vinyum ngakwi nivihaviha di ya yaên nivihaviha tiyi buc vihati.

20-21 Dêc xomxo susu maên ge ti dô lêngêbê Lasalas, lêc mi yêp vô xomxo susu tibeac tyo vuayen, ên nêb ob ya yaên myapipu wê tô mi la vac tevol kwa ngibi ge, lêc kityax dô lec Lasalas ninivi vihati om noo lam mi tep lec.

22 “Yuu mi dô di buc ti lê, lêc Lasalas yib di angela lam kô i mi la tung i hixôn Eblaham vac Anutu ben lag puunê. Nang dêc xomxo susu tibeac tyo yib nang mi lie yev,

23 di i la dô vac vigwe nipaên di kô myavinê levac mi dô, dêc yê ma la kisii lêc yê Eblaham wê dô tevabanê di Lasalas dô hixôn i ge.

24 Mêgem tyuc vya levac ên nêbê, ‘Mag Eblaham, ông xo vigwe pisiv ên a, di vông Lasalas i lam tinyum vigê liyihi vac mia di kô mi lam kitiv lec a get ên i vô ningigooên vô a, ên ngwax ya a nignivi vô myavinê levac.’

25 “Lêc Eblaham nêl vô i ên nêbê, ‘Nuge, ông xovô lê. Ên buc wê ông dô kibun ge, od ông dô vac nivihã hixôn susu nivihã, di Lasalas dô vac nipaên nôn, lêc gwêbaga Lasalas dô vac nivihã yuu malehe di ông va dô vac nipaên yuu myavinê.

²⁶ Dì kiyang ti yêp bêga nêbê vun madia ti yêp kisuu xe di xam lec, om xomxo ti obêc nêb kidi vac ga di loc vô xam ge od tiyiên ob ma, di ngwe obêc nêb kidi vac xam mi lam vô xe ge od tiyiên ob ma.'

²⁷ "Mêd xomxo susu tibeac tyo nêl ên nêbê, 'Mag Eblaham, a kitaa ông bê ông vông Lasalas i lôc mi loc mag ben,

²⁸ ên a lige vux vigê vilu dô, om a nêb i loc nêl vô he bê he i sea môp nipaên êdêc he i o lêc lam kô myavinê nipaên hixôn a lêm.'

²⁹ "Lêc Eblaham nêl vô i ên nêbê, 'Kiyang wê Moses he plopete kivuu ge yêp pyap, om he i ngô.'

³⁰ Lêc xomxo tyo nêl ên nêbê, 'Mag, ge tiyiên ma, lêc xomxo ti obêc kidi lec vac yibên mi la nêl kiyang vô he ge od he obêc pilepac he.'

³¹ Lêc Eblaham nêl ên nêbê, 'He ob ngô Moses he plopete kiyang mi vông i vin lêm ge od xomxo ti obêc kidi lec vac yibên mi lax ge od he obêc vông i vin xomxo tige vya êno lêm.' "

17

Môp wê ob vông xomxo vô nipaên ge (Matyu 18:6-7,21-22; Mak 9:42)

¹ Yesu nêl vô nue ngivihî ên nêbê, "Môp nipaên toto yêp wê ob vông xomxo vô nipaên ge, lêc xomxo ti wê didii xomxo vac nipaên ge obêc kô myaviwen levac lec.

² Xomxo tibêge, xomxo ob nux ngidax viyin lec i kwa di nêx i la vac gwec madia ge od nivihî,

êdêc i o lêc vông xomxo wê xovôên ma ge ti i vô nipaên lêm.

³ Om xam viac xam nivîha. Di lime ti obêc vông i so ge od ông nêl i nên soên vô i, di obêc pilepac i ge od ông kitya i nên nipaên vêl.

⁴ Di lim tyo obêc vông i so vô ông lu vigê vîlu di sec yuu lec buc ti, di lam vô ông lu vigê vîlu di sec yuu lêc nêl ên nêbê, ‘A vông i so vô ông’ ge od ông kitya i nên nipaên tige vîhati vêl.”

Môp vông vinên

⁵ Apumtau Yesu nue ngivîhi nêl vô i ên nêbê, “Xe nêb ông vông xe nêm vông vinên i vô levac.”

⁶ Lêc Apumtau nêl vô he ên nêbê, “Xam nêm vông vinên obêc nipwo tya tiyi xocbê vixôô nôn nulen ge od xam tiyi wê xam ob nêl vô xax levac tige bê, ‘Ông pul ông vêl ên kibun di loc ên loc yev ông vac gwec’ ge od obêc vô nînya lehe vô xam.”

Môp wê nue yuac ob vông ge

⁷ Yesu nêl ên nêbê, “Xam nume yuac ti obêc sap kibun me viac bwoc di vena ge od ông ob nêl bêna vô i? Ông ob nêl vô bê, ‘Ông lam tô mi dô kibun mi wa yaên’?”

⁸ Ông ob nêl tibêge lêm. Nge, ông ob nêl vô bê, ‘Ông viac ông di myêl yaên mi duu, di kô mi lam ên a ob xa di num tax, dêc ông wa di num timuên.’

⁹ Di num yuac tige obêc nêl bêna vô ông? Obêc nêl bê ông pimil i ên wê vông yuac wê ông nêl ge, me? Ob nêl tibêge lêm, ên ge i yuac wê mi vông ge.

¹⁰ Om xam êno, xam obêc vông yuac vihati tiyi xochê Anutu nêl vô xam ge od xam o lêc nêl bê Anutu i pimil xam lêm. Nge, xam nêl bêga bê, 'Xe tibii yuac pileva. Xe o tiyi wê xe ob nêl bê Anutu i pimil xe ge lêm. Ên yuac wê xe vông ge, Anutu vông vac xe vigêm om xe vông.' "

Yesu vông xomxo kityax mahizihizi vigê yuu vô nivîha lec

¹¹ Yesu la ên nêb ob la Jelusalem, lêc la vac Samelia yuu Galili ben yôg,

¹² mi la vac vigwe ti, lêc xomxo kityax mahizihizi vigê yuu yê i, lêc le teva

¹³ di tyuc vya levac ên nêbê, "Apumtau Yesu, xo vigwe pisiv ên xe."

¹⁴ Om Yesu yê he di nêl vô he ên nêbê, "Xam loc ên loc hilung nimnivi vô xomxo wê mi dô vac xumac ngibua ge lê ên he i yê bê xam nimnivi vô nivîha lec." Om he dila vô môp lêc he ninivi vô nivîha lec.

¹⁵ Om he yê wê ninivi vô nivîha lec ge, lêc he ti pop mi lax mi la vô Yesu di pimil Anutu ya vya levac,

¹⁶ di yev vixa kitu vac di kipôm manôn vô Yesu vixa kwa ngibi di pimil i ên wê vông i vô nivîha lec ge. Xomxo tige tibii Samelia ti.

¹⁷ Mêd Yesu nêl ên nêbê, "A vông xomxo vigê yuu vô nivîha lec lê, lêc he vigê vilu di sec yuudiyuu la na?"

¹⁸ Tibii tived ga wê vena pimil Anutu ge, dom he baba wê Yuda ge ti o vena lêm."

19 Mêd Yesu nêl vô tibii Samelia tyo ên nêbê, “Kidi lec mi lôc bom, ên vông vinên wê ông vông ge wê vông ông nimmivi vô nivîha lec.”

*Yesu buc wê ob lop mi lôm ge
(Matyu 24:23-28,37-41)*

20 Palisi ya val kinêg vô Yesu ên nêbê, “Buc wê Anutu obêc lam tu king mi xomxo la vac i kwa ngibi ge obêc yelacna?” Lêc Yesu nêl ên nêbê, “Xam ob wê do ti lê lêc xovô bê Anutu buc wê ob tu king ge val ge lêm.

21 Di xomxo tîyiên ma wê ob yê mi nêl bê, ‘Wê, tyo val ga’ me ‘Tyo dô ganê’. Xam ngô lê. Anutu lam tu king vac xam mahîgun pyap.”

22 Mêd Yesu nêl vô nue ngivîhi ên nêbê, “Obêc buc timuên ge od xam obêc zid bê Xomxo Nu buc i vena lutibed ên xam wê, lêcom xam wêên ob ma.

23 Di xomxo ya obêc nêl vô xam bê, ‘Wê, tyo dô ganê,’ me ‘Tyo val ga.’ Lêc xam o lêc loc vô he vîxa lêm.

24 Ên buc wê Xomxo Nu obêc vena ge od obêc vena tîyi xocbê deac hîxelac lutibed di xêseac linac la vac vigwe vîhati ge.

25 Mêlêc Xomxo Nu obêc kô myavîné levac tax di xomxo wê dô gwêbaga obêc vô nîmi vô i.

26 “Lêc buc timuên wê Xomxo Nu obêc vena ge od xomxo obêc dô i tîyi xocbê xomxo dô vô Nôa buc ilage di Xomxo Nu ob vena.

27 Ên xomxo ilage ya di num di iima mi dô, di i mîla tyip lec buc wê Nôa la dô vac sip nîlô ge lê, lêc lutibed mia butac mabu di lam hi xomxo vîhati yib mîma vêl.

28 “Di Lot buc bêge êno, ên xomxo ya di num di kisuu susu voma di vông yuac lec yaên di lox xumac mi dô,

29 léc buc wê Lot kidi gê Sodom mi la ge od ngwax yuu ngidax myavinê tô gê lag puunê tiyi xocbê lun val ge mi lam hi xomxo gee yib mima vêl.

30 Om buc wê Xomxo Nu obêc vena le seac ge od xomxo obêc dô mi vông bêge êno.

31 “Obêc buc tige léc xomxo ti dô lec xumac kisii ge od i o léc lop mi lax kô i susu vac xumac lôma lêm, me xomxo ti obêc la dô vac yuac ge od i o léc lax mi la ben lêm. Nge, susu i dô di xomxo i loc nê n mô.

32 Xam xovô Lot vinê wê tu ngidax mi le vac môp ge.

33 Ên xomxo ti obêc nêb viac ninivi ên viyin yuu yibên ge od maviha wê i vông ge obêc yib. Léc xomxo ti obêc sea i ninivi lec a lêng ge od obêc dô maviha yuu nivaha.

34 “A ob nêl vô xam bê obêc buc tige xomxo yuu ob diyêp lec pêt ti vô bucên, léc Anutu obêc kô ngwe di sea ngwe dô.

35 Di vêx yuu obêc divông yuac ti mi dô, léc Anutu obêc kô ngwe di sea ngwe dô.

36 [Di vux yuu obêc dô vac yuac ti lê, léc Anutu obêc kô ngwe di sea ngwe.]”

37 Mêd nue ngivihi kinêg vô Yesu ên nêbê, “Apumtau, kiyang tige obêc vô nô n lec gê na?” Léc Yesu nêl vô he ên nêbê, “Xam xovô bê susu wê yib mi pital ge obêc yêp vac vigwe ti ge od menac byang kitucma di la lec vigwe tige.”

18

Kiyang pilepacên lec vêxôv ti yuu hizap nipaên ti

¹ Mêd Yesu nêl kiyang pilepacên ti vô nue ngivihî, ên nêb ob vông xovôên vô he bê he i kitaa i tiyi buc vihati di ni ma lecên i ma.

² Om nêl kiyang pilepacên bêga vô he ên nêbê, “Hizap ti dô vac vigwe ti, léc o xona ên Anutu lêm di yê xomxo vihati tiyi xocbê susu vidaaên ge.

³ Di vêxôv ti dô vac vigwe tige, léc la mi kitaa hizap tige tiyi buc vihati ên nêbê, ‘Tibii ti nêb ob vông kiyang vô a, om a nêb ông ngidu a xôn ên a nêg kiyang.’

⁴ Léc hizap o vông i vin i vya lutibed lêm, di buc tibeac la vêl lê, léc hizap tyo xo bêga ên nêbê, ‘A o xona ên Anutu lêm, di a o xona ên xomxo ti lêm. Nge, a xê he tiyi susu vidaaên.

⁵ Lêcom vêxôv tige môci lam mi kitaa a nginong om a obêc ngidu i xôn ên i kiyang, ên i o léc lam nginong nginong mi vông a nig i ma lêm.’ ”

⁶ Mêd Apumtau Yesu nêl vô nue ngivihî ên nêbê, “Xam xovô kiyang wê hizap nipaên tige nêl ge lê.

⁷ Om xam xo ên xam nêbê va? Xomxo wê Anutu vinoo he pyap nêb he tu ixê ge, he obêc kiyag vya lec Anutu tiyi bucên yuu vidiiên vihati ge od Anutu obêc ngô he vya lêmê? Di obêc ngidu he xôn lutibed lêmê?

⁸ A ob nêl vô xam bê Anutu obêc ngô he vya di ngidu he xôn lutibed. Léc a ob kinêg vô xam bê buc wê Xomxo Nu obêc lop mi lôm ge od obêc yê bê xomxo vông i vin, me o vông i vin lêm?”

Kiyang pilepacên lec Palisi ti yuu tibii takis kôên ngwe

⁹ Yesu nêl kiyang pilepacên tiga vô xomxo ya wê nêb he tibii vông vinên nivîha di yê xomxo baba ên nêb he xomxo vîdaaên ge, om nêl bêga vô he ên nêbê,

¹⁰ “Xomxo yuu la vac Anutu xumac ngibua ên nêb ob la kitaa, Palisi ngwe di tibii takis kôên ngwe.

¹¹ Om Palisi tyo la le di kitaa vac nilô bêga ên nêbê, ‘O Anutu, a pimil ông ên wê a o nipaên tiyi xobê xomxo baba ge lêm, ên he mi vông môm yôdac susu yuu yôdac vêx yuu vux di môm nipaên yaya. Di a o nipaên tiyi xobê tibii takis kôên ganê lêm.

¹² Ên a ga wê a mi ngibua yaên lec buc yuu yuu tiyi da vîhati, di a mone yuu susu wê a mi kô ge a mi tung vigê yuu yuu, om a mi vông kidu ti vô ông.’

¹³ Di tibii takis kôên ngweo mila le teva, di o lax ma la kisiinê xobê môm wê xomxo baba mi vông ge lêm. Nge, xovô nêb i tibii nipaên om kituu pikopac di kitaa bêga ên nêbê, ‘O Anutu, ông xo vigwe pisiv ên a di kitya a nêg nipaên vêl, ên a ga tibii nigpaên.’ ”

¹⁴ Om Yesu nêl ên nêbê, “A nêl vô xam bê tibii takis kôên ge Anutu kitya i nên nipaên vêl di yê i nivîha di i lax mi la ben, di Palisi ge Anutu o yê nivîha lêm. Ên xomxo wê ob yong ici va ge, ge wê Anutu obêc vông i vô nipwo lec, di xomxo wê vông ici vô nipwo lec ge, ge wê Anutu ob pimil i di vông i lê vô levac.”

*Yesu kitaa lec nipwo
(Matyu 19:13-15; Mak 10:13-16)*

¹⁵ Xomxo kô nue nipwo mi la vô Yesu, ên nêb i vyax vigê lec he di kitaa lec he, lêc Yesu nue ngivihi yê di vô mya nipaên vô he.

¹⁶ Lêc Yesu keac nipwo lam di nêl ên nêbê, “Vông nipwo i lam vô a di xam o le vac he xôn lêm, ên xomxo tibêge wê ob la dô vac Anutu ben ge.

¹⁷ A nêl hixôn nô n vô xam bê xomxo ti obêc vông i vin Anutu mi la vac i kwa ngibi tiyi xocbê nipwo mi la vac tae mae kwa ngibi lêm ge od o tiyi wê obêc la dô vac Anutu ben ge lêm.”

*Xomxo wê susu yuu mone levac ge
(Matyu 19:16-30; Mak 10:17-31)*

¹⁸ Xomxo levac ti kinêg vô Yesu ên nêbê, “Xolac kehe nivîha, a obêc vông bêna êdêc dô magviha luta lêc luta?”

¹⁹ Lêc Yesu nêl vô i ên nêbê, “Bêna lêc ông nêb a nivîha? Xomxo nivîha ti o dô lêm. Anutu vaci nô n tibed wê nivîha.

²⁰ Ông xovô xolac wê Anutu nêl vô Moses ên nêbê, Ông o lêc vông môp yôdac vêx yuu vux lêm. Ông o lêc hi xomxo i yib lêm. Ông o lêc vun xomxo ngwe susu lêm. Ông o lêc nêl kiyang kityooên lec xomxo ti lêm. Ông loc vac tam yuu mam vya kwa ngibi.”

²¹ Om xomxo levac tyo nêl ên nêbê, “Buc wê a gên nipwo di i val tyip gwêbaga, a viac xolac gee vîhati mi vông i vô nô n lec.”

²² Yesu ngô tige, di luu i vya ên nêbê, “Môp ti gên yêp wê ông ob vông hixôn bêga bê ông loc

vông susu tibeac wê ông vông ge mi tibii i kisuu di ông vông mone vô tibii wê nêen susu maên ge, ên ông obêc kô susu nivîha gê kisii ganê. Pyap dêc ông lôm timu vô a vixag.”

²³ Xomxo levac tyo ngô kiyang ge lê, lêc kiyang tige vông i nilô vô viyin levac, ên wê i mone levac ge.

²⁴ Om Yesu yê i di nêen ên nêbê, “Xomxo wê susu tibeac ge obêc nêb la vac Anutu ben ge od obêc viyin levac vô he.

²⁵ Môm wê bwoc kamel ti obêc la vac yin kitu tocên ge, viyin levac lê, lêc xomxo susu tibeac obêc nêb la vac Anutu ben ge od obêc viyin levac luu vêl.”

²⁶ Mêgem xomxo wê ngô kiyang tige nêen ên nêbê, “Obêc tibêge ge od letya tiyi wê ob la dô maviha ge?”

²⁷ Lêc Yesu nêen ên nêbê, “Môm wê xomxo tiyiên ma wê ob vông ge, ge Anutu ob vông.”

²⁸ Mêd Pita nêen vô Yesu ên nêbê, “Wê lê. Xe ga wê xe sea susu wê xe vông ge vihati dô di lam timu vô ông vixam.”

²⁹ Lêc Yesu nêen vô he ên nêbê, “Vixôhilôg, a ob nêen vô xam bê xomxo ti obêc sea ben hixôn vinêe nue di tae mae lie lec Anutu xolac yuu ben ge

³⁰ od obêc kô myaviwen nivîha luu vêl gê kibun ga, di buc timuên ge od obêc la dô maviha luta lêc luta.”

Yesu nêen kiyang vông lu yon lec myavinê wê ob kô ge

(Matyu 20:17-19; Mak 10:32-34)

³¹ Yesu kô nue ngivihi vigê yuu di tô mi la yuu mi he la, dêc Yesu nêl vô he ên nêbê, “Xam ngô lê. Il ob la Jelusalem lê, lêc kiyang vihati wê plopete kivuu lec Xomxo Nu ilage obêc vô nôn lec.

³² Om xomxo obêc vông i la vac tibii wê o Yuda lêm ge vigê, dêc tibii obêc vô mya nipaên vô i di pisuv myaluc lec,

³³ di pisa i ya yihi dêc hi i yib, di buc yon obêc lam la vêl ge od ob kidi lec maviha nang.”

³⁴ Mêgem nue ngivihi ngô kiyang tyo lêc he lungên, ên kiyang kehe o yêp seac vô he lêm om he vyac xovôên ma.

*Yesu vông xomxo ma tocên ti vô nivaha lec
(Matyu 20:29-34; Mak 10:46-52)*

³⁵ Yesu mila kwabo vô vigwe Jeliko, lêc xomxo ma tocên ti dô vô môp ninya di kitaa susu vô tibii,

³⁶ lêc ngô kiyang ngena ngena wê lam hixôn Yesu ge om kinêg vô xomxo ya ên nêbê, “Tibii vô nididun ên va?”

³⁷ Lêc xomxo nêl vô i ên nêbê, “Yesu Nasalet valê.”

³⁸ Om xomxo ma tocên tyo tyuc ên nêbê, “Yesu, Devit nu, ông xo vigwe vô pisiv ên a.”

³⁹ Lêc xomxo wê lam mug ge nêl ên nêbê, “Dô kiyang maên.” Lêc ma tocên tyo tyuc nginong nginong hixôn vya levac ên nêbê, “Ông Devit nu, xo vigwe vô pisiv ên a.”

⁴⁰ Mêgem Yesu val le di nêl vô xomxo nêb he i kô xomxo ma tocên tyo mi lam vô i. Om he kô mi val di val lax i le vô Yesu manôn dêc Yesu kinêg vô i ên nêbê,

41 “Ông nêb a vông bêna vô ôngê?” Om xomxo tyo nêl ên nêbê, “A nêb ông vông a magnôn i seac.”

42 Om Yesu nêl vô i ên nêbê, “Mamnôn i seac. Vông vinên wê ông vông gé vông ông vô nimviha lec.”

43 Mêgem lutibed xomxo tyo manôn seac, di i la hixôn Yesu di pimil Anutu. Di xomxo wê yê ge vihati pimil Anutu ên wê xomxo ma tocên tige manôn seac ge.

19

Yesu yuu Sakias kiyang

1 Yesu la vac vîgwe Jeliko,

2 di xomxo ti lê nêbê Sakias dô vac vîgwe tige. Sakias ge xomxo takis kôên nêb levac di i mone yuu susu tibeac.

3 Sakias nêb ob yê Yesu om la léc tiyiên ma, ên myabo om xomxo tibeac le vac i manôn xôn,

4 om tup mi la mug vô môt wê Yesu ob lam vô ge di mila lec xax ti ên nêb ob la dô ên yê Yesu wê i val ge.

5 Yesu mila vac xax kwa ngibi

wê Sakias dô lec ge di lax ma lec di nêl vô Sakias ên nêbê, “Sakias, lop lutibed ên a ob dô hixôn ông vac ông bom gwêbaga.”

6 Mêgem Sakias lop lutibed di kô Yesu mi la vac ben hixôn xêyaa nivîha.

7 Tibii yê wê Yesu la dô vac Sakias ben ge om he ni nyag di nêl ên nêbê, “Bêna léc xomxo tiganê la dô vac tibii nîpân tiganê ben di la dô hixôn?”

8 Mêléc Sakias le vô he vihati manôn di nêl vô Apumtau Yesu ên nêbê, “Apumtau, ngô lê. Susu

vihati wê a vông ge a ob vông viwen i loc vô xomxo wê nêl susu maên ge. Di a obêc kityoo xomxo ya di vô he mone vêl ila ge od a ob vông he xe vac i luu vêl, xocbê a obêc kô xomxo ti mone kehe ti ge od a obêc vông kehe yuudiyuu vô i nang.”

⁹ Mêgem Yesu nêl vô i ên nêbê, “Gwêbaga Anutu kitya xam xumac tiga nêl nipaên vêl di xam tu Anutu nue, ên ông ge, ông Eblaham tivae ti êno.

¹⁰ Ên a, Xomxo Nu, a lam ên xomxo wê lung la vac nipaên ge, ên a nêb a ob hêm he lec ên he i dô nivîha.”

Kiyang pilepacên lec xomxo vigê yuu wê kô monê ge

(Matyu 25:14-30)

¹¹ He ngô kiyang ngwe ge vêl, nang dêc Yesu nêl kiyang pilepacên ti vô he, ên he mîla kwabo vô Jerusalem léc tibii wê diloc hixôn i ge so ên nêb mêd he ob mîla Jerusalem ge od Yesu ob tu Anutu manôn di tu king, om Yesu nêb he i xovô buc tige bê gên yêp teva,

¹² om nêl kiyang pilepacên bêga vô he ên nêbê, “Xomxo levac ti dô vac vigwe ti, léc nêb ob la vac vigwe teva ngwe ên xomxo i vông i tu king ên lôm viac vigwe wê mi dô vac ge.

¹³ Om buc wê nêb ob la ge od nêl nue yuac vigê yuu ge lam vô i di vông mone kipihac yuu yuu vô he toto di nêl vô he ên nêbê, ‘Xam vông yuac lec mone tigae di i loc tyip lec buc wê a obêc vena ge.’

¹⁴ “Mêd xomxo levac tyo loc mi la, léc tibii vigwe tige xêyaa vô nipaên vô i, om vông lie ya

timu vô i vixa mi la, ên nêb he i loc nêl bê, 'Xe nêb xomxo tiga ob tu king mi viac xe lêm.'

¹⁵ Lêc xomxo tyo mîla kô lê levac pyap di lax mi la vac ben wê ob viac ge. Mêd nêl nue yuac wê vông mone vô he ge lam vô i, ên nêb ob xovô mone wê he vông yuac lec ge bêc he tulec ya hixônê?

¹⁶ "Om xomxo ti wê val taxlee ge nêl vô i ên nêbê, 'Xomxo levac, ông vông mone kipihac yuu vô a, lêc a vông yuac lec om a tulec yul yuu hixôn.'

¹⁷ Om xomxo levac nêl vô xomxo tyo ên nêbê, 'Ông ge xomxo nivîha wê ông viac a yuac nivîha ge. Ông kô mone nipwo tya lêc ông viac nivîha, om a ob vông ông tu levac di viac vigwe levac vigê yuu.'

¹⁸ "Nang dêc nu yuac ngwe wê vông yuu ge val nang di nêl ên nêbê, 'Xomxo levac, ông vông mone kipihac yuu vô a, lêc a vông yuac lec om a tulec yul ti hixôn.'

¹⁹ Om xomxo levac tyo nêl vô i ên nêbê, 'Nivîha, om a ob vông ông tu levac di viac vigwe levac vigê vilu.'

²⁰ "Nang dêc nu yuac ti wê vông yon ge val nang di nêl ên nêbê, 'Xomxo levac, ga ông mone kipihac yuu wê ông vông vô a ge, om ông hôm ông xe. Ông mone ga a vîyum vac nivîmihi mi tung i dô,

²¹ ên a xona ên ông, ên a xovô ên a nêbê ông ge xomxo myampîlihi, ên susu wê xomxo ngwe ob tung ge od ông ob kô, di yaên wê xomxo ngwe yev he xe ge od ông la mi kô nôn.'

22 “Lêc xomxo levac nêl vô i ên nêbê, ‘Ông ge xomxo nipaên. Ên kiyang wê ông nêl ga hìlung ông nêl nipaên, ên ông xovô ên ông nêbê a ga xomxo myagpìlihi om susu wê xomxo ngwe tung i dô ge, a la mi kô, di yaên wê xomxo ngwe yev he xe ge od a la mi kô nôn.

23 Ông xovô bêge lê, lêc bêna lêc ông o la lii mone wê a vông ge vac xumac mone êdêc buc wê a vena ge od a kô mone wê a vông ge di kô wê dô lecên ge hixônê?’

24 Mêgem xomxo levac nêl vô xomxo wê he xôn le ge ên nêbê, ‘Xam hôm mone kipihac yuu ge vêl ên xomxo tige vigê di loc vông vô xomxo ngwe wê mone yul yuu ge.’

25 Lêc he nêl ên nêbê, ‘Xomxo levac, xomxo ganê mone levac tiyi yul yuu.’

26 “Lêc xomxo levac nêl ên nêbê, ‘A ob nêl vô xam bê xomxo wê he susu dô ge, he ob kô ya hixôn, di xomxo wê susu ma ên he di nipwo tya dô vô he ge od a ob vô vêl ên he.

27 Di xomxo wê xêyaa vô nipaên vô a ên nêb a o tu king lêm ge, xam loc kô he mi lam di hi he i yib lec a magnôn.’ ”

Yesu la Jerusalem lêc tibii pimil i tiyi xocbê king ge

(Matyu 21:1-11; Mak 11:1-11; Jon 12:12-19)

28 Yesu nêl bêge pyap di loc mi la ên nêb ob la Jerusalem.

29 Mêd mila kwabo vô vigwe yuu lê nêbê Betpasi yuu Betani wê yêp kwabo vô kitôn Oliv ge. Mêd vông nu ngivihì yuu la,

³⁰ di nêl vô yuu ên nêbê, “Muu loc vac vigwe tiganê, di muu obêc mila wê donki wê gên ligên ge ti wê tibii vô yihi lec kwa di i dile ge. Donki tige xomxo ti o dô lec ila lêm. Mêgem muu piwelac yihi vêl ên di kô mi lam.

³¹ Lêc xomxo ti obêc kinêg muu bê, ‘Muu ob piwelac yihi tige vêl ên va?’ ge od muu nêl vô bê, ‘Apumtau nêb ob vông yuac lec.’ ”

³² Yuu la i tiyi wê Yesu nêl ge di mila tulec donki,

³³ om yuu piwelac yihi vêl ên, lêc xomxo wê he donki ge kinêg yuu ên nêbê, “Muu piwelac ge ên va?”

³⁴ Lêc yuu nêl ên nêbê, “Apumtau nêb ob vông yuac lec.”

³⁵ Mêd yuu kô donki tyo mi lax vô Yesu, di he vax he ngakwi lec kisii dêc Yesu dô lec.

³⁶ Yesu dô lec di la vô môm, mêd xomxo ya vax he nivimihi lec môm wê Yesu ob tup vô ge i tiyi xocbê môm wê tibii mi vông vô he king ge.

³⁷ Mêd Yesu lop vô môm kitôn Oliv di mila kwabo vô Jerusalem, lêc xomxo vihati wê mi timu vô Yesu kiyang ge, he pimil Anutu hixôn xêyaa nivaha ên do levac wê Yesu vông mi he yê ge,

³⁸ di he nêl levac la kisii ên nêbê, “Il ob hi vixad i pec ên il nêd king wê tu Anutu manôn di lam ge.

Kiyang malehe yêp lag kisiinê, di Anutu wê dô lag kisiinê, il ob vông i lê i vô levac.”

³⁹ He nêl bêge, lêc Palisi wê dô hixôn he ge, he ya nêl vô Yesu ên nêbê, “Xolac kehe, ông nêl vô nume bê he i dô kiyang maên.”

⁴⁰ Lêc Yesu nêl ên nêbê, “A ob nêl vô xam bê he obêc dô kiyang maên ge od ngidax obêc tyuc di pimil a nang.”

Yesu byag ên tibii Jelusalem

⁴¹ Mêd Yesu mila kwabo vô Jelusalem dêc yê ma la di byag,

⁴² di nêl ên nêbê, “Gwêbaga xam obêc xovô môp wê xam ob dô vac malehe ge od obêc nivîha. Lêc ga xam lungên, ên kiyang ga yêp xôpacên om xam o xovô lêm.

⁴³ Xam ngô lê. Obêc buc ti lêc tibii wê yê xam nipaên ge obêc val ku xenac kisuu xam xôn di o tiyi wê xam ti ob la ge lêm.

⁴⁴ Di he ob hi xam hixôn nume wê xam dô vac vigwe ga vihati vô nipaên, di ngidax wê xam lox xumac ya ge, ngwe ob dô lec ngwe kisii lêm. Kehe bêga bê xam o xovô Anutu wê lam ên nêb ob hôm xam lec ge lêm.”

Yesu tii tibii wê vông vitevac vac Anutu xumac ngibua ge vêl

(Matyu 21:12-17; Mak 11:15-19; Jon 2:13-22)

⁴⁵ Yesu la vac Anutu xumac ngibua di la tii tibii wê vông vitevac vac nîlô ge la vêl,

⁴⁶ di nêl vô he ên nêbê, “Xolac nêl bêga nêbê, ‘A xumac ga, xumac kitaa vacên,’ lêc xam vông i tiyi xocbê xumac wê tibii yôdac ob kitucma vac ge.”

⁴⁷ Yesu mi nêl xolac vac Anutu xumac ngibua tiyi buc vihati. Mêd xomxo levac wê mi si daa gee di xomxo wê xovô Moses xolac gee hixôn xomxo levac levac ya, he xôn nêb he ob hi Yesu i yib,

48 lêc he o tulec môp ti wê he ob hi Yesu lec ge lêm, ên xomxo tibeac vô ninya vô kiyang wê Yesu nêl ge di o sea i lêm.

20

Xomxo kunac Yesu ên nêbê, “Ông kô xêkizêc vô letya?”

(Matyu 21:23-27; Mak 11:27-33)

¹ Buc ti lêc Yesu la vac Anutu xumac ngibua di la nêl xolac vô tibii, di xomxo levac wê mi si daa vô Anutu gee di xomxo wê xovô Moses xolac gee hixôn he Yuda levac levac val vô Yesu,

² di val kunac i ên nêbê, “Ông tu letya manôn di lam vông môp tigaê? Letya nêb ông vông môp tibêgaê?”

³ Lêc Yesu nêl lax vô he ên nêbê, “A êno ob kinêg kiyang ti vô xam. Om xam nêl vô a bê

⁴ letya vông Jon la lipac xomxo? Ge Anutu lag kisiinê vông, me xomxo kibun ga vông?”

⁵ Om he nêl vôngma bêga ên nêbê, “Il obêc nêl bê Anutu lag kisiinê vông ge od Yesu obêc nêl vô il bê, ‘Lêc bêna lêc xam o vông i vin kiyang wê Jon nêl ge lêmê?’

⁶ Lêc il ob nêl bê xomxo kibun ga vông Jon la yuac tige, od xomxo obêc nêx il ya ngidax, ên he vihati vông i vin ên he nêbê Jon ge plopet wê Anutu vông i la ge ti.”

⁷ Om he nêl vô Yesu ên nêbê, “Xe o xovô Jon Lipacên kehe lêm.”

⁸ Mêd Yesu nêl vô he ên nêbê, “Om a êno ga, a ob nêl xomxo ti wê vông a lam ge kitong vô xam lêm.”

Kiyang pilepacên lec tibii nipaên wê viac yuac ge

(Matyu 21:33-46; Mak 12:1-12)

⁹ Mêd Yesu nêl kiyang pilepacên ti vô xomxo bêga ên nêbê, “Xomxo ti xin wain vac i yuac ti, di vông vô tibii ya nêb he i viac, ên nêb ob la vigwe teva ti di la dô buc xuhu dia.

¹⁰ Mêgem loc mi la dô mêd buc wê wain ob huu ge om vông nu yuac ti lax mi la vô tibii wê diviac i yuac ge ên nêbê i loc kô i wain nôn ya, om xomxo tyo mila lêc xomxo wê viacên wain ge hi i di vông i lax mi la pileva.

¹¹ Nang dêc xomxo ti wê i yuac ge vông nu yuac ngwe lax vô he nang, lêc tibii yuac viacên pisa i di vô mya nipaên vô i di vông i lax mi la pileva.

¹² Nang dêc xomxo levac tige vông nu yuac ti wê vông yon ge la nang, lêc he hi i vô nipaên di nêx i la ninya.

¹³ Om xomxo ti wê i yuac ge xo bêga ên nêbê, ‘A ob vô va? Ga a ob vông a nug tuc wê a xêgyaa vin lec i ge i loc vô he, ên mêd he ob yê i xocbê xomxo levac di la vac kiyang wê i vông ge kwa ngibi.’

¹⁴ Lêc xomxo wê viac i yuac ge yê wê xomxo levac tyo nu mila ge om he nêl voma ên nêbê, ‘Xomxo ti wê ma obêc nêl i lê lec yuac ga ge val, om il ob hi i yib êdêc yuac ga i tu il xe.’

¹⁵ Om he hôm i xôn di kô mi la vô yuac ninya di hi i yib. Om a ob kinêg vô xam bê xomxo ti wê i yuac ge obêc vô va vô he?

¹⁶ Ge obêc hi xomxo tige yib di vông i yuac vô xomxo baba mi he i viac nang.” Xomxo wê ngô

kiyang tige nêl ên nêbê, “Le i lêc vông tibêge lêm.”

17 Mêd Yesu yê he di nêl ên nêbê, “Xam nêbê môt bêge i ma, mêlêc kiyang wê plopete kivuu ilage, kehe bêna? Ên plopete ilage kivuu kiyang mi i yêp bêga ên nêbê, ‘Ngidax ti wê xomxo xumac loxên yê lêc nêb tiyên ma ge, ge wê tu ngidax xêkizêc wê ob hêm xumac xôn ge.’

18 A ob nêl vô xam bê xomxo ti obêc tô mi hi i lec ngidax tige ge od ob hi i len vô pîpu sea, di ngidax tige obêc tô mi hi xomxo ti ge od obêc hi i pital sea.”

19 Yesu nêl bêge dêc xomxo wê xovô Moses xolac gee hixôn xomxo levac wê mi si daa gee, he xovô ên he nêbê Yesu nêl kiyang pilepacên tige lec he, om he nêb he ob hêm Yesu xôn lutibed, lêc he xona ên wê xomxo tibeac ge.

Xomxo nêb ob yaxên Yesu kiyang lêc Yesu o nêl ti so lêm

(Matyu 22:15-22; Mak 12:13-17)

20 Mêd xomxo wê xovô Moses xolac gee hixôn xomxo levac wê mi si daa gee yê Yesu xôn di vông xomxo ya la vô i ên nêb he i yê i xôn di yaxên i kiyang bêc obêc nêl ti so ge od he ob vông i loc vac gavman vigê di vông kiyang vô. Xomxo tige kityoo nêb he xomxo nivîha,

21 om la kinêg vô Yesu ên nêbê, “Xolac kehe, xe xovô ên xe nêbê xolac wê ông nêl vô xomxo ge, ông nêl bôbac di nivîha, di ông o xona ên xomxo ti lêm. Nge, ông mi nêl Anutu kiyang hixôn nôn vô xomxo vihati tiyima.

²² Om xe ob kinêg vô ông bê tiyi wê il Yuda ob vông mone takis vô king Sisa wê tibii madiluhu ge, me il ob vông lêm?”

²³ Lêc Yesu xovô kiyang kityooên wê yêp vac he nilô ge om nêl vô he ên nêbê,

²⁴ “Xam hilung mone ti mi a xê. Letya kinu yuu lê wê yêp lec mone ga?” Om he nêl ên nêbê, “Sisa kinu yuu lê.”

²⁵ Mêgem Yesu nêl vô he ên nêbê, “Mêgem susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu.”

²⁶ Mêd he o tiyi wê he ob kityoo Yesu ên i nêl kiyang ya so lec xomxo manôn ge lêm, ên he yetac ên kiyang wê Yesu nêl lax vô he ge om he dô kiyang maên.

He kinêg vô Yesu lec môp wê xomxo ob kidi lec vac yibên ge

(Matyu 22:23-33,41-46; Mak 12:18-27,35-37)

²⁷ Xomxo Sadyusi ya val vô Yesu. He Sadyusi ge, he o vông i vin bê xomxo ob kidi lec vac yibên lêm.

²⁸ Om he la nêl vô Yesu ên nêbê, “Xolac kehe, Moses xolac nêl bêga vô il ên nêbê xomxo ti obêc kô vêx ti lêc nu ma di i yib di vinê gên dô ge od vux tyo lie ti ob ii vêx tyo nang êdêc vông nue, di nue i tu susu wê ma yibên vông ge kehe. Moses xolac nêl bêge.

²⁹ Om wê vux vigê vilu di sec yuu ob dô lec ta yuu ma tibed, mêdêc li tuc obêc kô vêx ti lêc yib di nu ma ge,

³⁰⁻³¹ od li môn ob ii vêx tige i tii vac nang, lêc wê obêc yib di nu ma ge od li gwaa ob ii nang,

lêc wê li gwaa obêc yib ge od lie timuên vihati ob timu vô môp tived ge di ii vêx tige, lêc wê vihati obêc yib di nue ma,

³² dêc vêx tyo obêc yib timuên ge.

³³ Xam nêl ên xam nêbê xomxo obêc kidi lec vac yibên om xe nêb xe ob kinêg vô ông bê buc wê xomxo yibên obêc kidi lec ge, od vêx tige obêc tu vux tina vinê? Ên vux vigê vilu di sec yuu, he xôn ii vêx tige lec buc wê he dô maviha ge.”

³⁴ Mêgem Yesu nêl vô he ên nêbê, “Xomxo wê dô gwêbaga ge, he iima.

³⁵ Lêc xomxo wê Anutu nêb he nivihã tiyi wê ob kidi lec vac yibên di la dô maviha timuên ge, he ob iima vô buc timuên lêm.

³⁶ Ên he obêc yib i tii vac nang lêm. Nge, he ob dô tiyi xocbê angela ge, ên he kidi lec vac yibên di he tu Anutu nue.

³⁷ “Moses kiyang nêl kitong êno ên nêbê xomxo yibên obêc kidi lec i tii vac nang. Ge yêp seac vac kiyang wê Moses kivuu lec xax wê ngwax ditum lec ge bêga ên nêbê, ‘Apumtau Anutu ge Eblaham yuu Aisak yon Jekop Anutu wê yon mi kitaa vô ge.’

³⁸ Yon yib tax dêc Moses kivuu kiyang tige timuên, lêc Moses kivuu i tiyi xocbê yon xeedô ge. Om il ob xovô bê Anutu o tu xomxo yibên nên Anutu lêm. Nge, Anutu tu xomxo maviha nên Anutu, ên xomxo wê maviha hixôn he wê yibên ge, Anutu yê he vihati xocbê he dô maviha ge.”

³⁹ Yesu nêl bêge dêc xomxo wê xovô Moses xolac gee, he ya nêl ên nêbê, “Xolac kehe, ông nêl ge bôbac la tiyi.”

40 He nêl bêge, ên he xona om he nêb he ob kinêg kiyang i tii vac vô Yesu lêm.

41 Lêc Yesu nêl vô he ên nêbê, “Bêna lêc xomxo ya nêl ên nêbê Kîlisi wê Anutu nêb ob vông i lam ge, ge Devit nu?”

42 Ên Devit vaci kivuu vac kipihac Sam bêga ên nêbê,

‘Apumtau Anutu nêl vô a Apumtau ên nêbê, Ông dô vô a vigêg hiyôv,

43 di a obêc vông tibii wê vông vevac vô ông ge he i dô vac ông vigêm vilu kwa ngibi.’

44 Devit nêl ên nêbê Kîlisi ge Apumtau, om bêna lêc xomxo nêl ên nêbê Kîlisi ge Devit bue timuên ti?”

*Xomxo wê xovô Moses xolac gee nêl nipaên
(Matyu 23:1-36; Mak 12:38-40; Luk 11:37-54)*

45 Xomxo tibeac dô om he ngô kiyang wê Yesu nêl vô nue ngivihî bêga ên nêbê,

46 “Xam viac xam ên môp nipaên wê xomxo wê xovô Moses xolac gee mi vông ge. Ên he xêyaa vin lec môp wê he ob vinyum ngakwi dia nivîha di la vîlee vac maket ên he nêb xomxo i yê he di pimil he ya kiyang malehe, di he obêc la vac xumac lilo, me he ob la ya vizid levac ge od he nêb he ob dô lec sia nivîha wê xomxo levac mi dô lec ge.

47 Lêc he ge wê he mi vô xomxo vêxôv nêl susu yuu xumac vêl ge, di buc wê he ob kitaa ge od he mi vîyum nêl nipaên vac kitaaên dia. Om myavîwen nipaên wê he ob kô ge obêc levac mabu yocên luu vêl.”

21

*Vêxôv wê vông daa vô Anutu ge
(Mak 12:41-44)*

¹ Yesu dô di yê wê tibii wê mone levac gee lam tung mone vac kilong wê tibii mi tung mone daa vac ge.

² Mêd yê wê vêxôv wê mone ma ge ti val tung mone hi yuu tya vac kilong tyo.

³ Mêgem Yesu nêl ên nêbê, “A ob nêl hixôn nôn vô xam bê mone yuutyabed wê vêxôv tiganê tung vac kilong ge nginoo daa wê xomxo baba tung ge vêl.

⁴ Ên he mone tibeac dô lê, lêc he vông nipwo tya di he xe levac dô, dom vêx tiganê ge i nêl mone ma di hi yuu tya, lêc vông vihati tu daa, di ti o dô wê ob kisuu xen yaên lec ge lêm.”

*Yesu nêl lec viyin wê ob val timuên ge
(Matyu 24:1-14; Mak 13:1-13)*

⁵ Xomxo ya nêl kiyang lec Anutu xumac ngibua ên nêbê, “Xumac tiga, tibii lox ya ngidax nivihaviha di vunac vô ya susu nivihaviha.” Lêc Yesu nêl vô he ên nêbê,

⁶ “Susu wê xam wê ga, obêc buc timuên ge od ngidax tigae ob dii sea, di ngwe ob dô lec ngwe kisii lêm.”

⁷ Mêd he kinêg vô Yesu ên nêbê, “Xolac kehe, kiyang tige obêc vô nôl lec yelacna? Di do vatya obêc val tax ên xe xê di xovô bê susu tige ob vô nôl lecê?”

⁸ Mêgem Yesu nêl ên nêbê, “Xam viac xam nivihava êdêc tibii i o lêc kityoo xam lêm. Ên

xomxo tibeac obêc val kityoo xam di nêl a lêg di nêl bê he Kilisi, di nêl bê buc vô kwabo lec. Lêc xam o lêc vông i vin he vya di timu vô he lêm.

⁹ Di xam obêc ngô kiyang wê nêbê vevac tyip vac vîgwe ya mi xomxo hima ge, od le i lêc yetac di xona lêm. Ên vevac tige obêc val tax, lêc buc myahîpu gên yêp dia.”

¹⁰ Nang dêc Yesu nêl vô he ên nêbê, “Vô buc tige tibii vîyang ngwe ob vông vevac vô vîyang ngwe, di tibii vîyang vîyang ob dô kidu kidu di vông vevac voma.

¹¹ Vac vîgwe vîyang vîyang ge ngiyêg ob yoc levac di vip levac ob den xomxo di yidac levac ob vông he. Di do levac ya ob lam gê lag kisiinê di vông xomxo xona mabu.

¹² “Vô buc wê susu tige valên gên ma ge, od tibii obêc hêm xam xôn di vông vîyin levac vô xam, di vông kiyang vô xam vac xumac lilo wê Yuda vông ge di tung xam la vac kalabuhu. He ob nêb vông a lêg i vô nipaên, mêgem he obêc kô xam mi la di vông xam le vô king yuu gavman levac manôn di vông kiyang vô xam.

¹³ Lêc buc tige wê xam ob nêl a xolac kitong vô he,

¹⁴ om le i lêc xo kiyang wê xam ob nêl lax vô he ge lêm.

¹⁵ Ên a obêc vông xam piyôp yêp seac di xam nêl kiyang nivîha, om he wê nêb ob vông vevac vô xam ge, he o tiyi wê he ob pwoo kiyang wê a nêl vô xam ge vac lêm.

¹⁶ “Mêd xacxam va tame mame lime ngidême

hixôn xam nimpipu, heche va obêc vông xam vac tibii vevac vigê di he obêc hi xam ya wib.

¹⁷ Di xomxo vihati xêyaa obêc vô nipaên nôn vô xam ên wê xam vông i vin a lêg ge.

¹⁸ Lêc xam obêc dô nimviha di bamzub lihi ti tya obêc pul vêl lêm.

¹⁹ Om xam le xêkizêc êdêc dô mamviha timuên.

Yesu nêl kiyang lec wê Jêlusalem obêc vô nipaên ge

(Matyu 24:15-21; Mak 13:14-19)

²⁰ “Buc wê tibii vevac obêc lam buu vigwe Jêlusalem xôn ge od xam xovô bê buc wê vigwe ob vô nipaên ge vô kwabo lec.

²¹ Om buc tige, xomxo wê dô vac vigwe Judia ge, he i pec mi loc lec vigwe kitôn, di he wê dô vac vigwe Jêlusalem ge, he i pec mi loc vêl, di he wê dô Jêlusalem ninya ge, he i o lêc dilôc vac vigwe Jêlusalem lêm.

²² Ên buc tige wê Anutu ob vông myaviwen nipaên vô xomxo Yuda i tiyi kiyang wê plopete kivuu ilage, om kiyang gee vihati obêc vô nôn lec.

²³ Om vêx wê nu dô vac xêyaa hixôn vêx wê divông lul vô nue vô buc tige, he ob dô vac viyin levac. Ên xomxo kibun ga ob dô vac viyin levac di xêyaa myavinê wê Anutu vông ge ob tulec he Yuda vihati.

²⁴ Mêd tibii ob hi he ya yib ya yipac di ku he ya xôn di kô he mi la vac tibii ba ben di he la dô di vông yuac kalabuhu. Di tibii wê o Yuda lêm ge ob vông vigwe Jêlusalem vô nipaên di heche va ob tu kehe di viac i tiyi buc wê Anutu nêl ge.

*Buc wê Xomxo Nu ob vena ge
(Matyu 24:29-31; Mak 13:24-27)*

²⁵ “Mêd do toto ob val vac hiyôv yuu dentuc di pítua gê lag kisiinê, di xomxo kibun ga vîhati nilô ob vô viyin levac di he ob xona ên mia gwec wê vuac di vô didun levac ge.

²⁶ Di pítua yuu susu wê lag ge ob yetac di sea viğwe wê le lec ge di la, om xomxo ob yê di xovô susu nipaên wê ob val kibun ge om he ob xona mabu di vixog mi la kibun.

²⁷⁻²⁸ Mêd buc wê susu tigeê obêc val ge, od xam nilôm i vô viyin maên di xam wê mam i loc kisi, ên buc wê Anutu ob vô xam vêl ên viyin yuu nipaên ge vô kwabo lec. Mêd ge wê a, Xomxo Nu, a ob lam vac viyobtoc hixôn xêkizêc yuu xêseac di lam kibun, di xomxo vîhati ob yê wê a val ge.”

*Kiyang pilepacên lec xax wê mi pwoc ge
(Matyu 24:32-35; Mak 13:28-31)*

²⁹ Mêd Yesu nêl kiyang pilepacên ti vô he ên nêbê, “Xam xovô xax wê ob pwoc lihi ge.

³⁰ Ên xax lihi obêc pwoc lec ge od xam xovô ên xam nêbê ge buc wê hiyôv ob linac nivîha ge.

³¹ Mêgem xam xovô bêga bê môp wê xam ob xovô Anutu buc ge, tiyi bêge êno. Om xam obêc wê do tigeê wê val ge od xam xovô bê buc wê Anutu ob tu king di vông xomxo vîhati la vac i kwa ngibi ge vô kwabo lec.

³² “A nêl hixôn nô n vô xam bêga bê xomxo wê dô gwêbaga ge obêc dô di kiyang tigeê vîhati obêc vô nô n lec lê.

³³ Lag yuu kibun xôa obêc ma, lêc kiyang wê a vông ge, bo ti obêc la xôa ma lêm.

Yesu nêl vô nue ngivihî ên nêb he i viac he

³⁴ “Xam viac xam nivîha, di le i lêc num mi vô mavmav lêm, di xam o lêc xo kiyang tibeac lec susu wê nimnivî xe ge di nilôm i vô viyin lec lêm, ên xam obêc viac xam nivîha lêm ge od Xomxo Nu obêc lop mi lôm lutibed ge od xam ob lungên, tiyi xocbê pulac wê lili lungên om mila mô, lêc vac ge.

³⁵ Ên buc tige obêc val vô xomxo wê dô lec kibun ga vîhati yang.

³⁶ Om xam viac xam i tiyi buc vîhati, di xam kitaa vô Anutu bê i vông xêkizêc vô xam i tiyi wê xam ob le xêkizêc di kilê viyin wê ob tulec xam ge êdêc le nivîha vô Xomxo Nu manôn wê obêc vena ge.”

³⁷ Mêd Yesu la mi nêl xolac vac Anutu xumac ngîbua tiyi vidiiên vîhati, di bucên ge mi sea Jelusalem di la mi yêp lec kitôn Oliv.

³⁸ Mêdêc pitoc yang ge xomxo tibeac mi kidi mi la vac Anutu xumac ngîbua ên nêb ob la ngô Yesu kiyang wê nêl ge.

22

*Judas nêb ob vông Yesu vac xomxo levac vigê
(Matyu 26:1-5,14-16; Mak 14:1-2,10-11; Jon 11:45-53)*

¹ Buc wê tibii Yuda ob myêl levac di ya blet xêkizêc wê yis maên ge ên xovô buc Pasova ge vô kwabo lec.

² Mêd xomxo levac wê mi si daa gee hixôn xomxo wê xovô Moses xolac gee he nêb he ob hi Yesu i yib, lêc he xona ên xomxo tibeac, om he myag môp wê he ob hêm i xôn ge.

³ Judas Iskaliot ge Yesu nue ngivihi ti lê, lêc Seten la vac i nilô.

⁴ Om Judas loc mi la vô xomxo levac wê mi si daa gee hixôn xêhipu levac wê mi viac Anutu xumac ngibua gee, di he keac lec môp wê Judas ob vông Yesu vac he vigê ge.

⁵ Om xomxo levac tigeê nilô vô nivaha di he nêb wê Judas ob vông Yesu vac he vigê ge od he ob vông mone vô i.

⁶ Mêgem Judas tyuc lec, mêd myag môp wê ob hôm Yesu xôn ge, lêc xovô wê xomxo tibeac mi dô hixôn Yesu ge om dô bin buc wê Yesu vaci obêc dô tamaên di xomxo ma ge lê.

*Pita yuu Jon viac vizid wê he ob ya ge
(Matyu 26:17-25; Mak 14:12-21; Jon 13:21-30)*

⁷ Buc wê tibii Yuda ob ya blet xêkizêc di hi bwoc sipsip mi ya ên xovô buc Pasova ge,

⁸ om Yesu nêl vô Pita yuu Jon ên nêbê, “Ga buc Pasova om muu loc myêl vizid ên il ob xa.”

⁹ Om yuu kinêg vô i ên nêbê, “Ông nêb xii la myêl vac xumac tina?”

¹⁰ Mêgem Yesu nêl vô yuu ên nêbê, “Muu ngô lê. Muu loc vac vigwe Jerusalem di muu obêc wê wê xomxo ti dikilê mia mi la ge, od muu timu vô xomxo tige vixa di loc vac xumac wê xomxo tyo ob la vac ge,

¹¹ di nêl vô xomxo ti wê i xumac ge bê, ‘Xolac kehe nêb xii lam kinêg vô ông bê xumac nilô tina wê i hixôn nue ngivihi ob ya vizid vac ge?’

¹² Muu obêc kinêg bêge vô i ge od obêc hilung xumac nilô levac ti wê yêp kisii ge vô muu. Susu

wê il ob dô lec ge le vac xumac tige pyap, om muu loc myêl vizid wê il ob xa ge vac.”

¹³ Mêgem Pita yuu Jon loc mi la, di mila yê i tiyi wê Yesu nêl ge, mêgem yuu la myêl yaên wê he ob ya ge.

Yesu vông pasa vô nue ngivihi

(Matyu 26:26-30; Mak 14:22-26; 1 Kolin 11:23-25)

¹⁴ Buc wê he ob ya vizid ge om Yesu hixôn nue ngivihi, he xôn dô di ya.

¹⁵ Mêd Yesu nêl vô he ên nêbê, “A xovô ên a nêbê a obêc kô myavinê levac om a nilôg kidu a ên a nêb a ob xa vizid tiga hixôn xam tax lê dêc kô myavinê timuên.

¹⁶ A nêl vô xam bêga bê a ob xa vizid tiga i tii vac lêm di i loc tyip vô buc wê vizid tiga obêc vô nôl lec vac Anutu ben.”

¹⁷ Mêd Yesu hôm kap ti di kitaa vô Anutu di nêl vô he ên nêbê, “Xam hôm di titang voma.

¹⁸ A ob nêl vô xam bê a obêc num wain bêga i tii vac lêm di i miloc vô buc wê a ob num mia vac Anutu ben ge.”

¹⁹ Nang dêc Yesu hôm blet ti di kitaa lec mêd hibû di vông vô he titi di nêl ên nêbê, “Ga a nignivi wê a vông ên a nêb i ngidu xam xôn ge. Xam timu vô môp bêga di xovô a.”

²⁰ He ya pyap mêd Yesu vông bêge vô kap wain êno, di nêl ên nêbê, “Mia wain ga a hi wê a ob kipyax sea ên xam ge. Mêgem kiyang paha wê Anutu hilu ge, a obêc vông i vô nôl lec ya a hi.

²¹ “Xam wê lê. Xomxo ti wê ob vông a vac tibii vevac vîgê ge xeedô di ya hixôn a lec tevol tiga.

²² A, Xomxo Nu, a ob xib i tiyi xocbê kiyang wê Anutu nêl pyap ge lê, lêc xomxo ti wê ob vông a la vac he vigê ge obêc kô myaviwen levac lec timuên.”

²³ Yesu nêl bêge pyap, mêd nue ngivihî nêl vông ên nêbê, “Om il tina wê il obêc vông môp tibêge?”

Yesu nue ngivihî ngaênma ên nêb he tina obêc tu levac i luu he baba vêl

²⁴ Mêd Yesu nue ngivihî ngaênma ên nêb mêd he tina obêc tu levac i luu he baba vêl.

²⁵ Lêc Yesu nêl vô he ên nêbê, “King kibun ga môp wê nêb tibii viyang viyang ge i loc vac he kwa ngibi, di tibii wê tu levac ge nêb xomxo wê pileva ge i pimil he ên yuac wê he vông ge.

²⁶ Lêc xam o lêc timu vô môp bêge lêm. Nge, xam wê xam kô lêm levac ge, xam dô i tiyi xomxo wê lê maên ge, di xam wê xam tu levac ge, xam dô i tiyi xocbê xomxo wê mi vông yuac vô xam ge.

²⁷ A ob kinêg xam bê xomxo ngwe na wê levac ge? Ge xomxo ngwe wê dô di ya ge, me i nu yuac ngwe wê myêl i xen yaên di kô mi lam ge? Ge xam xovô ên xam nêbê ge xomxo ngwe wê dô mi ya ge. Lêc a ga, a lam dô hixôn xam tiyi xocbê xam num yuac ti.

²⁸ “Viyin tibeac tulec a, lêc xam o sea a lêm. Nge, xam kilê viyin hixôn a.

²⁹ Mag Anutu nêb a tu king di kô lêg levac, om a ob vông xam tu king di kô lêm levac hixôn a êno bêge,

³⁰ om buc wê a ob tu king ge od xam ob dô hixôn a di il xôn ob xa di num, di xam obêc dô

lec sia king di yaxên lime Islel wê xam hipu vigê yuu di tô mi la yuu ge nêb kiyang.”

*Yesu nêl ên nêb Pita obêc yax i vun
(Matyu 26:31-35; Mak 14:27-31; Jon 13:36-38)*

³¹ Yesu nêl vô Saimon Pita ên nêbê, “Saimon, ngô lê. Seten nêl ên nêbê ob yaxên xam, om Anutu tyuc lec ên nêb i yaxên.

³² Lêc a kitaa vô Anutu lec ông ên a nêbê ông o lêc sea vông vinên lêm. Di buc wê ông ob pilepac ông mi lax vô Anutu ge od ông ngidu lime nêb vông vinên xôn.”

³³ Lêc Pita nêl vô i ên nêbê, “Apumtau, a obêc loc hixôn ông. Wê tibii ob vông ông la vac kalabuhu me hi ông wib ge, od a ob kô myavinê hixôn ông.”

³⁴ Lêc Yesu nêl vô i ên nêbê, “Pita, a ob nêl vô ông bê vô bucên tya ga kokilêx vôên vya obêc gên ma di ông ob yax a vun lu yon bê ông lungên a.”

Kiyang lec susu wê ob ngidu xomxo xôn ge

³⁵ Yesu nêl vô nue ngivihi ên nêbê, “Buc ilage wê a vông xam la vac yuac ge od a nêb xam kôên vixec yuu mone di su i ma. Om a ob kinêg vô xam bê susu ya mi ma ên xam vô buc ya, me?” Lêc he nêl ên nêbê, “Maê, susu ti o ma ên xe buc ti lêm.”

³⁶ Mêd Yesu nêl ên nêbê, “Dom gwêbaga, xomxo ob viac xam lêm, om xam vixec mone obêc dô ge, od xam kô hixôn mi loc. Di vixec êno bêge. Di xam ti yipac obêc ma ge od xam vông nêb kolsiot ên tibii i kisuu di xam kô mone mi loc kisuu yipac lec.

37 A nêl bêga vô xam, ên viyin obêc val i tiyi kiyang wê yêp vac xolac bêga ên nêbê, ‘Xomxo nêl nêb i ge tibii nipaên.’ Om a ob nêl vô xam bê kiyang tiga obêc vô nôn lec vô a, ên kiyang vihati wê he kivuu lec a ilage obêc vô nôn lec.”

38 Om he nêl vô Yesu ên nêbê, “Apumtau, wê. Yipac yuu yêp ga.” Mêd Yesu nêl ên nêbê, “Ge pyap.”

*Yesu la kitaa gê Getsemani
(Matyu 26:36-46; Mak 14:32-42)*

39 Pyap dêc Yesu sea Jelusalem di la lec kitôn Oliv tiyi xocbê mi vông ge, mêd nue ngivihhi timu vô i vixa mi he la.

40 Mêd he mîla vigwe tige om Yesu nêl vô he ên nêbê, “Xam dô di kitaa êdêc viyin wê ob yaxên xam ge i o lêc vông xam tô lêm.”

41 Mêd Yesu sea he di la teva tya tiyi xocbê xomxo ti ob nêx ngidax la tô ge, dêc la yev vixa kitu vac di kitaa bêga ên nêbê,

42 “O Mag, ông obêc tyuc lec ge od ông vô viyin tiga vêl ên a. Lêc ông o lêc vông i tiyi wê a nêb ông vông ge lêm. Nge, ông vông i tiyi wê ôcông va xovô ge.”

43 [Mêd angela ti lam gê kisiinê di lam ngidu i xôn.

44 Yesu nilô vô viyin levac di i kitaa xêkizêc di nivinê tyip tiyi xocbê hi ge di yuc la kibun.]

45 Yesu kitaa pyap di kidi mi lax vô nue ngivihhi, lêc yê wê he nilô vô viyin levac om he yêp.

46 Mêgem Yesu nêl vô he ên nêbê, “Bêna lêc xam diwêpê? Xam kidi lec di kitaa êdêc viyin wê ob yaxên xam ge i o lêc vông xam tô lêm.”

*Judas vông Yesu la vac Yuda levac vigê
(Matyu 26:47-56; Mak 14:43-50; Jon 18:3-11)*

⁴⁷ Yesu gên dinêl kiyang tige di xomxo tibeac val mi lam. Judas wê Yesu nue ngivihi vigê yuu di tô mi la yuu ge ti kô tibii mi he lam, dêc Judas val le hixôn Yesu ên nêb ob nga lia,

⁴⁸ lêc Yesu nêl vô i

ên nêbê, “Judas, bêna lêc ông nga Xomxo Nu lia ên ông nêb tibii i lam hôm i xôn?”

⁴⁹ Yesu nue ngivihi yê wê tibii tige nêb ob hôm i xôn ge om he kinêg vô i ên nêbê, “Apumtau, ông nêb xe hi he ya yipac, me?”

⁵⁰ Lêc lutibed nu ngivihi ti hôm yipac di sap xomxo levac wê mi si daa ge nu yuac ti ninya lihi vilu hiyôv vêl.

⁵¹ Lêc Yesu nêl ên nêbê, “Môp bêge i ma.” Mêd vyax vigê lec xomxo tige ninya di i vô nivîha lec.

⁵² Mêd xomxo wê lam ên nêb ob lam hôm Yesu xôn ge, ge he xomxo levac wê mi si daa gee di xêhipu levac wê mi viac Anutu xumac ngibua gee, hixôn he Yuda levac levac ya, om Yesu nêl vô he ên nêbê, “Xam xo ên xam nêbê a tibii yôdac ti om xam lam hixôn yipac yuu vigo?”

⁵³ Ilage a mi dô hixôn xam vac Anutu xumac ngibua tîyi buc vihati, lêc xam o hôm a xôn lêm. Lêc gwêbaga buc wê xam vông, om xêkizêc wê mapitoc vông ge vô levac.”

Pita yax Yesu vun nêbê i lungên

(Matyu 26:57-58,69-75; Mak 14:53-54,66-72; Jon 18:12-18,25-27)

⁵⁴ He hôm Yesu xôn di kô i mi la vô xomxo ti wê tu xomxo daa siên nêb levac ge om he mîla

vac xomxo levac tyo ben, di Pita timu vô he vixa léc le lam teva teva.

⁵⁵ Mêd xomxo wê dô vac xomxo levac tige ben ge vev ngwax lec wetôv di nyuu mi dô, di Pita la dô hixôn he.

⁵⁶ Mêdêc vêx yuac ti yê Pita wê xeedô di ngwax linac lec ge om yê i kizêc dêc nêl ên nêbê, “Xomxo tya ga wê mi dô hixôn Yesu ge.”

⁵⁷ Léc Pita nêl ên nêbê, “A lungên xomxo tige.”

⁵⁸ He dô nipwo tya, nang dêc xomxo ngwe yê Pita nang di nêl vô i ên nêbê, “Ông wê ông mi dô hixôn Yesu he nue.” Léc Pita nêl ên nêbê, “Maê, o a lêmê.”

⁵⁹ Hiyôv manôn ti la vêl, nang dêc xomxo ti nêl xêkizêc nang ên nêbê, “Vixôhilôg, xomxo tiga wê mi dô hixôn Yesu, ên yuu xôn tibii Galili yuu.”

⁶⁰ Léc Pita nêl ên nêbê, “A lungên kiyang wê ông nêl ge.” Pita gên o nêl kiyang tiyôô lêm, di kokilêx hi vya lutibed.

⁶¹ Mêd Apumtau Yesu pilepac i di yê Pita, om Pita xovô kiyang wê Yesu nêl vô i ên nêbê, “Vô bucên tiga kokilêx vôn vya obêc gên ma di ông obêc yax a vun lu yon di nêl bê ông lungên a.”

⁶² Pita xovô wê i vông i so ge om sea vîgwe tige di la byag levac.

*Yesu la le vô tibii Yuda levac levac manôn
(Matyu 26:59-68; Mak 14:55-65; Jon 18:19-24)*

⁶³ Mêd xomxo wê hôm Yesu xôn ge keac nipaên lec di hi,

⁶⁴ di ku i manôn vac nivimihi di nêl vô i ên nêbê, “Ông nêl bê letya hi ôngê.”

⁶⁵ Mêd he nêl kiyang nipaên tibêge tibeac lec i.

⁶⁶ Vigwe vidii mêd he Yuda levac levac nêb ob kitucma, om xomxo levac wê mi si daa gee di xomxo wê xovô Moses xolac gee hixôn he levac levac ge mangwe, he kitucma mi dô, mêd tibii kô Yesu mi la lax vô he manôn. Mêd he kinêg vô Yesu ên nêbê,

⁶⁷ “Nêl vô xe bê ông ge Kîlisi ti wê Anutu nêb ob vông i lam ge, me?” Lêc Yesu nêl vô he ên nêbê, “A obêc nêl kitong vô xam ge od xam ob vông i vin a vyag lêm,

⁶⁸ di a obêc kinêg kiyang vô xam ge od xam ob luu a vyag lêm. Nge, xam ob dô kiyang maên.

⁶⁹ Vîwen wê timuên ge, a, Xomxo Nu, a ob dô vô Anutu wê xêkizêc kehe ge vîgê hiyôv.”

⁷⁰ Mêd he vîhati kinêg ên nêbê, “Ông ge Anutu nu mê?” Mêd Yesu nêl ên nêbê, “Xam nêl i tiyi, ên a ga Anutu nu.”

⁷¹ Mêd he nêl vôma ên nêbê, “Pyap om il ob kinêg kiyang ya hixôn lêm. Ên ici va nêl i kitong vac mya mi il ngô pyap.”

23

Yesu la le vô gavman levac Pailat manôn

(Matyu 27:1-2,11-14; Mak 15:1-5; Jon 18:28-38)

¹ Xomxo levac vîhati kidi lec di kô Yesu mi la di la lax vô Pailat manôn.

² Mêd he nêl kiyang nipaên lec Yesu bêga ên nêbê, “Xecxe xê wê xomxo tiga vô pilepac pilepac vô xe di nêb xe o vông mone takis vô il nêd king Sisa lêm, di kityoo xe ên nêbê i ge Kîlisi wê tu king ge.”

³ Mêd Pailat kinêg vô Yesu ên nêbê, “Ông ge king wê he Yuda vông ge, me?” Mêd Yesu lee yuu ên nêbê, “Ông nêl i la tiyi.”

⁴ Mêd Pailat nêl vô xomxo levac daa siên hixôn xomxo gee vihati ên nêbê, “A yaxên xomxo tiga nêl kiyang, lêc kiyang ti

o yêp vô i lêm.”

⁵ Lêc xomxo tige nêl kiyang xêkizêc ên nêbê, “Xomxo tige la nêl kiyang vaxvax vô xomxo vac vîgwe Galili di i la vac vîgwe Judia vihati di val ga hixôn.”

Yesu la le vô gavman levac Helot manôn

⁶ Pailat ngô kiyang tige, di kinêg vô he ên nêbê, “Xomxo tiga, tibii Galili ti, me?”

⁷ Lêc he nêl ên nêbê Yesu ben Galili wê Helot viac ge, om Pailat vông i loc mi la vô Helot, ên Helot lam dô Jelusalem vô buc tige.

⁸ Yesu mila vô Helot mêd Helot yê di xêyaa vô nivaha yang, ên ilage xomxo nêl Yesu kitong vô i om Helot nêb ob yê Yesu di nêb i vông do ti ên i ob yê.

⁹ Mêgem Helot kinêg kiyang tibeac vô Yesu, lêc Yesu o nêl kiyang ti lax vô i lêm.

¹⁰ Mêd xomxo levac wê mi si daa gee hixôn xomxo wê xovô Moses xolac gee le kwabo di vông kiyang xêkizêc vô Yesu,

¹¹ di Helot hixôn nue vevac yê Yesu nipaên di so vya vô i mêd kô ngakwi nivaha ti di lam vinyum lec Yesu. Pyap dêc vông i lax mi la vô Pailat nang.

12 Ilage Helot yuu Pailat mi yêma nipaên, léc buc tige yuu xêyaa vin lecma di yuu keac nivîha vômâ nang.

Pailat tyuc lec nêb tibii i hi Yesu lec xax pola (Matyu 27:15-26; Mak 15:6-15; Jon 18:39-19:16)

13 Pailat tyuc xomxo levac wê mi si daa gee hixôn xomxo levac levac di tibii tibeac kituc la vô i,

14 mêd nêl vô he ên nêbê, “Xam kô xomxo tige mi lam vô a ên xam nêb mi nêl kiyang vaxvax vô xomxo om vông he yê gavman nipaên, om a kinêg kiyang vô i lec xam mamnôn, léc a o tulec kiyang xochê xam nêl ge ti vô i lêm.

15 Di Helot êno o tulec kiyang ti lêm, om vông i lôm vô il nang. Xam ngô lê, xomxo tiga o vông ti so tiyi wê il ob hi i yib lec ge lêm.

16 Om a ob pisa i ya yihi di vông i lôc ben.”

17 [Môp wê he Yuda vông ge yêp bêga nêbê buc wê he ob myêl vizid Pasova ge od he mi nêl xomxo wê dô vac kalabuhu ge ti lê vô gavman levac, di gavman levac ob piwelac i vêt.]

18 He môp bêge, mêgem xomxo tibeac tyuc vya levac ên nêbê, “Hi xomxo tiga i yib di vông Balabas i lôm vô xe.”

19 Ilage Balabas hixôn xomxo tibeac vông vevac vô gavman Lom vac vigwe tige di hi xomxo ya yib om he vông i la dô vac kalabuhu.

20 Pailat nêb ob piwelac Yesu om nêl bêge vô xomxo tibeac tige nang,

21 léc he tyuc vya levac nang ên nêbê, “Hi i yib lec xax pola. Hi i yib lec xax pola.”

22 Mêgem Pailat nêl kiyang ti wê vông yon ge vô he ên nêbê, “Ên xomxo tiga vông nipaên vatya? A o tulec i nêl nipaên ti tiyi wê il ob hi i yib lec ge lêm. Om a ob pisa i ya yihi di vông i lôc nêl.”

23 Lêc he tyuc vya levac ngingong ên nêbê, “Hi i lec xax”, om he vya hi Pailat vya tô,

24 mêd Pailat timu vô he vya,

25 om Balabas wê vông vevac vô gavman di hi xomxo yib ge, Pailat nêb he i piwelac i vêl i tiyi wê he nêl ge, di vông Yesu la vac he vigê ên nêb he i vông i tiyi wê he xovô ge.

He hi Yesu lec xax pola

(Matyu 27:32-44; Mak 15:21-32; Jon 19:17-27)

26 He kô Yesu mi la vô môp, dêc he yê xomxo ti wê dilam ên nêb ob la Jelusalem ge. Xomxo tyo lê nêbê Saimon di i ben Sailini. Om he hôm i xôn di vông i kilê xax pola wê he ob hi Yesu lec ge di timu vô Yesu vixa.

27 Yesu mug mêd xomxo tibeac ditimu vô i vixa, di vêx ya byag di vông tilôt lec i.

28 Om Yesu pilepac i di nêl vô he ên nêbê, “Xam vêx Jelusalem, le i lêc byag ên a lêm. Nge, xacxam va byag ên xam hixôn nume.

29 Ên obêc buc timuên ge od tibii ob val vông viyin vô xam, om xam ob nêl bêga bê, ‘Vêx wê le pileva di kôên nu ma ge, me vêx wê o vông lul vô nu lêm ge, he ob dô viyin maên tyá.’

30 Mêd vô buc tige xomxo ob nêl vô kitôn bê, ‘Pul mi lam hi xe.’ Di ob nêl vô kitôn nipwo bêga bê, ‘Lam hivun xe xôn.’

31 Gwêbaga he vông vîyin vô a tiyi xochê ob vuv xax paha ge. Dî xam ge tiyi xochê xax mupacên om he ob vông bêna vô xam timuên?"

32 Mêd he kô tibii nipaên yuu hixôn, wê ob hi yuu yib hixôn Yesu.

33 Mêd he mîla vac vîgwe ti lê nêbê bazub len, mêd he hi Yesu hixôn tibii nipaên yuu ge lec xax pola vac vîgwe tige. Yesu yux vac mahigun dî tibii nipaên yuuo yux vîlu vîlu.

34 Mêd Yesu nêl ên nêbê, "Mag, ông kitya tibii gae nêl nipaên vêl, ên he lungên om he vông." Mêd tibii vevac tige nêb ob titang Yesu ngakwi vômâ om he tide mî yê dêc titang i tiyi.

35 Mêd xomxo tibeac dô dî yê, mêd Yuda levac levac nêl nipaên lec Yesu ên nêbê, "Xomxo tige ngîdu xomxo ya xôn ilage, om obêc Kîlisi wê Anutu vînoo i nôl ge od i ngîdu ici va xôn êno."

36 Mêd tibii vevac êno nêl nipaên lec Yesu, dî he kô mia wain wê kîlin ge mî la le kwabo vô Yesu nêb ob vông mî i num,

37 dî nêl vô i ên nêbê, "Ông obêc xomxo Yuda nêl king ge od ông ngîdu ôcông va xôn."

38 Mêd kiyang ti yêp lec kisii vô Yesu bazub ên nêbê, "XOMXO TIGA, KING WÊ HE YUDA VÔNG GE."

39 Tibii nipaên wê yux lec xax hixôn Yesu ge, ngwe nêl vya nipaên vô Yesu ên nêbê, "Ông Kîlisi mê? Od ông ngîdu ôcông va xôn dî ngîdu xii xôn êno."

40 Lêc ngwe kunac dî nêl ên nêbê, "Ông o xona ên Anutu lêmê? Xon xôn kô myavîwen nipaên tiyima lê,

41 lèc u kô nipaên tiyi môp nipaên wê u vông ge, om ge la tiyi, dom xomxo tîga o vông nipaên ti lêm.”

42 Mêd nêl vô Yesu ên nêbê, “Yesu, buc wê ông ob tu king hixôn xêkizêc ge od ông xo a.”

43 Mêd Yesu nêl vô i ên nêbê, “A ob nêl hixôn nôñ vô ông bê gwêbaga ông ob la dô hixôn a gê paladis.”

Yesu yib

(Matyu 27:45-56; Mak 15:33-41; Jon 19:28-30)

44 Hiyôv tyip kitôn mêd hiyôv linacên ma di vigwe vihati vô mapitoc ta di i la vô hiyôv manôn yon wê hucên ge.

45 Mêd nivimihi levac ti wê yux vac Anutu xumac ngibua ge lêx la yuu vac mahîgun.

46 Mêd Yesu tyuc vya levac ên nêbê, “O Mag, a kinug i loc vac ông vigêm.” Nêl bêge pyap mêd yib.

47 Mêd tibii levac wê viac nue vevac ge yê susu tigeê di pimil Anutu di nêl ên nêbê, “Vixôhilôg, xomxo tîga nivîha di nipaên ti o yêp vô i lêm.”

48 Mêd xomxo wê val ên nêb ob yê ge, he tibeac le di yê wê Yesu yib ge, pyap dêc he lax mi la ben, lèc he nilô vô viyin om he kituu pikopac di la.

49 Di xomxo wê Yesu lie gee hixôn vêx wê sea Galili di mi timu vô Yesu vîxa gee, he xôn le teva tya di yê susu vihati yang wê tibii vông vô Yesu ge.

He lii Yesu vac lôva

(Matyu 27:57-61; Mak 15:42-47; Jon 19:38-42)

50-51 Xomxo ti dô lê nêbê Josep di i ben Alimatia wê yêp vac vigwe Yuda ge. Josep ge Yuda levac ti

wê tu kaunsil di mi dô vac kitucmaên hixôn Yuda levac levac, lêc o tyuc lec kiyang wê kaunsile hilu lec Yesu ge hixôn lêm. Ên Josep ge xomxo nivîha ti wê dô bin buc wê Anutu nu ob lam tu king gê kibun ga.

⁵² Mêd Josep la vô Pailat di la kitaa Pailat ên nêb ob kô Yesu ninivi mi la yev.

⁵³ Mêgem Pailat tyuc lec di Josep la kwax Yesu vêl ên xax di la viyum vac nivimihi kwem ti di la lii vac lôva wê he yev vac ngidax ge ti. Lôva tige, he o lii xomxo ti vac ila lêm. Nge, gên paha.

⁵⁴ Buc tige, ge buc wê he Yuda ob viac he, ên vigwe obêc huc ge od he buc sabbat wê ngîbua ge myahîpu ob val.

⁵⁵ Mêgem vêx wê sea ben Galili di mi timu vô Yesu gee, he timu vô Josep vixa di la yê wê he lii Yesu ninivi vac lôva ge.

⁵⁶ Pyap di he lax mi la ben di lax viac wel hixôn susu wê nivivea ge. Pyap dêc buc sabbat, om he dô seac vêl tiyi môp wê Moses xolac nêl ge.

24

Yesu kidi lec vac yibên

(Matyu 28:1-10; Mak 16:1-8; Jon 20:1-10)

¹ Sabbat la vêl di da pitoc yang ge vêx tigeê kô susu nivivea wê he viac pyap ge mi la. He mila vô lôva wê he lii Yesu vac ge,

² lêc yê ngidax wê tibii lax i le vac vuayen xôn ge vixog la vêl,

³ om he vac la vac lôva nilô lêc he o yêvô Apumtau Yesu ninivi lêm.

⁴ Mêgem he xo kiyang tibeac tibeac, lêc lutibed vux yuu wê vinyum ngakwi kwem wê teeên ge val le kwabo vô he.

⁵ Mêd vêx tige yê di xona mabu di kilong kibun, lêc xomxo yuu ge nêl vô he ên nêbê, “Bêna lêc xam myag xomxo maviha tige vac xomxo yibên benê? Xomxo tige yêpên ga ma, di i kidi lec maviha mi la.

⁶ Xam xovô i lôc vô kiyang wê Yesu nêl vô xam di xam gên dô Galili ge wê i nêl bêga ên nêbê,

⁷ ‘He obêc vông Xomxo Nu la vac tibii nipaên vigê di he hi i yib, di buc ti wê vông yon ge od obêc kidi lec i tii vac nang i tiyi kiyang wê Anutu nêl pyap ge.’ ”

⁸ Mêgem vêx tige xovô kiyang wê Yesu nêl ilage nang,

⁹ om he sea lôva di lax mi la nêl kiyang tige vihati kitong vô nue ngivihi vigê yuu di tô mi la ti ge hixôn xomxo yaya.

¹⁰ Vêx wê nêl kiyang tige vô nue ngivihi ge, Malia Makdala yuu Joana yon Malia wê Jems ta ge di vêx yaya.

¹¹ Lêc nue ngivihi ngô kiyang tige tiyi xocbê kiyang kityooên, om he o vông i vin lêm.

¹² Mêgem Pita kidi lec di tup mi la vô lôva, di mîla kilong lôva nilô mi yê, lêc yê wê nivimihi ti wê he viyum Yesu vac ge diyêp pileva, mêgem lax mi la hixôn nilô viyin, ên lungên tige kehe.

*Xomxo yuu yê Yesu lec môp
(Mak 16:12-13)*

¹³ Vô buc tige, xomxo wê mi dô hixôn Yesu ge yuu la vô môp ên nêb ob la vigwe ti lê nêbê

Emeas. Môm wê ob sea Jerusalem di la Emeas ge tiyi xocbê 11 kilomita.

¹⁴ Yuu dila vô môm di keac lec byed wê tibii vông vô Yesu ge.

¹⁵ Yuu dikeac, léc Yesu val vô yuu di yon xôn dila vô môm.

¹⁶ Yuu manôn yê Yesu lê, léc yuu o xovô bê ge Yesu lêm.

¹⁷ Mêd Yesu kinêg vô yuu ên nêbê, “Muu dikeac lec vatya di tup vô mômê?” Mêgem yuu le di nilô vô viyin di manôn vô nipaên.

¹⁸ Mêd ngwe wê lê nêbê Kliopas ge nêl vô Yesu ên nêbê, “Tibii vac vîgwe vîyang vîyang ge la Jerusalem om he vihati yê di ngô susu wê val vac buc mahîgun tiga, dom mêd ông tîbed wê ông dilungên?”

¹⁹ Mêd Yesu kinêg vô yuu ên nêbê, “Muu nêl lec susu vatya?” Om yuu nêl vô i ên nêbê, “Xii dinêl kiyang lec Yesu Nasalet. Yesu ge plopete ti wê vông yuac xêkizêc di nêl kiyang hixôn xêkizêc, di Anutu hixôn xomxo vihati yê i nivîha.

²⁰ Léc xomxo levac wê mi si daa gee hixôn

Yuda levac wê mi viac il gee, he vông i la vô gavman levac di gavman levac tyuc lec nêb i yib om he hi i yib lec xax pola.

²¹ Ilage xe vông i vin ên xe nêbê Yesu ge xomxo wê ob vô Islel vêl ên nipaên ge, léc mad xomxo tyo yib. Di kiyang bo ti hixôn bêga bê xomxo tyo yib nyop, om ga buc wê vông yon ge.

²² Mêd gwêbaga vêx wê xe xôn mi dô ge vông xe yetac mabu, ên he kidi pitoc yang mi la yê lôva ti wê he lii Yesu vac ge,

23 lêc he o tulec Yesu lêm, om he vena nêl vô xe ên nêbê, 'Xe xê angela ya di he nêl vô xe ên nêbê Yesu kidi lec maviha nang.'

24 Om xomxo wê xe xeedô gee ya kidi di loc mi la yê lôva nang, lêc mila yê tiyi xocbê vêx tige nêl ge, di he o tulec Yesu lêm."

25 Mêd Yesu nêl vô yuu ên nêbê, "Muu piyôp maên. Bêna lêc muu gên o vông i vin kiyang wê plopete nêl ilage lêmê?"

26 Ên kiyang yêp bêga nêbê Kilisi wê Anutu nêb ob vông i lam ge obêc kô myavinê, pyap dêc obêc la dô vac xêseac di kô lê levac, lêc mêd muu o xovô tige lêm?"

27 Yesu nêl bêge pyap, nang dêc nêl Moses xolac di nêl plopete kiyang ge vihati kehe kitong hixôn vô yuu, ên nêbê kiyang gee vihati nêl lec i.

28 Mêd yon mila kwabo vô vigwe wê yuu ob la ge, lêc Yesu vông xocbê ob luu yuu vêl di loc mi la ge,

29 om yuu nêl xôn ên nêbê, "Ông dô hixôn xiiê, ên hiyôv hoo la gwêba om vigwe ob buc." Om Yesu la hixôn yuu di yon la dô vac yuu ben.

30 Mêd yon dô ên nêb ob ya yaên, dêc Yesu hêm blet di kitaa lec di hibu di vông vô yuu.

31 Mêd yuu yê di xovô nêbê ge Yesu, lêc lutibed Yesu xôa ma di yuu o yê i tii vac nang lêm.

32 Di yuu nêl vôma ên nêbê, "Buc wê Yesu keac hixôn u vac môp di nêl xolac kehe vô u ge od kiyang tige tipi vô u nilôd di vông u xêdyaa vô nivaha."

33 Mêgem lutibed yuu kidi lec di lax mi la Jelusalem vô nue ngivihi vigê yuu di tô mi la ti

hixôn lie ya wê he kitucma mi dô ge,

³⁴ mêd he nêl vô yuu ên nêbê, “Vixôhilôg, Apumtau Yesu kidi lec. Ge hilung i vô Saimon Pîta gwêba.”

³⁵ Mêd yuu nêl kitong vô he lec wê Yesu dila hixôn yuu vô môp ge, di nêl wê Yesu hibû blet di kitaa lec om yuu xovô i.

Yesu hilung i vô nue ngivihi

(Matyu 28:16-20; Mak 16:14-18; Jon 20:19-23)

³⁶ Yuu gên dinêl kiyang tige, di Yesu val le vac he mahigun di nêl vô he ên nêbê, “Kiyang malehe i hiyun xam xôn.”

³⁷ He ngô kiyang tige om he yetac di xona mabu, ên he xo ên he nêbê ge xomxo yibên ti kinu.

³⁸ Lêc Yesu nêl vô he ên nêbê, “Bêna lêc xam nilôm vô viyin di xam xo kiyang tibeacê?”

³⁹ Xam wê a vigêg yuu vixag ga di xovô bê ga a, di xam vyax vigêm lec a nignivi mi yaxên, ên xomxo yibên kinu ge od len yuu liyôhô o xocbê a ga lêm.”

⁴⁰ [Yesu nêl bêge pyap di hilung vigê yuu vixa vô he.]

⁴¹ He yê bêge di nilô vô nivihâ, lêc he gên o vông i vin lêm. Nge, he nilô vô tibeac. Om Yesu nêb he i xovô bê i o xomxo yibên kinu lêm, om kinêg vô he ên nêbê, “Yaên ya dô vô xamê?”

⁴² Mêgem he vông beac wê he si lec ngwax ge ti vô i,

⁴³ mêd i hôm di ya vô he manôn.

⁴⁴ Nang dêc Yesu nêl vô he ên nêbê, “Ilage wê a gên dô hixôn xam ge, od a nêl kiyang bêga vô xam ên a nêbê kiyang wê xomxo kivuu lec a mi

i yêp vac Moses xolac yuu plopete kiyang di yêp vac kipihac Sam ge, ge vihati obêc vô nôn lec.”

⁴⁵ Ge Yesu nêl i kitong vô he om he piyôp xovô kiyang vihati wê yêp vac xolac ge,

⁴⁶ di i nêl vô he ên nêbê, “Kiyang yêp bêga nêbê Kilisi wê Anutu nêb ob vông i lam ge obêc kô myavinê di yib, di buc ti wê vông yon ge od obêc kidi lec maviha vac yibên nang,

⁴⁷ di kiyang yêp hixôn bêga nêbê xomxo i loc nêl xolac lec Kilisi lê vac vigwe vihati bêga bê xomxo i pilepac he êdêc Anutu i kitya he nêl nipaên vêl. Xam vông yuac tige gê Jerusalem tax,

⁴⁸ di xam ob nêl kiyang wê xam wê di ngô ge vihati kitong.

⁴⁹ Xam ngô lê. Myakilôhô Ngibua wê Mag nêl nêb ob vông i lam ge, a obêc vông i lam vô xam, om xam dô Jerusalem di i loc vô buc wê Anutu ob vông xêkizêc wê kisii ganê i lam hivun xam xôn lê.”

*Yesu lec mi lax vô Anutu
(Mak 16:19-20; Sinale 1:9-12)*

⁵⁰ Mêd Yesu kô he di he sea Jerusalem mi la Betani, mêd Yesu vông vigê la kisii di kitaa lec he.

⁵¹ Yesu kitaa mi le, di he yê wê Anutu kô i di i lec mi la kisii ge.

⁵² Mêd he lax hixôn xêyaa nivaha mi la Jerusalem,

⁵³ mêd tiyi buc vihati ge he la pimil Anutu vac xumac ngibua.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8